

**EIGHTH LEGISLATIVE ASSEMBLY OF MIZORAM
(THIRD SESSION)**

LIST OF BUSINESS

FOR EIGHTH SITTING ON FRIDAY, THE 21st JUNE, 2019
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

S.R. ZOKHUMA
Commissioner & Secretary

* Please see Bulletin Part-II No. 68, dated the 18th June, 2019 for relative precedence of Private Members' Resolutions to be moved.

SPEAKER : “Eng dang zawng aiin inhmangaih tawn uar rawh u, hmangaihna in sual tam tak a khuh si thin a”. (I Petera 4:8)

Zawhna leh chhanna-ah kan kal leh nghal ang a, kan Deputy Chief Minister zahawm tak Pu Tawnluia a lo la tel thei lova. Starred Question No. 116 na zawt turin member zahawm tak Pu Ramthanmawia kan sawm e.

Pu RAMTHANMAWIA : Pu Speaker, ka lawm e. Ka zawhna chu hei hi a ni. East Tuipui bial chhungah khawi khuaah te nge Agriculture leh Minor Irrigation Department hian hma lak an tum?

SPEAKER : Chhang turin a changtu Minister zahawm tak Pu C. Lalrinsanga i lo sawm ang.

Pu C. LALRINSANGA, MINISTER : Pu Speaker, member zahawm tak East Tuipui bialtu Pu Ramthanmawia zawhna - “E Tuipui bial chhungah khawi khuaah te nge Agriculture leh Minor Irrigation Department hian hma lak an tum?” tih chhanna hi chi hnih ang deuhin a kal a, Agriculture leh Irrigation lam hi a hranin ka rawn chhang ang a –

Directorate of Agriculture (CH) :

East Tuipui bial chhunga Agriculture Department-in hma lak a tumna khua te chu hengte hi a ni :

- | | |
|----------------|----------------|
| 1) Khawbung | 9) Zawlse |
| 2) Khuangthing | 10) Hruaikawn |
| 3) Samtlang | 11) Sesih |
| 4) Farkawn | 12) Leisenzo |
| 5) Bungzung | 13) Khuangleng |
| 6) Vangchhia | 14) Leithum |
| 7) Dungle | 15) Vaphai |
| 8) Vanzau | |

Irrigation & Water Resources Department:

East Tuipui bial chhunga Vangchhia leh Khawbung 'S'-ah Irrigation & Water Resources Department-in Irrigation project hna a kalpui mek a. Hma lak leh tumna khua te chu : Thekpui, Farkawn leh Vanzau te an ni.

Pu Speaker, ka lawm e.

SPEAKER : A va zawt hlawhtling ve. Zawhbelhna zawt turin member zahawm tak Pu Lalrinsanga Ralte a phar hmasa ber e.

Pu LALRINSANGA RALTE : Pu Speaker, ka lawm e. Ka zawhbelhna chu hei hi a ni. Serlui bial chhungah Agriculture leh Minor Irrigation atang hian hmalak tumna a awm ve em? A awm chuan khawi khawite nge tih min hrilh thei em?

Pu Speaker, ka'n sawi belh zawk duh chu, kan bial chhungah khuan leilet hmun zau tak tak tam zet mai kan nei a, chu chu vaiho hian an enkawl thin a, chungah te chuan a leilet, a hlutna anga kan thar chhuah theihna tura ruahmannate a awm em? Khung phai vai ho in leilet an enkawlte hi tihrem theih dante hi a awm em tih ka zawh belh bawk a ni.

SPEAKER : Member zahawm tak Pu Lawmawma Tochwawng i lo sawm ang. Chumi dawtah zawhna neitu, veilamin an phar ve lo tlat mai.

Pu LAWMAWMA TOCHHAWNG : Pu Speaker, ka lawm e. Ka zawhbelhna chu (Agriculture lam hian an la chang em aw ka ti a, ka lo tisual palh a nih pawhin min lo hriatthiam ka duh a).

Alu, purun sen, motor chana leh vaimim thar chhuaha intodelh tumna te hi a awm em, ram pum huap angin? Lo awm ta se ruahmannate leh hma lo lak tawhna te a awm em tih a ni a.

A bik takin vaimim hi tawite te han sawi ka duh a. Lunglei lamah sawn artui a intodelh a nih em loh pawhin tam zawk thar chhuah tumin hma kan la ve mek a. Mizoramah hian artui tharchhuah hi engnge kan harsatna kan ti a. Kan vulh a, kan thar chhuak a, an tui ve reng si a, hmannia ka zawhna-ah chuan Andhra Pradesh atang te, Madhya Pradesh atangten a lo lut reng a, Karimganj-ah khuan Abdul Matinate unauin chumi chu an lo thawn darh a, truck 30 vel North East a thawndarh

nan ringawt hian an nei a. Chutiang a nih chuan kan ramah hian keimahni pawhin chawp leh chilha kan ban phakah hian kan tui tir ve theih tho a ni si a, a harsatna lai ber chu chaw a ni a, a hautak em em a ni. Chumi chu vaimim hi engemawzat kan thar chuan kan inzangkhai thei dawn a, Agriculture leh Vety lam thawh dun theihna a ni ang a, nimina kan sawi teuh cooperation kha a lo awm chho nghal ang a, feed mills te kan tih theih chuan a tha dawn em mai a. Agriculture hian alu, purunsen, motor chana leh vaimim-ah intodelhna tur hian hmalakna a nei em? A lo nei a nih chuan engtenge min hrilh thei em?

SPEAKER : Zawnha neitu member zahawm tak Pu Ramthanmawia i lo sawm ang.

Pu RAMTHANMAWIA : Pu Speaker, ka lawm e. Kan Minister zahawm takin min chhan dan kha a lawmawm hle mai a, kan beisei phak bakin hma lak an han tum tih kan hria a, a phurawm a, ei leh bara intodelh hi sorkar hian a tum a, chumi a kalkawng pawimawh tak, a hlawhtlinna tura hmalakna ka bial chhunga potential tha tak tak zing ami a rawn thlang a, hmalakna tur a rawn nei hi lawmawm ka ti a.

Hei hi tihlawhtling thei ila, kan han chhut dan mai mai chuan tuna hmun 18 a leileta siam theih hi hectare 323 vel awmin kan la hria a, heng hi buh han ching ta ila tin nuaikhat dawn lai thar theihna tur niin an sawi a. Chuvang chuan, helaiah hian theihtawpin hma min rawn lak sak dawn a, min rawn lak sak zel sela. Chu hmalakna tura an han puan takte kha ka zawh belhna chu hei hi a ni. Engtikahnge hna hi tan theih a nih ang tih a ni e. Ka lawm e.

SPEAKER : Nimin lamah Demand-ah te kan chai nek tawh a, a tuk a lo chhuah hian tlang sangha vuak tuka nghadah dap hi kan ang deuh khawp mai a. Tuipui atangin Serlui te; Lunglei lam te, theih ang ang chhang turin Minister zahawm tak Pu C. Lalrinsanga kan sawm e.

Pu C. LALRINSANGA, MINISTER : Pu Speaker, ka lawm e. Serlui bialtu zahawm tak Pu Lalrinsanga Ralte in a bial chhung hmalak dan tur leh kan hmachhawp te a rawn zawh kha hetiang hian chhang ila – Serlui bial hi potential area kan neihna, a hlang deuh hleka, potential area kan neihna hmunpui lehzuat deuh zing ami te pawh a lo ni a.

Vanneithlak deuhin he laiah hian engemaw thawktu a awm a ni ka ti mai a. Khulai Serlui bial bawr bikah khuan vai, leileta hnathawk chhawrho khu hun rei tawh tak atanga an lo neih, tawm tlat mai khu an lo awm a. Khung khuan kan tharchhuah tam zawk hi Silchar tlangdungah an lak let fo avangin kan tharchhuah te a nihna angin kan fairel bel a lut vek tlat lova, hei hi a veiawm tak tak a. Chuvang chuan engemaw zawnga land development, tuna command area develop mek, buh kan thar mekna baka han zauh belh theih leh leilet han nawr zawl leh theih tur awm han tihbelh ngaite leh leileta la siam lohte nen tunah hian DAO level-ah pawh survey lo nei rawh u kan inti a. Ruahmanna an rawn nei fel thuai turah pawh ka ngai a.

Chumi mil chuan tuna kan neihsa pawh khu lehlamah chuan land leveling kan la tih theih loh avangin kan House Leader hian mechanization hi a ngaih pawimawh a ni a. Tin, chumi dungzuia kal tur kan nih bawk avangin land leveling-te kan han ti ang a, transplanter te leh harvest pawh khawl hmang vekin leh a vuakna thlengin. Tin, Rice Mill hial pawh din theihna tur ang beiseina kan neih tihlawhtling turin kan thalai rualho hian vaiho thlak duhna an nei tlat mai a ni. Chu chu thuang thumin an lo kal a, khatiang na na na kha chu, tractor pawh hi awm leh awm lo chungin pek mai duhna kan nei a. Kan sawihonaah pawh kan Chief Minister pawhin, “ E, chutiang a nih chuan ui kan nei tur a ni hleinem” tiin, chung tractor leina turte pawh sanction min phal nghal zung zung mai a. Ani chungah pawh lawmthu ka sawi a.

Chutiang chuan khulaia kan potential area neihte kan thalaiten an han hma tak tak chuan, an tum dan tak takah phei chuan buh kan ching ang a, buh chinah khan sangha kan khawi ang a, chumi hnuah thlasik thlai kan ching leh ang a. Chutiang chuan thalai rualho hian eizawna ngelnghet inbun ngheh kan tum a ni an ti a ni. A lawmawm tak takin ka hria a, ka han sawi kai ni sela.

Tin, agriculture bik hmalakna bakah khan a potential area a lo ni bawk a, Vakultui Project te, Lower Sesih te, Saikhumzaute leh Sihlui ho te kha irrigation bikah chuan a Serlui bialtuin a rawn zawh a biala hma kan lak chhonzawmna tur chu a ni tih kha ka chhanna ni se.

Lunglei East bialtu Pu Lawmawma Tochwawng in a rawn zawh kha lehlamah chuan Agriculture Minister ka nihna anga kan choka luahlum tura ka duhte

zingah khan alu leh purunte hi a tel a. Amaherawhchu, kan subject a ni chiah lo naa maimitchhing chungin theih lai laiah hi chuan kan tih mai a tha em aw te ka ti a. Kan sawi hot angreng phian a. Alu pheih chu Aizawla tuktin tiffin-a an vawm luh hi han lakhawm ta ila quintal fe a tlin ka ring a. Chhungkaw tinin kan eite nena han chhut khawm pheih chuan Alu kan eiral hi a tam em em mai a. Chuvangin Alu hi tun aia nasa lehzuala chin dan kan dap a tul a. Tin, purunte pawh a ni tho a.

Chutihruah chuan, alu bikah pheih chuan tubex mai ni lovin TPS kan tih, true potato seed, hmarcha chi ang, han chin puna hmalakna tur angte pawh kha rilruah chuan tinzawna a awm lian hle a. Chungte pawh chu a theih ang anga hmalak kha a tul dawn kan ti a ni.

Chubakah tunah hian vaimim hi NFSM hnuaiah, ka hresual emaw, hmun hrang hrangah kan ching nual mai a. A chhan chu vawk vulh kan lo thahnem chho ta a, vawk chaw mamawhna a lo sang a. Phai atanga kan lak ringawt ring zawnga kal lo hian kan thlai thar nen ngei kan inthleng tawn kha economy thirna zawn atang pawhin a pawimawhin kan hria a. Chumi kal zelah chuan ka han sawi zau ang a, Pu Lawmawma Tochwawng hi High Power Committee Chairman a ni a, thahnem a ngai a. Lunglei khawpui saw artui a chawm theih a tum a, chu chu kei pawhin ka tum pui a. Theihtawp chhuah a Agriculture Department-te nen in tie-up a hmalakpui dan kha awm se. Kan project hrang hrang NFSM Scheme leh thil dang dang central project kan han neih atang hian tan kan lak chhoh chuan Lunglei khawpui saw district dang pawhin minrawn entawn tura hmalakna atan hman ni se tih kan rilruah a awm a. Ani pawhin chu chu thahnemngaihna a nihna zawn atangin arawn zawtah ka ngai a.

A dawt lehah chuan zawhna neitu Pu Ramthanmawia kha ni e, kei pawh hmalakna tur kan lo ngah hle mai ka ti a, ka lawmpui viau rualin a sawi ang khan tuna kan identify bak hi potential area tha kan la dap chhohte pawh a ngai a. Buha intodelh kan tum a nih chuan shift khat ngawt thar kan tum tur a ni lova shift hnih, kum khatah hian wawi hnih a thar theih a. Tun February thla ah sawn, Pu Nihar Kanti Chakma bialah thlasik buh seng turin pheih kan tum a. Amaherawhchu, Model Code of Conduct khan min bar tak si avangin he thlasik buh hi a awmzia chu a hma buh seng zah ve leh, phur leh nghal a ni a, February leh March bawrvet, March han

thleng chiah lo vel kha a seng leh hun a lo ni veleh mai a. Tichuan, a buh phun lehna tur, tuna kan hmabak mek han khalh buai lo tawk si hi a seng leh hman tlat a ni.

Chuvang chuan buh hi kum khatah vawi hnih thar theih dan kan ngaihtuah a kan ti hlawhtling thei a nih pheih chuan buh a kan intodelh theihna tur hi hla lutuk lo niah kan ngai tlat a ni. Khangte kha ka sawi kai duh a.

Chubakah zawhna neitun hmalak hun tur tih a zawh kha chu ongoing-te a ni a, a then kha chu. Tun budget kan han pass chhohah hian hma kan la chho nghal mai turah ka ngai a. A beisei angin kan hma thuai ang tih kha ka chhanna ni teh se. Pu Speaker, ka lawm e.

SPEAKER : Starred Question No. 117-na zawt turin member zahawm tak Pu Lalduhoma kan sawm e.

Pu LALDUHOMA : Pu Speaker, Environment, Forests & Climate Change Department changtu Minister zahawm tak chhan atan ka zawhna te chu :

- a) Mizorama Bamboo Plantation awmna hmun leh a zau zawng?
- b) Heng Plantation atang hian hlawkna engzat nge hmuh a nih tawh?

SPEAKER : Chhang turin a changtu Minister sawm ang.

PU T.J.LALNUNTLUANGA, MINISTER : Pu Speaker, member zahawm tak Pu Lalduhoma zawhna chhanna chu :

- a) Forest Division hrang hrang 11 ah leh District Council 3-ah hmun 458-ah a awm a, a zau zawng belkhawm chu 38601 ha a ni.
- b) Heng Bamboo Plantation te hi hmun pakhat ami bak chu seng (harvest) a nih loh avangin a hlawkna pawisa faia hmuh tur a la awm meuh lova, Sakawrhmutuai Bamboo Plantation atanga mau pum 800 sengna atangin ₹ 24,000.00 hmuh a ni.

SPEAKER : Zawhbelhna zawt turin Pu C.Lalsawivunga kan sawm e.

Pu C.LALSAWIVUNGA : Pu Speaker, ka lawm e. Ka zawh duh chu Bethlehem Vengthlangah khuan Bamboo & Rattan Research Centre dah a ni a. MNF sorkar hmasain a dah tawh kha a ni a. Tunhma chuan khuan sahan a awm thin a, Sahan

chu PTC bulah khuan an sawn thla a, hemi ramruakah hian Bamboo & Rattan Research Centre chu dah a ni a. Hnathawk tur lak thuah tualchhung mite pawh a awm ang angah duhsak an ni ang tiin agreement pawh siam a ni a. bamboo & Rattan Research Centre hi engtianga tangkaiin nge kan sorkar hian a hman tih kha ka zawhna pakhat a ni a. He Research Centre atang hian bamboo emaw, Rattan emaw research hi kalpui a ni tawh reng em tih kha ka zawhna pahnihna a ni a. Tualchhung mite hnaah duhsak an ni ang tih a nih rual hian an lak tawh sa pawh an rawn ban fai deuh vek a, hei hi engnge a chhan? He Research Centre hi Mizoram sorkar kut ken a ni lo em ni tih kha hriatchian ka duh a, chu chu ka zawh belhna a ni e.

SPEAKER : Zawhna neitu kan koh leh hmain Pu Lawmawma hi a phar hmasa ber a, Pu K.Pachhunga hi i kian phal em ?

Dr. K. PACHHUNGA : Pu Speaker, ka lawm e. Bamboo lam ka zawt dawn lova, mahse Forest concern ka zawt ang a, chhan a har lo turah ka ngai a. Mizoramah Anchiri min pe a, sorkar atanga malsawmna dawng lo te, thingtlang lam ten an hmang tangkai em em a, thingtlang lama miharsa deuh te chuan an hmang tangkai em em a. Anchiri chu perfume siamna a ni a. Chuvangin vai hoin Zoram hmun tinah lutin an lei nasa a, a rem mai dawn a, conserve tumna sorkar thar hian a nei em tih rawn zawt a ni e.

SPEAKER : Zawhna neitu Pu Lalduhoma kan sawm e.

Pu LALDUHOMA : Pu Speaker, ka lawm e. Bamboo Plantation hnuaiah hian scheme hi a tam khawp mai a. Artificial Regeneration te, Natural Regeneration te, National Bamboo Mission leh Finance Commission Grant te, Medicinal Plant Project te, heng atang hian sum hi kan hmu hnem tawh hlein a lang a, amaherawhchu tunah plantation area zau zawng sing thum chuang pawh hi a hmunah en ta chiah ila, hmuh tur leh hmuh tlak hi a tam ka ring lo va, kan sum sen zat te kan hre lo va, a tam hle tawhin ka ring a, chuta tanga kan sum hmuh chhhuah chu ₹ 24,000/- chiah a la ni a. Chuvang chuan investment policy hlawk lo tak a ni tih hi a chiang in ka hria a. Kan kaldan pangngai ang a kal lo hian, khawtinah tlangsang, loa neih tlak loh te leh, ram chhengchhia leh khawtlangin an han humhalh theih mai tur nei khua te hian lo identify ta sela, khawtlang hruaitute leh NGO te kutah dah ni ta zawk sela, phun belh ngai a nih pawhin phun belh sela, khangho hnenah khan sum hi lut ta zawk sela. Man power kan mamawh belh lo ang a, an lo enkawl ang a,

khawtlangin an enkawl hi chu kan hlau zawk nghe nghe a. Khati zawng khan a inher theih ang em, policy ang deuhin kan nei thei ang em? Chuti a nih lohva kan kaldan pangngai ang ringawt hi chuan sum kan seng teuh ang a, a result hmuh tur awm si lo hian kan kal leh vak ang tih a hlauhawmin ka hria.

SPEAKER : Assembly Committee pawh hian en zui a ngai mai thei a ni. A changtu Minister khan Anchiri thleng khan, a theih chin chin han chhang teh se, sawm ang.

Pu T.J.LALNUNTLUANGA, MINISTER : Pu Speaker, ka lawm e. A zawhna main pangngai atang khan kan kal peng ta deuh hlek a, chhan theih ang angin ka han chhang dawn ang a.

Member zahawm tak Pu C.Lalsawivunga zawhna tualchhung mite duhsakna kan nei ang a, tuna an ban leh tak si tih a rawn sawi kha chu tun sorkarah hi chuan tumah han ban thawm kan hre lo va, tumah la ban loh a ni tih kha ka chhanna ni ta sela.

Pu C.LALSAWIVUNGA : Tun sorkar ah hi chuan an la hre lo a nih pawhin tualchhung mi heta hnathawkte hi an rawn ban deuh vek tawh a ni, chu chu ka rawn zawhna kha a ni. Tun sorkarin a ban tihna ni lovin, hma min lak pui thei ang em tih a ni.

Pu T.J.LALNUNTLUANGA, MINISTER : Sorkar hmasa lam thil a nih hmel a, kan lo enzui ang e. Project chi hrang hrang hi 13th Finance Commission te, 14th Finance Commission te, khatiang Commission hun laia scheme tawp te a awm ve bawk a. Ministry hmasaa thil lo tih te a nih hmel a, kan lo en zui ang e.

Hemi FRCBR Bethlehem veng ami chungchangah hian Mizoram sorkarin a manage chungchangah hian inrawlhna kan nei lo tih kha ka chhanna a ni bawk a ni.

Tichuan, a dawt leh ah chuan member zahawm tak Dr. K. Pachhunga zawhna Anchiri kha hmanniah a hrangin kan sawiho tawh a. MLA zahawm tak khan a ngaih pawimawh thute min hrilh a, Lunglei lam hruaitute pawh in min hrilh bawk a. Chumi avang chuan Forest hotute, PCCF te pawh, hemi chungchanga hmalakna neia humhalh turin kan inhrilh tawh a ni.

Tichuan zawhna neitu member zahawm tak Pu Lalduhoma zawhna chungchangah khan helaia Bamboo Plantation chungchang hi tunlai hian thuneihna ti ila, a department changtu pawh hi hun khaihlak deuh lai a ni a. Plantation chungchangah hian Bamboo Mission chungchangah hian a rawn sawina ni turah ka ngai a. Central ah khuan Agriculture Ministry leh Farmer Welfare hnuai a ni a. Chu chu kan Minister zahawm tak Dr. R. Lalthangliana hunlai khan hei hi Mizoram tan zuk sawi chhuah ve a ni a. Tunah khuan an kal zel a, Forest Department anga han ngaihtuah chhunzawm tur khan Tree definition atangin bamboo hi dah chhuah a ni a. Tunah hian a enkawltu tur department hi kan la tifel chiah lo a. Nakinah chuan Horticulture Department lamahte pawh kal tur a ni a. Chuvangin, kha kha chu ngun zawka zir chian kan lo tum ang e tih kha ka chhanna a ni e.

Pu C. LALSAWIVUNGA : Pu Speaker, Bethlehem Vengthlanga Bamboo & Rattan Research Center hi Mizoram sorkarin engmah hriatpui lo ang khan Minister zahawm tak khan a rawn sawi a. MNF ministry hmasa laia rawn dah a ni a. Hei tunah sorkarna an rawn siam leh a, sorkarin engtinng e a hriat loh theih? Chuvang chuan sorkar hriatpuina loa Aizawl khawpui lailia Research Center awm hi a mak hle mai a, engnge a chhan? (PU LALDUHOMA : Pu Speaker, ka zawhna kha.)

Pu T.J. LALNUNTLUANGA, MINISTER : Pu Speaker, nichina ka chhanna kha a hrethiamlo palh em aw ka ti a, administration leh management zawkah khan Mizoram sorkar a inrawlh lo ka tihna a ni e.

Pu LALDUHOMA : Pu Speaker, ka zawhna kha min chhang thelh deuh hlekin ka hria a. National Bamboodfg Mission hnuai a ni emaw, kan state Bamboo Development Board hnuai a ni emaw, kan budget atangin a ni emaw, SEDP hnuai a ni emaw, a engapawh ni se a scheme hrang hrang implementation hi tuna kan kalpui dan ang ringawt hi chu a fuh lo tih hi a chiang a. Committee te pawhin hei hi kan en thin a, kan lungawilo viau a, dik chiah chuan. Chuvang chuan a policy hi rilru thar deuh hlekin, ngaihtuahna thar hmangin sorkar hian a her danglam thei em? Kan House Leader zawk min chhan hial tur atan te pawh a ni maithei a. Khawtlang NGO kutah te hian pe ila, annin lo enkawlin sum pawh an kutah lut se, manpower

kan mamawh belh tih pawh ngailoin an kutah hian forest tha tak neih dan hi a awmin ka ring a. Khami a policy change zawk kha a ni ka han zawh mah mah ni.

SPEAKER : A chhanna kha ka lo ngaithla uluk ve viau mai a, a chhan chu kha mau kha grass a ni tawh tlat mai a tih lai te kha House Leader zahawm tak i sawm ang.

Pu ZORAMTHANGA CHIEF MINISTER : Pu Speaker, helai hi a inthlak lai transition period lai a ni a. A hma zawng zawng kha chuan bamboo hi Forest kuta awm vek a ni a, mahse central sorkarin bamboo hi tree a ni lo ve, scientifically-in grass a ni, chuvangin Horticulture-in la rawh se, a ti a. Chutatang chuan keini pawhin Horticulture-in a lak turin tunah kan tifel a, an la tan chiah a.

Tin, Bethlehem Vengthlang ami hi chu, ‘Ni e, central sorkarin Research Center rawn din kan duh e’ an ti a, ‘rawn din ta che u, a tha khawp ang chu’, Mizoram sorkarin kan ti a, an rawn din a, anmahni enkawl vek a ni a. Amaherawhchu bamboo hi tunhma zawng kha chuan India ramah hian failure a ni. A chhan chu, an han ti thin tak na a, hmanah Agriculture Secretary (kum li vel kal ta em ni ang aw) Delhi-ah ka sawipui a, a deal tu a ni a, (Agriculture khan Horticulture an chan tel avangin) ‘A, nangni,’ min ti ve khanglang a, a hriain rawtna inthlen fumfe loh chuan hmanah khan National Bamboo Mission-ah hian crore 1000 tel a awm a, i hria a. Mahse a tak taka hman ngaihna hi an hre lo va, a pawisa it in, tlemte te chuan state in an pawt darh a. Mahse engmah hlawhtling tak tak a awm lo. Chuvangin, nangnin in rawn buaipui leh thei a nih chuan, i ngaihtuahna ang khan (chutih lai chuan Planning Commission a la awm a) Planning Commission-ah dil belh ula, ka zuk sawina ber pawh Mizorama bamboo plantation pui leh North East, hemi atana hmalak nan hian state pawisa chuan kan tlin dawn miah lova. Central ah pawisa khawi atangin nge a tih theih ang tih lo zuk zawn lawka, ka zuk biakna, ka kawmna a ni a.

Chutah phei chuan ‘Carbon Trading Scheme hian a tih a rem lawm ni?’ tih kan sawina subject hnuaiah a ni a. “Carbon Trading Scheme hi chu a theih a, amherawhchu a buaithlak khawp mai a. Chu ai chuan Planning Commission-ah kal la, National Bamboo Mission-ah crore 1000 tel, crore 10,000 tel an tan dah a har lo, dah tir la, hmanah pawh tam deuh an dah. Mahse a manage dan hi India ramah kan fail lutuk a. Chuvangin a chi thar a nih loh chuan tunah tak phei chuan hmana 6000

bawr vel tiin ka hria, crore awm a kha. A bang chu 120 a ti nge maw ni, ka hrechiang tawh lo, tlemte a la awm, chu pawh chu an hmang thiam tak tak lo” a ti a. Chutia kan sawi chu a ni a.

Tunah pawh hian member zahawm tak Pu Duha zawhna kha a dik chiah mai a. Tunah hi chuan kan flagship programme pui ber a ni a, a hma kha chuan, “Forest Department” pawh thahnem an ngai si a, a tiak an hmuh apiang, kawi tingteng pawh an theh darh zel a, an phun a, kei pawhin ka huanah ka phun a, paih leh khi hnapui a tling a, a awm awmin awm teh se, ka ti ringawt mai a. Tichuan, a chi a pawimawh ber mai a, a chi tha a nih loh chuan a hling nei chi phei chu paih leh kha a hautak a, a then chuan jelatine in an vawrh a, a then chuan JCB-in an nawr a nia. Chutia tih ngai khawp chu a ni a, a chi tih fuh loh chu chuti hlauh chu a ni. Chuvangin a chi identification-ah khan tunah chuan keini pawhin chi 2, Brandicy leh Latifloras hemi pahnih hi kan target a ni a, chu chu Hosur-ah an siam theih avangin, kar leh hi chuan a phun tan na turin a chi phei chu min rawn thawn a a enchhin nan chuan sawm vel chu kan phun chhin a. ‘Nuai khat rawn thawn hram kan tum ang e,’ an ti a, In ti tlem e, maktaduaih rawn thawn rawh u,’ kan ti a. Amaherawhchu, maktaduaih pawh ti ila, a ni lo berah Mizoramah hian a maktaduaih za tel kan phun a ngai dawn a ni. Chumi a nih avangin khalai kha nasa takin hma lak kan tum a, kan identify fel tawh a. Amaherawhchu, ram kha member zahawm tak Pu Lalduhoma tih ang khan, entirnan Sesawng ramah kan phun dawn ti ila. In khuain khawilai a phun nge in duh kan rawn ti ang a, a pawimawh chu link road in a paltlang a ngai a ni. Link road nen a kal kawp tawh ang a, plantation hi a puitlin nan chuan kum 4/5 vel a ngai a ni. Khami chhung khan link road pawh a lo develop ve ang a.

Tichuan mimalah privatize-in mimal phuntu zawng zawng khan society an din ang a. (Hnahlan lama society an din ang khan) Tichuan, plantation society khan a sengna industry a awm loh chuan in za khua hian a tlem thei ang ber pawhin chhut ila, kum khatah hian raw lian kha pum nuai thum aia tlem lo chu an thar a, raw lian nuai thum process tur chuan, hmanni a ka sawi ang khan tlangval 80 rual velin hna an thawh a ngai a ni. Chuvangin employment a siam nghal a, a khuuah khan industry siam nghalin kan hriat angin electric lianpui a ngai lo va, tui hu a press a ni mai a. Chu chu tunah hian kan tum a, ka sawi tawh ang khan a pawimawh leh har ber chu a chi

man chu a ni bawk a, a chi pakhat hi ` 30 to 40 inkar in an hralh thei a ni. A har ta ber chu link road kha a ni a, a tirah chuan chhe deuhva in develop chho zelin a kal mai ang chu kan ti a. Tichuan society system-in a khaw mite kuta va pe in, anmahni enkawlna hnuaiyah dah kan tum a ni e.

SPEAKER : Pu Leader, Annual Maintenance Contract ang hian Department leh Health te pawhin khawl lian pui pui an lei hian AMC an siam thin a, kum chuti zat chhunga a chhiat chuan a thlawnin in rawn ti ang tih hi a awm a. A chi kha a nih loh leh palh khan agreement hi sign a tha maw?

Pu ZORAMTHANGA, CHIEF MINISTER : Pu Speaker, a tul khawp ang, mahse kan Department te pawhin a hmunah an zuk en a, a kung puitling tawh an hmu a ni. Tin, Latiforas phei chu keiman a sample ka pek a ni a. Kan huan a mi a lak thlak, chuta tanga kum 6 vel a beih hnuah a protocol thiam a. A bulah a tihpuitlin tawh na indawt khan a awm chho zut mai a ni. A kar lakah thil dang a lo ti sual a nih loh chuan, khati pahnih chiangsa kha a nia, tha turah chuan kan ngai a. Amaherawhchu, khang erawh kha chu kan chian a tul tho a ni.

SPEAKER : Aw le, Starred Question no.118-na ah kan kal ang a, a zawttu Pu Vanlalhlana, Pu V.L.Zaithanzama, Pu Lalrinsanga Ralte te an ni a. Pu Vanlalhlana i sawm mai ang aw.

Pu VANLALHLANA : Pu Speaker, ka lawm e. Starred Question no.118-na Minister zahawm tak chhan atan kan zawhna te chu :-

- a) Mizoram Journalist Association member-te hian eng ang hamthatna nge sorkar atangin an dawn ?
- b) Pension facility pek ve tumna a awm em ?
- c) MJA ten Chief Minister hnena lehkha an thehluh pension chungchang sorkarin tihhlawhtlin a tum em ?
- d) Engtingge hmalak zel dan tur ruahmanna a neih ?

SPEAKER : Chhang turin a changtu Minister i lo sawm ang.

Pu LALRUATKIMA, MINISTER: Pu Speaker, ka lawm e. Member zahawm tak tak Pu Vanlalhlana, Pu V.L.Zaithanzama, Pu Lalrinsanga Ralte, te zawhna chhanna chu hetiang hi a ni :

MJA members ten sorkara hamthatna an dawn te chu :-

- 1) Accredited Journalist member-te an thihin Ex-Gratia ₹ 1,50,000pek thin a ni. Journalist member panggai an thihin Ex-Gratia ₹ 1,00,000 pek thin a ni.
- 2) Journalist Welfare Fund atangin Journalist damlo leh an chhungte Family Declaration-a an dah ten Medical Assistance an bill thei.
- 3) Journalist-te state dang emawa an zinin an zin chhan a zirin sorkarin tul a tih angin buaipui an ngaihna laiah a buaipui thin.
- b) Hei hi sorkara dilna thlen mek a ni a, ngaihtuah mek a ni.
- c) MJA te dilna hi sorkarah a kal mek a, ngaihtuah mek a ni.
- d) Sorkar a thlen mek a ni a, ngaihtuah mek a ni.

SPEAKER : Pu V.L. Zaithanzama, member zahawm tak zawhbelhna zawt turin i lo sawm ang.

Pu V.L. ZAITHANZAMA : Pu Speaker, ka lawm e. Journalist-te hamthatna chungchangah khan, Accredited Journalist ho hi sorkarin card an pe a, chu an card chu anmahni sawi dan hmangin an hmang tangkai lo hle a ni. Vawiinah pawh hian Session a lo lut turin card dang pek an ni a. Sorkarin card a pek tawh ring khan Session leh thil dangah hian an hmang mai thei lo em ni tih ka zawh belh duh a. Tin, I & PR building hi a thiahna a rei tawh hle mai a, sak that a nih lawk loh avang hian a thawktute pawh chep takin an inhnawh a. Engvanga sak that mai loh nge a nih, hmalakna a awm em ? A hmingte pawh kha Lianchhiari Run tiin kan phuah tawh niin ka hria a, chu chu ka zawt belh bawk a. Tin, advertisement rate pawh hi Sorkarin 7th Pay te kan enjoy tawh a, Sorkar hnathawk ten, a rei tawh deuh a, tihpun ve a hun tawh lawm ni tih te ka zawhbelh a ni e. Ka lawm e.

SPEAKER : A Zawhna neitu member zahawm tak Pu Vanlalhlana i lo sawm ang.

Pu VANLALHLANA : Pu Speaker, ka zawhbelhna mawlte chu Minister hnen atang khan Mizoram House-ah an thlen theih thu kan ngaihthla a. Amaherawhchu, a thawk te hian on duty/on duty lo ang te hian an lo classify ve thin a. MJA member te chu an zin te chuan on duty an ni mai a, tullo ah pawh an zin vak lo va. Chuvangin an zinna ah khan official duty anga class theih a remchang lawm ni tih kha ka zawt duh a.

Tin, pension facilities hi Mizoram chauh a ni lo a, Assam-ah te, Tripura-ah te, Manipur-ah te pawh an pe a. Kan chanchinbu mite hian dilna hi anmahni ngei pawhin C.M hnenah an thlen a ni a. He House kaltlang hian pension facilities an neih ngei theih nan ka ngenpui ni teh se.

SPEAKER : A theih ang anga chhang turin Minister zahawm tak Pu Lalruatkima kan sawm e.

Pu LALRUATKIMA, MINISTER : Pu Speaker, member zahawm tak Pu V.L. Zaithanzama zawhbelhna kha credited Journalist te hi card an neih chuan sawrkar official function-ah a hranpa a sawmna ngai kher lovin an lut thei mai lawm ni tih kha a ni a, a dik a. He thil hi hmun thenkhatah a hmunhma ten a zawh loh thin avangin harsatna kan tawk zauh zauh va, chungah te chuan I&PR-in ruahmanna te an siam thin chang a awm a, engpawh nise a hmunhmain a accommodate theih phawt chuan journalist te kha heng hmunah te hian an luh leh chhuah chungchangah harsatna awm lo turah kan ngai a ni.

Tin, zawhbelhna dang Lianchhiari Run sak chungchang kha kum 2017 June thla khan NEC atangin sanction kan hmu a, chutah chuan 10% kan dawng tawh a. Amaherawhchu, tunhnaiah bawhzui lova a awm avangin harsatna kan tawk a. Ministry lamah te, NEC lamah te zuk bawhzuiin tunhnaiah hian hma kan han la a, Ministry leh NEC atangte-a zawhna a awm avangin kan chhang mek a, rang taka sak chhunzawm leh kan duh khawp mai a, chumi tur chuan theihtawp chhuahin hma kan la mek a ni.

Tin, zawhbelhna dang advertisement rate tihpun tum chungchang kha MJA khawmpui lian chuan hemi chungchang hi a rel a, sorkar pawh in a thuphung chuan kan lo hre tawh a. Hei hi hun remchang hmasa berah MJA lam hrutute nen sawiho turin ngaihtuahna kan hmang ang a, thil man to zel leh 7th Pay kan lo hmang bawk nen khan sorkarin MJA te nen ngaihtuahna a sengchho mek a ni.

Tin, member zahawm tak Pu Vanlalhlana zawhbelhna MJA te Mizoram pawna an zinin Mizoram House-ah te harsatna an tawk zauh zauh thin a an ti a. Sorkar thar kan neih atang hi chuan harsatna an neih awm hi kan la hre lo va. Amaherawhchu, thurawn kan pek ve fo chu Mizoram pawna kan zin a eng eng emaw kan nih chuan I&PR lam atang hian lehkha te siamin chutiang chuan advance-a Mizoram House-te lo hrih sak dan te pawh dap turin ngaihtuahna kan hmang a. Chuvang chuan anni harsatna tawh thin kha sutkian sak zel hi kan tum bawk a ni. Chung chu zawhbelhna ka chhan theih chu a ni e.

SPEAKER : Assembly kha sawi ve ngaiin ka hria. Accredited Card a nia, Assembly Card a ni lova, Parliament House tih dan hi kan keini hian kan zui a. A chhan chu Presiding Officer-ah hian an sawi nasa thin a. Parliament-ah khuan a zawng zawng an luh chuan security a tha teh nuaih thin lo va, chuvang chuan Home Department in a lut thei tur kha an siam sak a, chutiang chuan keini pawh hi Accredited Card ringawt hi kan ti lem lo va, helaia lo siam ve kha chu kan duhdan chu a ni ve hrim hrim.

Starred Question 119-na zawt turin member zahawm tak Pu Lalduhoma kan sawm e.

Pu LALDUHOMA : Pu Speaker, Land Resources, Soil & Water Conservation Department changtu Minister zahawm tak chhan atan ka zawhna :

- a) Mizoramah Rubber kung engzatnge awm?
- b) Mizoramah Rubber Plantation area zau lam engnge ni? Regional Office, Central Rubber Board neih ve tum a ni em?

SPEAKER : Chhang turin a changtu Minister zahawm tak Pu R. Lalzirliana kan sawm e.

Pu R. LALZIRLIANA, MINISTER : Pu Speaker, ka lawm e. Member zahawm tak Pu Lalduhoma zawhna chhanna chu :

- a) Rubber hi private an awm nual avangin a kung awm zat chiah hi sawi hleih theih a ni rih lo a ni.
- b) Department-in Rubber Plantation a siam zat chu hetiang hi a ni - NLUP atang khan hectare 1558 a ni a. Tin, NABARD atanga pawisa kan hmuh atanga kan siam hi hectare 1200 a ni. Mimal nichina kan sawi angin an neih zat hi chu tunah hian chhiar chiah a la ni lo.
- c) Regional Office neih hi thil tha tak a ni a, neih dan kawng ngaihtuah mek a ni.

SPEAKER : Zawhbelhna zawt turin Pu Lalduhoma.

Pu LALDUHOMA : Pu Speaker, ka han zawh chhan leh ka hriat duh mah mah kha chu mimal plantation kan neih tawh zat hi a ni a. Sorkarin plantation kan han ti ve vak thin te hi chu demonstration atan te chuan a tha a. Amaherawhchu, kei ka ngaihdanah chuan Sawrkar hi chu facilitator a ni mai tur a ni. Mipui zirtirtu, kaihruaitu tur leh tanpuitu tur a ni mai a. Ram kan develop tak tak dawn chuan mipui an pawimawh a, private plantation area kan neih zat leh a kung kan neih zat te, heta tanga chhungkua eizawanna nana hmang thei tur kan neih tawh zat te kha ka hriat chak a nia, chu chu tunah inchhang thei lo mah ila sorkar hian a hriat ngei ngei a ngai a ka hriat avangin an rawn hre zui thei ang em tih kha ka zawhna ni sela. Tin, sorkar in plantation a neihna te pawh hi a theih chuan kum enge maw zat a nih hnuah hian private-ah hian pe chhuak thei zel sela. Private-in enkawl zui thei sela, Tripura te pawh chu chu an tih dan niin ka hria a. Hetiang ngaihtuahna te pawh hi kan hman a hun tawh kan ti em tih te ka zawt duh baw k a.

Tin, Regional Office, Central Rubber Board nei tur hian hma an la e an ti a, kan senso pawh a ngaih ka ring lo a, anmahniin an rawn tih mai tur te pawh a nih ka ring deuh a. Hei hi kan mamawh ve tawh a ni, kan mimal plantation nei ho hian hemi office neih hun hi an nghakhlel khawp mai a. Rubber Board hi an tha khawp mai a, beiseina sang tak pawh kan ram economy ti thang tur hian kan nei a, potential kan nei baw k a. Chuvang chuan thuneitute hnenah hian lekhate ziak mai lo deuh

hian hun remchang, kal pah remchangah te pawh Minister in-charge te pawh hian han lenchilh sela. A theih phei chuan kan House Leader te phei chuan a sawina turah han sawi zauh se chuan a kal chak ka ring a. Chutiang zawng chuan hma an la thei ang em ka han ti a ni.

SPEAKER : A theih ang a chhang turin Minister zahawm tak kan sawm e.

Pu R.LALZIRLIANA, MINISTER : Pu Speaker, midang zawhbelhnate pawh kan beisei a, rubber kan tuipui lo ang reng viauin ka hria. A chhan chu kan thenawm state mai Tripura te pawhin eizawna sum tam tak an lakluhna a ni a. Chuvang chu nge member te pawhin kan tuipui loh vang nge department pawh hi a awngrawp tawh khawp mai a. Amaherawhchu kan Chief Minister zahawm tak mau leh rubber lama tui tak mai kan nei a. A zarah hian kan rubber huan te leh a hmun lo ram leh link road te pawh nasa zawka kan tih theih tun atang hian kan beisei a ni. Tun hma a sorkar hmasa MNF sorkar hmasa kha rubber chinna tur leh thil dang kuhva leh thil dang chinna tur atan, bamboo tan pawh tha em em mai, West Serzawl khawbul atanga kal thla 35/40 Kms zet bamboo link road an lo laih tawh khu a tha em em mai a. An lai zau a, a grade a tha bawk a, khulaiah khuan ram ruak hi a la tam em em mai a. Rubber atan te, rua atan te, kuhva atan te a khulai khu a potential tha a ni a. Khulai khu ram bawh chhuah loh tam tak kan la nei a, khung te khu enkawl zui ila a tha in ka ring a. Chutiang ah chuan mimal hian rubber khu an lo phun hmem em em tawh mai a, kan thawktute hnenah phei chuan tuna sorkar in NABARD atang te leh hetiang a NLUP-a in phun zawng zawng ai hian mimal phun hi a tam ka ring a. A hlawhtling zawk pawh hi an nih ka ring, ti hialin ka sawi a, chutiang chu a ni a. Chuvangin t Regional Rubber Board neih te hi kan duh khawp mai a. Tin, in luah tur te pawh an duh a. Tin, hmun hma neih hi an duh nghe nghe a, heng te pawh hi kan la ngaihtuahpui zel ang a. Kan Chief Minister-in min la bawhzui pui zel turah kan han beisei a ni.

Tiang chuan tunah hian NLUP Phase-I ah khan phuntir kha a ni a, chu chu kum 7 lai a lo vei tawh a, tun financial year chungah hian, kum 7/8 ah hi chuan a thatna lai deuhah hi chuan seng a theih mai a. Chungah te leh NABARD atanga kan pawisa hmuh atang chuan chhungkaw 1000 laiin hmui theih kan nei tawh ang an ti a. A vai phei chuan kung nuai 1 lai a ni tawh mai awm e tih te pawh kan dawng a. Chumi atan chuan khawl leina tur te pawh kan han dil a, kan Chief Minister-in min

lo pe nghal a. Tunah hian chhungkaw 100 bawr vel tan khawl leina turte kan nei tawh a, chutiang chuan kan sorkar hian nasa takin tanpui chu a tum a ni.

Tin, tunah hian rubber 1 hectares a zau ah kung 500 a phun theih a, tichuan department-in a tanpui tawh hi 2758 hectares lai a ni tawh kan tih kha. Chutiangah chuan kung nuai 13 sing 7 sang 9 vel hi private in an phun tawh niin kan ring a. Tin, a vai pheih chuan kung nuai 20 lai hi private-te nena phunah chuan a tling tawhin kan ring nghe nghe a ni. Rubber hi 1 hectare ah hian 1500 vel thar thei a chhut a ni a. Tichuan kung khat ah hian 2 kgs leh 3 kgs te tunah hian hnai an awm nual a. A hnai tan tirhah hian a hlawk lo deuh a, an hnai rei telh telh a, a hlawk telh telh a ni an ti a.

Chung chu tuna han hnai te nen pawh hmanni lawkah te pawh inhmuh khawmna kan nei a, an hlim hle a ni. Heng hi tuna kuhva te leh serthlum te ang hian a tam ve ngai lo a, a chhiatna ber chu thlipui na a lo tlehin amah hi thing ram ve deuh a nih avangin a chhe thin a, chu chauh chu a ni a. Serthlum leh thil dang zawng zawng ai hi chuan tam, hri leh khatiang ang hri hrai lakah a hnu a, Fall army worm tih vel mai mai te kha chuan a hneh dawn lo hrim hrim a. Chuvang chuan kan ram hi a tha a, potential area kan ngah bawh a, mipui hian bawh zel sela kan duh khawp mai. Chutiang chuan 1 hectare-ah nuai 1 leh sing 9 leh sang 5 lai a lei theih dawn a ni, chu chu ka chhanna a ni e.

SPEAKER : Starred Question no.120-na kan la leh ang a. Hei pawh hi mi pathumin an zawt leh dawn a, Pu Vanlalhlana, Pu V.L.Zaithanzama, Pu F.Lalnunmawia. A naupang ber hi kan sawm chhin teh ang, Pu F.Lalnunmawia.

Dr. F. LALNUNMAWIA : Pu Speaker, ka lawm e. Minister zahawm tak Agriculture changtu chhan atan kan zawhnate chu hei hi a ni –

- a) Mizoram mipui ten kan khamkhawp buh hi Mizoram atang hian thar chhuah theih a ni em ?
- b) Mizoram buh thar hi tipung turin sorkarin eng ruahmanna nge a neih ?
- c) Buh thar tipung turin eng anga hmalak nge a nih ?

SPEAKER : Chhang turin Agriculture Minister zahawm tak Pu C. Lalrinsanga kan sawm e.

Pu C. LALRINSANGA, MINISTER : Pu Speaker, member zahawm tak Pu Vanlalhlana, Pu V.L. Zaithanzama leh Dr. F. Lalnunmawia te zawhna Starred Question no. 120-na chhanna chu :

- a) Mizoram mipui ten kan khamkhawp buh hi Mizoram atang hian thar chhuah theih a ngaih a ni.
- b) Mizoram buh thar tipung turin sorkar chuan Centrally Sponsored Scheme (CSS) te leh SEDP hmangin ruahmanna kalpui a tum mek a ni.
- c) Buh thar tipung turin sorkar chuan hetiang hian hma a la dawn a ni -
 - 1) National Food Security Mission (NFSM) hnuai component pakhat-NFSM-Rice kaltlangin hlawk zawka buh thar dan tur Cluster Demonstration te, Buh chinna atana mamawh chi hrang hrangte leh training te hmangin loneitute enkawlina tur ruahmanna a siam.
 - 2) Awlsam zawka khawl hmang thei tura leilet leveling siam that a, khawl vek hmanga buh phun leh seng te, Custom Hiring Centre (CHC) hnuai Tractor leh Power Tiller tha hmanga tha zawka buh chinna buatsaih.

Tin, heng bakah hian Irrigation & Water Resources Department hmanga tuikawng siam belh leh tui khuah bakah khawl thar kan neih Drill Rig, hei hi tunah hian Irrigation Department hian Drill Rig hi kan nei a, Tractor mounted a ni a, pahnih kan nei a. Hei hi leilet hmun hrang hranga tui verh a, chu chu solar water pump-a submersible pump hmanga pump chhuah theih tura ruahman a ni a. Chutiang chuan Drill Rig, lei hnuai tui pump chhuah nana lei hnuai verhna khawl hmanga hmalak te a ni.
- 3) SEDP hnuai leileta siam theih ram leilet siam belh te, tlangram terrace siam belh te, leilet siam rem leh siam that te, a theihna hmun apiangah kum khata buh vawihnih thar te tum a ni.
- 4) Centrally Sponsored Scheme (CSS) hnuai tuikhuah te siama hlawk zawka buh chin tum a ni. Khang kha ka chhanna a ni e. Pu Speaker, ka lawm e.

SPEAKER : Zawhbelhna zawt turin member zahawm tak Pu Lalrinsanga Ralte i lo sawm ang.

Pu LALRINSANGA RALTE : Pu Speaker, ka zawhbelhna chu hei hi a ni - Bilkhawthlir a SDAO hun rei tak awm tawh lo hi min dah sak thei dawn em ? Min dah sak thei dawn ni ta se, engtik hunah nge dah a nih theih ang tih ka zawh belh e.

SPEAKER : Kan va inkar ngun alh alh ve ti raw! A dang a awm tawh lo maw ? Pu Lalrindika Ralte, member zahawm tak i lo sawm ang.

Pu LALRINDIKA RALTE : Pu Speaker, ka lawm e. Ka zawhbelhna chu – Wheat te hi a hum in a procure theih a. Buh hi a hum a wheat kan lak ang hian tih ve dan a awm ang em tih hi Agriculture lam atang hian min lo zawhchhuah sak thei ang em tih ka zawt duh a ni e.

SPEAKER : Chhang turin a changtu Minister zahawm tak Pu C. Lalrinsanga kan sawm leh e. (Zawhna hun a tawp a, chhan zawh tir law law ang aw)

Pu C.LALRINSANGA, MINISTER : Pu Speaker, Serlui bialtu zahawm tak rawn zawhbelhna kha a karkik ang reng hle mai a. Amaherawhchu, SDAO Bilkhawthlira dah a rawn rawt deuh ngang ngang a, tunah hian kan dah sak ta a ni tih kan puansak ang e.

Tichuan, member zahawm tak Pu Rindika Ralte zawhna kha-wheat hi kan ramah hian chin ve theih pawh niin a lang a. Chin chhin pawh hi tum ta ila, kan thar ngei te pawh hi atta-ah han her ta ila a tha ang e te pawh tihna kan nei a. Amaherawhchu, buhum lak luh theih dan kawng hi chu, a rawn zawh danah khan min lo survey sak thei ang em tih a ni bawk a, kan lo survey sak ang e, Pu Speaker.

SPEAKER : Aw le, zawhna leh chhanna hun a tawp a. Health Minister zahawm takin kan tan Medical Check-up kha a buatsaih a. Session chhunga helai hmuna tih theih loh a awm pawhin Civil Hospital-ah Doctor-te an inhuam reng e tih a rawn sawi a, a lawmawm hle mai.

Tunah chuan kan dan 27(1)-na angin Private member tena business kan neih ni a ni a. Vawiin ni 21.6.2019 ami tur hi ni 17.6.2019, 1:00 PM khan ballot a ni a. Chuta an pawhchhuah, 12 thlanchhuah a ni a. A indawt dan chu Bulletin Part-II – ah khan kan rawn dah tawh a, ni 18.6.2019 khan. Tichuan, tunah pakhatna kan la leh ang a, chu chu – “MNF Ministry-in hun reilote chhunga Zoram dung leh vanga

kawng chhe tak hun reilote chhunga a siamtha mai hi lawmawm kan ti hle”, tih a ni a. Resolution neitu chu Pu Zothantluanga a ni a, member zahawm tak tunah move turin kan sawm e.

Pu ZOTHANTLUANGA : Pu Speaker, ka lawm e. MNF party hian inkalpawhna kawngpui a ngai pawimawh hle a. MNF sorkar hmasaah pawh khan kawng tam tak, kawng thar la in, kawngpui a theih ang tawk siam thain hna a thawk thin a. Kan sorkar a lo tlaka opposition-a kan awm chhung pawhin theihtawpa kawng tha kan neihna turin a bei thin a. Vanduaithlak takin kan sorkar kalta hun chhungah khan Mizoramah kawng a chhe em em a, fur-ah ringawt a chhe lo a, thal-ah pawh a chhe deuh ngar ngar a. Party angin kawng tha kan neihna turin kan hotuten sorkar an nawr a, a changin kawng kan zawh a, a changin total bandh kan siam a. Chutiang chuan hma kan la reng thin a ni a.

Tin, Assembly-a kan member awm ang angte pawhin Assembly chhungah kawng tha kan neihna turin theihtawp an chhuah a. 21st November, 2014-ah khan Assembly House-ah khatih laia kan MLA zahawm tak Dr. K. Beichhua chuan Private Resolution-in ‘Mizoram chhunga inkalpawhna kawngpui leh lei chhe ta lutuk hi tun aia chak zawkin siamthat hna thawh ni rawh se’ tih a pulut a. Chutiang khawpa kawng a chhiat lai leh lei chim te hial a awm thin lai a pawhin ruling lamin ngaih pawimawh sak lo in an beng an chhut ngawng san a. Tichuan, kawng siam that ngaia an hriat loh mai bakah lei chungchangah phei chuan tihngaihna dang a awm lo. Kan leite hi kan en a nih pawhin AC vuah a nih ngawt loh chuan tih that dang a awm lo e tiin Assembly House-ah lehlamte khan an sawi khum a nih kha, kan la hria ang a.

Tin, 16th October, 2015-ah, chutih laia kan MLA Pu Vanlalzawma’n Resolution siam lehin ‘Mipuiten inkalpawhna kawngpui chhia avanga harsatna kan tawh mek sut kian thuai a nih theihna turin chak leh zualin hma lak ni rawh se’ a tih pawh chu chutih laia ruling MLA-te chuan pawm lo in, hnawl sak in kan kawngpui a tha tawk an tih khum a nih kha, kan la hre reng ang a.

Tin, nikum 16th March, 2018-ah Pu K. Sangthuama, chutih laia kan MLA zahawm takin ‘Hun rei tak atanga kawng leh lei chhia avanga harsatna kan tawh su kiang turin nasa leh zuala hma lak ni rawh se’ a tih pawh chu siam danglamin hun

rei tak atanga kawng leh lei chhia avanga harsatna kan tawh su kiang tura sorkar hmalakna hi kan ring tawh tiin an passed sak a nih kha.

Tichuan, kawng chhiat zia hi kan sawi loh chuan vawiina kan Chief Minister zahawm tak leh PWD Minister ni bawkin chak taka hma a lak chungchang hi kan hre fiah thiam dawn lo a. Chuvangin sorkar hmasa hun laia kawng chhiat zia-te, lei chim nasat ziate avanga kalkawng that loh avanga kan nitin mamawh buhfaita, gas chungchanga harsatna kan tawh thinte pawh kha hetih lai ngaihtuah hian khang hun kha kan hun thim ber lai a ni lawm ni a tih theihin ka hria a. A fur a thalin kan inkalpawhna kawngpui ber a chhiat avangin mipuiten harsatna namenlo kan tawh thin a. Kha tah khan sorkarin a ngaihtuah a kawng siam that a tum aiin mipuite kan hnatlang zawk thin a ni tihte kan la hre vekin ka ring a.

Tin, Mizo mipuite hi hnatlang hnam kan ni a, chuvang chuan hnatlanga kawng siam tha tur kan nih thute chutih laia roreltuten an sawi thin te pawh kan la hre reng a. Khata a mawhphurtu ber department-te pawhin a kawng siam that aia mipui hnatlangte hnena an ei tur thingpui lo lum sak ve te kha an ti ta mai mai zawk a ni tih kha kan la hre rengin ka ring a.

Chuvang chuan Pu Speaker, kan kawng chhiat zia kha vawiinah hian tumah hrilh nawn kan ngaiin ka hre lo a, kan la hre vekin ka ring. Kan kawng a chhiat em em avang khan mipuiten harsatna kan tawh a, damloten khawpui an pan thei lo a, a chang chuan JCB-ten kan in la a ni a.

Tin, heng kan kawng chhiat chhan hi a hun laia kan sorkar-in an sawi thin chu pawisa awm loh vang te, contractor-te an chhuanlam avang te, Mizo anga tlawmngai leh inpe a thawktu contractor kan neih tlem vang te kha niin a lang a. Mizo fate zingah contractor lian pui pui, thiamna leh machineries nei tha tak tak kan neih ve laia hnam dang contractor an han hmang zel te pawh kha a chhan leh vang niin a langin ka hria a. Contractor pakhat chungchangah phei chuan kan la hriat reng kha. Tu emawni phei chuan share 21.6% a la a ni tihte pawh kan la hriat reng kha. Chuvang chuan kan kawng chhiat chhanah hian hnam dangte duhsakna leh hnung inhih tawna a thleng a ni lawm ni a tih theih in ka hria.

Tin, lei chim avanga nunna hial chan kan awm tum pawh khan a thawktu contractor te hrem aiin an thawh chhonzawm tir leh mai a. Tin, a chhiat chhanah

khan a contractor leh mawhphurtute dem lo va mipui zawk, a kilhna lo ru ah te leh thil chi hrang hrangah chhuanlam an siam a, khang kha kan la hre vek a. Kawng a chhiat zia chu Mamit khualzin phur Sumo driver pakhatin, ‘Mamit kawng chhe lutuk, ka chau,’ tih leh, ‘Lalpa, eiruk theihna lakah min veng ang che,’ tih a tar pawh hrethiam lovin an mit a timim deuh a ni ang chu, a permit cancel-ah te an vau a, a thil tar pawh kha an pawh thlak sak tih te chu kan la hre theuhin ka ring a. Chuvang chuan, kawng chhiat zia kha kan sawi lo thei lo a ni a. Motor a tang a, kan innam chhuak; tin, kawng thenkhatah phei chuan diak ah kan supply phur motor lian te a tlu a, kawng a pin chang a tam bawk a. Chuvang chuan, motor nam luai luai te, driver ten passenger atan nunau leh tar te an duh lo va, an duh ber chu thalai leh pavalai, passenger-ah an duh ber a nih kha kan la hre rengin ka ring a. Eng atan nge chutiang mi te chu an duh kan tih chuan, an motor a tang thin a, nam chhuah pui tur khan hmeichhia leh nunau ai chuan anni kha an tha zawk a ni tih kan hria a. Tin, Bairabi -Kolasib kan supply kalkawng ber a chhia a, truck driver te an nuar a, an kal thei lo va, tichuan kan supply in harsatna a tawk a.

Tin, Lunglei -Tlabung kawngte phei chu nasa takin a chhia a, hun rei tak kal theih loh a ni tih te kha kan la hriain ka ring a. Khang zawng zawng han ngaihtuah khan vawiinah kan Chief Minister, PWD Minister ni bawkin sorkarna kan han lak veleh khan, 15. Dec. 2018-ah sorkar an siam chauh a, Christmas boruak vel avangin hna a thawh mai theih lo va, Kumthar lamah thawh tan mipui ten kan beisei laiin, kumthar pawh nghak zo lovin Christmas ruai kan theh zo chauh a, ni 27 ah chuan PWD officer-te, Engineer-te hruaiin National Highway-54, Bawngkawn, Sairang. Kawnpui Road a zuk en nghal a. Tichuan, Enginner te nen a hmunah thil awm dan engkim a enpui hnuah Chief Enginner te sawipuiin, kawng chhia siam thatna tur pawisa ruahman turin a ti a ni tih kan hria a. Tichuan, Bawngpui insi ang maiin, a hma daiha lo inbuatsaih lawk sorkar veleh a Mizoram kawng chhe lutuk siam tha tura a inbuatsaih lawk avang khan hma chak taka lak a ni a.

Tichuan, National Highway te chu kan hre vek a, central ta a ni a, a thawhna tur sum leh pai pawh central tum a ni. Nimahsela, kawng a chhiat miau avangin a hmangtu Mizo mipuite kan nih tlat si avangin, central sum lo kal nghak hman lovin PWD-in an pawisa kawng siamna tura an mamawh ang ang te kan CM-in a remchang chang pawt khawmin National Highway te pawh hna an thawk nghal a.

Tin, State Highway, state road kawng hrang hrang kan thawk nghal bawk a ni tih kan hria a.

Tin, kan sorkar tharin ama budget a la ruahman lo chung pawhin sorkar hmasa hman bang quarter hnuhnung ber January – March, 2019-a hman tur la awm apiang bakah NEDP atana sum ruahman la hman loh lakhawmin, PWD-in kawng an siamthatna turin Finance Department chuan a sanction ta zung zung mai a. Tichuan, ram pum route in a state kawng bik siam nan cheng vaibelchhe 47 lai, National Highway bik Silchar kawng te, Aizawl atanga Seling-Serchhip, Seling-Champhai leh Lunglei-Lawngtlai kawng siam that nan cheng vaibelchhe 25 ruahman a ni leh te, kawng repair-na atana khawl Vibratory Road Roller, a te chi 20 lai leh alkatra chhumna lak sawn harsa lo chi 18 lai leina turin cheng nuai 415 lai an pe a. Tichuan, an han thawk ta char char a, a vai hian vaibelchhe 76 lai PWD ten National Highway leh state roads pawimawh te leh kawng hrang hrang thawhna tur atan an han nei hi budget pangngai a pek belh bak kawng siamthat na tur liau liau a ni a. Tichuan heng pawisa hman hian chak takin a changtu Ministerin a ngaipawimawh bawk a, mut mawh hnar mawhah a neih bawk a. Chumi a nih avang chuan department lam pawh an tang a. Hna nasa takin an thawk a, hma chak takin an la a, hun reilo te chhung January atanga May thla thleng hian PWD hian hetiang hian kawng an siamtha hman a ni. Kawng thar siam, formation cutting-ah hian 236 km leh 500 metre an siam hman a. Tin, kawng lungchhuat phah water bound macadam an tih WBM an tih hi 331 km an siam hman a.

Tin, blacktop thar 225 km an siam hman a. Blacktop hlui thuam that an ti a, blacktop tawh, nimahsela chhe leh tawh si, khami siamthat leh na atan khan resurfacing ah khan 403 km leh 350 mtrs siam hman a ni a. pot hole and patch repair an ti a, chu chu a chhe zual lai, a khuar lai hnawh 522 km 450 mtrs chhungah pot hole leh patch repair kha an thawk zo hman a ni a. Chu mai bakah chuan cement concrete leh shell fill concrete kha, concrete-a kawng chhun a khatianga kawng phah kha 19 km lai an zo hman bawk a ni. Tichuan chu chu January atanga May, 2019 chhunga siam a ni a. Vawiinah hian ni 21 kan lo kai leh ta a, Aizawl khawpui chhung kan en chuan henga an sawi bakah hian internal road kan kawngpui hmun tam takah siam that a ni a.

Tin, khaw hrang hrang ami te, veng hrang hrang ami te kan inkalpawhna siam that a lo ni mek a. Tin, thingtlang lama kan khawpui deuh te kan zawh hian kan khuaah pawh, kan vengah pawh an la thawk mek a ni, blacktop hna an thawk a, kan kawng kan internal road chhe tawh tak te hi siam that mek a ni tih te kan hre zel a.

A bik takin Pu Speaker, keini Aizawl West I ah pawh khuan kawngpui a tha a, tun hun reilote chhung hian kan kalkawng Aizawl West I area chhunga veng hrang hrang te internal road a tha deuh vek tawh a. Tlan nuam takin kan awm a, tunah hian mipuite kan hlim hlein ka hria a, khung Luangmualah te pawh khuan a chhe lai an la siam tha mek reng a ni a. PWD-in hna an thawh tawh sa kan han chhiar chhuah kilometer zat aia tam kha tunah hian an thawk leh mek a ni tih kan hriat ka duh bawk a. Sorkar hmasa hunlaia hnathawk thei lova kan ram kawng, kan inkalpawhna kawng zawng zawng a chhia a.

Mipui kan phun luai luai a, kan tuar kan tih kha mi tam takin an ngaihdan ah chuan kawngpui hmang hian pawisa an lo siam thin a ni ang a tih rinhlelhna tam tak a lo awm ta a. Vawiiinah erawh chuan a tak taka ngaihtuah, opposition kan nih lai pawha kan sorkar veleh a kan thawh nghal tur kan tih nghal tur chu Mizorama kawng chhe lutuk siam that a ni ang tih kan Chief Minister, PWD Minister ni bawk in a lo inbuaitsaihna te, a lo ruahman lawkna te a tir te atanga tihhlawhtlin a ni hi a ni.

PWD Engineer te hi sorkar hmasa lamah kha chuan sawisel in nuihza siam nan te pawh an hmang fo thin. Nimahsela engatinge tun thla 5 lek chhung hian khang engineer te tho hmang khan heti khawpa hna tha an thawh theih kan tih chuan a enkawltute inpekna, a enkawltute tih tak takna kha engineer te pawh hian an lo zawm thin a ni tih hi a hmuh theihin ka hria a. Foreign atangin engineer kan chah lut thar lo va, hmun dang atangin engineer te kan ram kawng tha siamna tur hian kan lak belh pawh a ni lo a, a hma ami te ngei tho, a hma a chaklo taka hna thawk thinte tho khan tih tak taka titu Chief Minister inpekna an hriat pui a.

Chumi avang chuan anni pawhin taima takin inpe takin thahnemngai takin hna an thawk a. Heng hun chhung hian kan engineer te hi an fakawm khawp mai a. Zing atanga thim thlengin an thawk a ni lawm ni, an hnathawhna tur hmanrua pek a, an thawh theihna tur sum hi siam a ngaih ve tlat avangin sum kan pek bawk a. Machinery an mamawh te lei sak an nih chuan kan engineer te hi an nep bik lo ve,

India ramah hian a tha ber te zing ami an lo ni thei a ni tih han hmuh hian a lawmawm hlein ka hria a. Tunah hian PWD te hian hei ai hian field staff ah te hian Pu Speaker, indaih pheih se chuan hei aia nasa zawk, hei aia chak zawk hian an la thawk thei dawn a ni tih hi a hmuh theihin ka hria a. SDO te, AE-te hi tunah hian 32 lai post hnawkhah lohinh a awm a. Tin, SDO pakhat hnuaiah hian an kalphung pangngai thinah chuan JE (Junior Engineer) 3 an awm thin a. Tichuan hna kha an insem thin a ni a. Tunah hian JE 146 post ruak a awm a.

Division 23-ah pheih chuan SDO 1, J.E. 1 an awm a ni. Chutiang khawp chuan an indaih lo a, S.A hi post 61 lai fill-up ngai a awm a. Kawng tha kan neih zel duh a, kawng tha zawk mipuiten an chhawr tur, hmasawmna atan hian kawng tha hi a pawimawh berte zing ami a ni a, kan hotupa ber kan Chief Minister-in a ngai pawimawh bawk si a. Chuvangin, heng post vacant 50% tal hi chu hnawh khah sak thei ila chuan hei ai hian kan hna a chak (SPEAKER : I zo thei dawn tawh em? Darkar chanve a ni dawn der tawh a nia) zawk ang tih ka ring a, ka beisei a. Pu Speaker, MNF sorkar hun reilote chhunga Zoram dung leh vanga kawng chhe tak a siam tha mai hi lawmawm kan ti hle a ni tih hi ka rawn pharh e. Ka lawm e.

SPEAKER : A pawimawh si a le, sawi tur a tam a niang. Ti khan sawiho kan tan leh tawh ang a, minute eng zat nge kan inpek leh ang ? Dar 4 hi pel lo ila, a sawi tur pawhin dar 4 vela wind-up te nen zo hman turin inbuatsaih ta ila a tha lo maw aw, dar 4 hmaa kan zawh chuan a dang lak leh a ngai ang. A pahnihna kan ti chho char char ang a, mahse kha kha a ngai a nih avangin nangma copy-ah a kal dawn a ni, nangma ballot-ah khan a kal ang, kan hman loh chuan. Dar 4 chu kan thlen a ngai a ni, kan thlen hman loha kan zawh chuan a kal zel ang a, Pu Hlana ballot-ah. Minute eng zat nge kan inpek ang le? Minute 10 kha kan tihdan deuh a nih kha maw. Pu Duha tihdan khan kan ham strict vak lo mai ang a. Tunge sawi hmasa ang le? Pu Lalduhoma, member zahawm tak ka sawm e.

Pu LALDUHOMA : Pu Speaker, ka lawm e. Mizoram-a mel za bial zela kan kawng neih thui dan, kan road density hi mel za bialah km 42.45 a ni a, national-ah erawh hi chuan mel za bialah km 166 chawh rualin an nei tawh a. Chuvang chuan khawvel dang chu sawi lovin, India ram nena kan

intehkhin pawhin kan la hniam hle mai a, hmabak a la ko a, tih tur kan la ngah hle a ni tih hi a lang nghal a. Tin, kan kawng neih sei zawng hi km 8948 a ni a, leilawn hi 139 kan nei a, chung zingah chuan permanent bridge hi 44, bailey bridge leh timber-a siam ang chi hi 32 kan nei a, heng hi thlak ngai vek an ni a. Tichuan, sorkar hmasa khan NEDP atangin nikumah khan cheng nuai 22,494 kawng laih nan hian a lo dah a, chung chu a hmang zo hman lo nual a. Tin, PWD sum ni lo pawh NEDP sum chuang bang eng emaw zat kha kan sorkar thar hian pawt khawmin sorkar hmasa ten a hman dan tur an siam ang ni lemlo te pawha han hmangin kawng siam nan tam tak an hmang a, an han ti bawrh bawrh a, hmanhmawh takin a lawmawm khawp mai a, a tha tho a. Amaherawhchu, kawng leh lamah ruahmanna lo awm tawh sa tam tak pawh darh a nih hian, hmun dangah mipuite hian kan tuar tho a, thil tha tih kan duh rual rual hian hming that, thang that lak kan duh luatah hian, leh lama tawrhna te pawh hi a thleng thei tho tih chu ngaihtuah tel deuh a thain ka hria. Tichuan, he hun reilote chung hian sorkar hmasa sum bang hmanga kawng chhia kan han siamnaah hian a lawmawm kan ti a. Amaherawhchu, resolution-a “Zoram dung leh vangah” han tih em em hi chu a la hma deuh em aw! Kawng km 8948 kan neihah hian tuna kan siamthat hi chu tlemte a la ni a, Zoram dung leh vang a la huaplo hle tih chu mit-in kan hmu vekin ka ring a.

Kan sorkar thar kan tehna tak tak tur chu he kan budget thar atang hian eng angin nge kawngah hian hmasawanna min thlen dawn tih hi a la ni rih a. Chuvang chuan, sorkar hmasa sum hman bang pawh khawm in hna eng emaw zat kan han thawk a, lawmthu han sawi nghal mai hi, a hemi chinah hian lawmthu i sawi ang kan ti a nih chuan, kan Bible-in engkimah lawmthu sawi turin min ti a, a tha tho mai a, ka pawm a. Amaherawhchu, a la hma deuh em, a tak taka kan hmalak dan tur hi chu a la lang rih lo. Tan a ngai hle dawn a, chutah chuan keini pawhin sorkar hi kan thlawp tlat a ni tih ka sawi duh phawt a.

Tin, Niti Aayog-ah hian vision 20-30 kha thehluh niin ka hria, sorkar hmasa hun kha a ni maithei e, sorkar hian kha kha a kalpui zel turah ka han ngai thla ngawt a. Khami ang khan kan kal tlangpui turah lo ngai ta ila, wawiin hi lawmthu han sawi hrim hrim kha chu han tih sei vak ngaihna

pawh a awm lo va, kawng tha kan neih theih dan tur sawihona hun remchangah te ngai ta ila a thain ka hria a. Kawng kan neih thatna turah hian keini ang Engineer pawh ni ve miah lo hian ngaihdan hi kan ngah ve mai a, churang chuan common sense hmangin kan kawng hi i siam tha teh ang u, tih ka rawt duh a. Pakhatnaah chuan kawng kual cut tur hi a la tam em em mai a ni, hemi ko hi chu han la deuh se aw, thlang lamah culvert han dawh belh sela aw han tih tur ang chi kal paha hmuh theih, ngaih mawhawm tak tak hi a tam mai a.

Heng hian motor khalh pawh a ti hrehawm a, kawng kawi cut tur ang chi hi kan la ngah khawp mai a. Hetiang chi hi a tirah hian ti nghal law law thei ila, siam zawh tawh hnu, a sira thingte kan phun hnua kan han ti leh thin hi chu senso te hi a tam phah a, mipui tan a buaithlak baw a. Kan kal zelna turah kan hriatna naran, common sense hi apply thin ila. Tichuan kan kawng te tlan hun chung a lo nuam ang a, a tlan hun chhung a lo tawi sawt baw ang a tih hi kan rawt duh a.

Tin, kawngkam thingphun hi a tir atang khan lo ti ta ila, kawng thlang lam leh kawng chhak lam feet eng emaw zat hi entirnan, 100 feet ve ve emaw te hi kawng reserve ang hian lo kalpui ila, kan kawng hi chhak lam leh thlang lam hi ngawin lo siam vek ta ila chuan kawng ba sah te pawh hi a ngai fo lo ang a. Tichuan, nungcha tan pawh a tha ang a, thei leh pangpar mawite in a khat ang a. hei hi chu a la tlai lo ka ti a, thangthar zelin kan ram hi an la luah dawn a. Kan kawngpui kan rin reng tur na na na hi chu kawngpui kam reserve hi chak deuha kalpui hi thain ka hre baw a.

Tin, kan kawng tichhetu ber pakhat chu kan drain hi a ni a. Hei hi a outsource theih lawm ni ka ti a ni. Khawpuiah te, entirnan Vaivakawn leh Temple inkara normal maintenance hi leimin vel chu tel loin, hemi kawng hi tunge enkawl duh tiin han advertise ta ila, tender ang ziazang deuh khan, YMA-in kumkhatah chuti zatin kan chhang e, MUP-in chuti zatin kan chhang e rawn ti ta se, sorkar enkawltir aiin kan senso a tlem zawk ka ring a. Kan NGO ten sum lakluh nan an lo hmang baw ang a. Inremsiam ta ila, hemi leh hemi inkar ti khan then ta thliah ila. Chu chu a ngam ngam khan rawn chhang ta se, private pawhin chhungkua pawhin an rawn chhang thei ang a. Tiang chuan outsource theih side drain enkawl hma hi

tam tak kan ka ring a. Kawng tha man tlawm zawka kan neih theihna a ni ang em tih te ka rawt duh bawka a.

Tin, Defect Liability Period hi a awm deuh zel a. PMGSY-ah te chuan kum 5 niin ka hria a. Heng highway-ah te hian kum 3-5 vel te a lo ni a. Hei hi a taka kan kenkawh a va tul em ve aw ka ti a. Kawng thar a lo awm a, reilote ah a lo khuar leh a, a lo chhe leh a. A contractor-in final bill a la tawh a, a haw vang vang mai a, mawh a phur zui tawh lo a. Mawh an phurh zui loh vang khan an hna quality khan a chhiat phah zel mai a. Tun atang hi chuan a engah pawh hian liability period hi fel takin siam ila, an bill-ah hren chin nei bawka ila. Chutah a lo chhia a, an mahni defect avanga chhia a nih na na chuan, a contractor-te kha thawhtir leh zat zat ila chuan an fimkhur ka ring a. Kawng tha kan neih hi ka ring a ni.

Tin, khuar leh khawk te, lungrem chim te, lei chim tih te kan hre tam a. Heng hi liability period kan kenkawh loh vang niin ka hria a. Zopa taka ka ngaihtuahin khuar a lo awm a, hnawhkhah lohin, siam lo in rei tak kan han dah a, a zual zel a zual zel a. Heng hi ti vat vat thei ila kawng tha kan neih ka ring a ni.

Tin, Quality Control Division hi kan nei a, kan dah tawl deuh reng mai thin a. Hemi te hi tangkai takin hman tawh ila. Cement quality te, rod te, bitumen te, eng hnaah pawh building-ah a nih pawhin surprise check-te hi nei tam ta ila. Minister-te hian hrilhlaw lo hian han ti thut ta se. Kawngtha neih hi kei ka duh tak zet zet a. Keini lam te pawh hi min han sawm ve ula. Kan Medical College duh duh huna min rawn check a, inring reng a awn a ngai ang sawn siam ve ila kawng hi a that deuh kan ring a. Chungte pawh chu ka kal zelna turah hian ngaihtuah ta ila a that ka ring a. Inthlan dawna kawng kan han siam tha thut te pawh hi tih tawh loh hi a va tha em aw ka ti a. Inthlan dawn kumah kawng kan han repair sup sup mai a, a hma lama ti duh mang si lo. Hetiang chi hi a mawi pawh a mawi lo ka ti a.

Tin, contractor ngai ho hi kan chhawr rei ta khawpin ka hria a. Kan inkawm ngeih lutuk, hmelhriat tha ta lutuk deuh em aw ka ti a. Kan rama contractor lian thawktu te hi company ngai hi kan ring rei tawh khawp mai.

Chuvangin min zuam lo deuh turte pawh hi thlang ve ta ila. A ngai kan ti leh a nih pawhin, 'he sorkar hi chu a zuamawm ta hauh lo mai a' an tih tur hian kal chho thei hram hram ila tih hi ka duhdan a ni a. Sum tlem avangin kan kawng hi a chhia a

ni ber lo. Sum hi kawng laih nan, kawng siam nan a kal tam loh vang a ni. Eiral leh hlepruk a tam avanga chhia kan ni tih hi thudik a ni.

Tin, lumpsum tender ka ti ve mai a, ka phuahchawp ve mai mai a. Peg khen hi, kawi khuaah emaw kawng kan lai dawn a, peg hi kheng ta ila, heti chin hi ₹ 50000, heti chin hi ₹ 1,00000 ti ta ila, a khaw mipui hian number pawhin pawt ta se la, lai ve ta se la. Contractor pakhatin bill a lak zat hi chuan khaw pakhat hi chu a siam tha thei ang. An ration lakna leh an fate fee a tum theiin ka ring. Kha kha an laih zawh chuan an han teh ang a, a kawng chhuat zau zawng kha a tlin chuan a tawk mai a, a kawng ko kha teh a ngai tawh lo reng reng a. Pawisa kha a kal ral lo bawk a, mipui kutah a lut bawk a, a quality a tha bawk a. Hetiang system-te pawh hi introduce theih ni se a tha hlein ka ring bawk a.

Tin, kan khawl hman ho hi, tender an chhanin contractor-in Engineer chu zat ka nei, khawl chutiang khatiang zat ka nei tih an thehlut vek a ni. Kawng an han laih chiah hian chutiang chu an hmang em tih hi a hmunah kan endik fo a tha ka ti. Bulldozer 3 ka nei ti ta se la, 1 chauh rawn thawh chhuak ta se, a hun tiamah khan a hna kha a zo dawn lo reng reng a, chu chu a chiang reng a ni. Chuvangin, khawl tha ka nei a tih ang zat ngei hi hnathawh nan an chhawpchhuak em ? Paper-a inziak ang hi Engineer-te hi an nei ngei em tih hi uluk takin check ila chuan danglamna nasa tak kan nei ngeiin ka ring tlat a ni.

Tin, kan la neih ngai loh Computerised Hot Mix Plan te, Sensor Paver te, Modern Crusher-te, kawng kan han blacktop-a a muk lam, a density tehna te, hi kan la neih ngai loh khawl tha te pawh hi lei ve ta ila, nei ve ila a that hi ka ring khawp mai a. Tichuan, kan kawng blacktop te pawh a tehna kan neih chuan a tling lo kha chu kan pawmlo mai ang a, bill-te kan hren sak ang a. Tichuan, kawng tha kan mai dawn a ni.

Tin, Revised Estimate awm reng mai hi tih bo theih ni la ka van duh em! A tirah hetiang zat hian zawh theih tih na na na a tir atang hian original estimate-a zawh tum lo sa, revise chakna thinlung nen hian hna hi kan thawk deuh em aw, ka ti a. Hei hi tawp thei tawh sela. Tin, target date of completion a awm vek a, chumi chhung ngei chuan hna hi an zo a ni tih hi ensure a tha ka ti a. Revised estimate tibo tur leh a zawh hun tur sawn hlat tibo tur hian tan i la teh ang u. Tichuan mipuiin kan

development hi an chhawr hma thei bawk ang a; sum kan save ang a, development a kal chak dawn a ni.

Tichuan IRC 37 design code kan tih ang te hi kan hmang ngam ve tawh ang em le ? Kum sawm atanga kum sawmpanga daih tura duan periodical repair-te a keng tel a. Heng IRC 37 design ang te hian kan kawng pawimawh zualte hi chu han tichhin ve ta ila. Kum 4/5, kum 2/3-a chhe tur ni lo, a tlem berah kum 15 daih tur kawng te hi chu han nei thei ta ila tuna sorkar hian in tihthat chuan a lehpek te pawh a tha zel tawhin ka ring a. Chutiang tur chuan hma hi lak theih ni se tih te hi kei thahnem ka ngai khawp mai a.

A tawp ber naah kan thleng tawh ang e. Pu Speaker, Engineering Procurement, Construction (EPC) system an tih ang chi Design and Build (DB) system an tih te pawh hi kan ramah hian tichhin ve tawh ila. Khawvel sorkar tam takin an ti tawh a. India ramah Railway Ministry te pawhin an ti tawh a. Chutah chuan hna kha an han tender ta a. A chhangtu khan a estimate a rawn siam a. A hmanraw hman tur, a quality, a specification zawng zawng kha an rawn ti a. Hetiang hun chung hian, cheng hetiang zat seng hian, hetiang quality hian kan zo thei ang tiin, anmahni khan an ngamna an rawn chhang ta a. Tichuan, khami te khan an han thawk ta a. An tih ang chiah khan an thawk ta a. Nitina va supervise a ngai tawh lo va, estimate revise theih a ni tawh lo va, delay a awm thei tawh bawk lo va. Sorkar kha a hahdam em em mai a ni. Amaherawhchu, empanelled firm sorkarin a neihsa te chauh kha sorkarin ti lo se, open competitive bidding a awm theih nan open tender tak tak khan, duhsak bik an awm theih loh nan siam ta ila. Chutiang chuan han ti ta sela. Tunah hi chuan PWD te pawhin estimate anmahniin an siam a, anmahnin an thawk a. Chawm bawk, hawp bawk a ni a, a dik tak chuan hei hi. Competition a awm lo reng reng a, a thalo a ni, departmental-a hna kan han thawk te hi. A estimate engkim, a DPR siamtuin an thawk zui leh ta ang chi te hi a fel lo hrim hrim a system hi EPC, DB system ang hian kal ila a that ka ring a. Minister zahawm tak Pu Robert Romawia te an awm a, a lawmawm ka ti a. MLA leh Minister fel tak tak, kum lama naupang kan ngah a, a lawmawm ka ti a. Hetiang hian ngaihtuahna te pawh hi seng ho ta ila, thil tha tih tum hian; kan kawng hi a that theihna turin hma la ho ila. Tuna kan thawh chin tawiteah pawh hian lawmthu sawina resolution hi han pawmin, han pass phawt mai ila. A bak lehzelah pawh a that zel beisei in, chu beisei nen chuan he resolution hi ka han thlawp a ni e. Ka lawm e.

Pu R. LALZIRLIANA, MINISTER : Pu Speaker, ka lawm e. Vawiina private member resolution kan sawinaah hian, a tirah kha chuan a department concerned, a neitute an thu miahlo mai a, a fello ka ti a. Helai hi na deuh taka han sawi chhuah ka tum a. Amaherawhchu, tunah chuan an hotupa ber leh a thiante an lo kal tak avangin sawi ngai pawh a ni chiah ta lo va. Helaia kan thusawi hian Minister-te kan awm hi a tha a, amaherawhchu, engkim kan lo chhinchhiah seng lo va, kan department concerned officer-te an awm hi a pawimawh em em a ni. Nidangah pawh sorkar hnathawk hian an ngai pawimawh tawh tur a ni a, helaiah ram hruaitu lu ber ber te awmkhawmna leh an thusawinaah hian an awm tur a ni tih hi khauh deuh zawka kan tih hi a tha hlein ka hria. Chu chu a hmasain ka han sawi a ni.

Member zahawm tak Pu Zothantluanga Resolution –

“MNF Ministry-in hun reilote chhunga Zoram dung leh vanga kawng chhe tak a siam tha mai hi lawmawm kan ti hle” tih hi thudik tak a ni a. A lawmawm khawp mai a. Hmanni deuhva hmanhmawh taka kan bial lam pana kan tlan chho te, Selinh kan thlen in kan Ministry hmasa kha chu ni sela chuan tunah hian Tuirial kamah kan la awm ang a kan ti a, chungah chuan a lawmawm ka ti khawp mai a. Chutiang chu tipuitling thei turin inthlanah khan kan Pathian thuah, ‘roreltute hi Pathian ruat an ni,’ tih kan hmu a. Pathian mite, kohhran mite an tawngtai a. An tawngtai rahchhuah chu vawiinah Pu Zoramthanga kaihhruai ministry hi a lo piang ta a ni. Hei hi chu tumahin kan hnial thei lovang. Kan tawngtaina ah khan party rilru pu deuhthe chuan keimahni mimal leh kan pawl sorkarna siam turin kan dil thei a, a thiang tho. Amaherawhchu, kan dil ang zawng zawng hian Pathianin min chhang lova. Ama duh dan leh a remruat ang zelin min chhang thin a ni. Chumi chu kohhran mite leh party mite pawhin vawiin a kan thlanhhuahte hi Pathian mi ruat an ni. Opposition ami leh ruling amite pawh hi Pathian miruat an ni tih hi kan pawm tlan a thain ka hria a ni. Chutiang chuan kawng chhia hmu thei tak, mitvar tak Chief Minister kan han nei ta a. Kan han sorkar a, kan kutpui krismas kan han hmang zo va, hahchawl hman lovin, a tuk lawkah PWD hotu lian ber ber hruaiin hmun hla takah kawng chhiat zia enin a’n kal nghal a, a ropui hleiin ka hria a. Khangte kha kan tawngtai rah chhuah chu a lo thleng nghal ta a ni tih a hriatin ka hria. Tuna ka hmaa thu sawitu Opposition Group Leader thusawi kha a tha a, khang kha hotu ten, Department lam amite pawhin an rawn ngaithla hmante pawh kha tha ka ti a.

Engineer ho, technical mi hi layman ho ngaihdan ang hi chuan an rilru hi thlak a har khawp mai a, amaherawhchu tha zawkte pawh hi zirna atang ringawta famkim lem lo, mi'n experience an lo ngah tawh chuan an experience atanga rei zawk kum sawm hnih/sawm thum kawng lo tha zawkte pawh hi a tam a ni. Tun hma khan kan sawi thin a, tun hmaa anmahni pawhin an tih dan tho boulder lian deuh kawngah an han phah a, chumi chungah an han delh rual a, boulder te deuh an han phah a. An han delh rual leh a, a chung lamah rawra sinte an han phah a, metalling an han ti thinte kha a tha em em a ni.

Amaherawhchu, India ramah anmahni kaihruitute All India Engineer Association nge ni, khatiang khan an rawn tichhhuak a, lei vung han dah a, han delh muk a, muk takin feet khat bawr velte a ngai a ni a. Chutiang chuan an han delh muk hnuah rawra kuttum tiat vel an han phah a, an han delh muk leh a,

chumi chungah a sin deuh an han ti a. A tih dan phung pangngai ang kha chuan a delh rittute Road Roller tha tak nen ngun taka tih chu ni se a tlo mai thei. Mahse, kan ramah hi chuan a practicable lo a ni. A hman tlak loh a ni tih hi kan sawi thin a, PWD-in tun hmaa an tih leh Border Road Transport-in an tih thin ang kha a la hman tlak ber a, a chhiat pawhin khuar thu lutuk vawk bual tiat tiat hi a chhe ngai lo a ni.

Chutiang an tihna hmun chu entirnan, Seling leh Saitual inkar ringawtte pawh khi rei tak PWD-in an lo enkawl tawh a, Pioneer-in an enkawl hnu pawh khan kawng mam taka kan tlan theih loh pawhin thuk tak dai tur hi a awm mang ngai reng reng lo. Pathian leh mipuite zarah kum 20 chuang, ka kal ngun hle tawh mai a, chutiang chu a ni a. Chutiang chuan ti leh thin rawh u kan han tih pawh hian an ti leh duh mang lova, nichina kan ngaihthlak tak ang khan staff an indaihlo em em a. Engineer an indaihlo, JE, viltu tur pawh an indaihlo a, khatiang kha an nih vangin, khatiang kawng India ram pum puia an tih dan anga kan han tih ve khan an lo vil ngun tawk lova. A chhan chu an inthlahdah vang ni hran lovin, an indaihloh vang a ni a.

Tin, contractor-in khawlte an lo nei tha tawk lova, hun eng emaw lai khan khawl chu kan nei tha thin. Amaherawhchu, mechanical division-te kan han thiat titih lek lek a, tih tur pawh hre mang lovin an awm ta a. Tunah chuan khatiang chei vul leh tur khan tun hunah hian kan han kal tha leh ta te pawh hi kawng tha zawkte chu kan neih theih kan beisei a ni.

Pu Dy.Speaker, chutiang kawng nuam tha, Aizawl atanga Siahate pawh 5:00 A.M-a kan chhuah chuan 4:00 P.M-ah kan thleng leh thei ta mai te hi a lawmawm ka ti hle mai a. Hotu rintlak, opposition an nih laia an lo tawng tawh hre reng, ruling an niha theihngihl ta mai lem lo kan han nei chhuakte pawh hi a ropui ka ti a.

Chutiang a nih lai chuan a chhe lai sawi ka duh a. Kan Chief Minister bial hi kan kal thin a, hmannah pawh khitha a tawp thleng, Muthi lam leh Sihphir lamte leh Zemabawk lamte ka'n fang a. A tha em em mai a, a lawmawm a ni. Tichuan kan kawng chhiatna lai kan sawi tam em em Seling nena kan inkarte pawh kan sawi thin a. (Ka conclude tep tawh a nia Pu Dy.Speaker.) Tuirial thleng chu tunah hian a tha em em a ni. Kartin deuh thaw hi ka kal a, a chhe lai a la awm miah lo Tuirial thleng, Tuirial a bial piah lamah chuan a chhe em em mai a ni. An siam hnuhnung zawk lehngal kha a ni a, amah hi chuan Zoram pum pui hi a bial anga siam vek a duh ang, hetiang hian ka bial hi chu lo ti ngun bik rawh u tih hi PWD hotute hnenah emaw, contractor hnenah emaw a sawi hi ka ring lo reng reng. A sawi miah lo ang.

Amaherawhchu, engatinge Chief Minister bial tha taka siam hmasa zawk pawh la tha thei a nih si chuan, Tuikhurhlu chhak lam zawng zawng khi vawk bual tiat tiat, fur khat pawh kan la kal hmain khitianga chhiaa a awm ringawt khi a dik lo. Patch hole repairing chu an han nei ve, mahse, an neih bul lawk lawkah chhe leh mai tur a phut leh sa hi a tam em em a ni. Chuvang chuan khawngaihtakin hetiang hi awm tawh lo se ka duh. Hleih neihna ang deuha zu ngaihtuah phei chuan intentionally-a tih a ni em? A nih em chu ka ring lo, chuvangin ka Department-a Engineer-te hmaa ka sawi ve chu, Engineer contractor ngam lo hi ka mi ten ber, ka mi huat ber an ni ka ti. Chuvangin contractor hi a thuhmun a nih lehngal phei chuan a beka ben hawi sawk tlak a ni. Chuvangin hei hi a dik lo hrim hrim a rang thei ang bera tinawn leh vek tura an tih hi ka phut a ni. Ka lawm e.

DEPUTY SPEAKER : Vawiinah dar li-ah kan ban ngei ngei a ngai dawn a, chuvang chuan thusawi tur pawh kha, sawi kim theih tum i la, a theih loh a nih pawhin hriatthiam a tulin ka ring a. Tin, kan Speaker zahawm tak hi a naupan laia a thianpa ngawih ngawih a boral a, a chhuak lawk a ni tih kha House ka han hriattir in ka han sawi duh a. Engpawh ni se, Pu Lalrintluanga Sailo, Dampa bialtu zahawm tak sawm phawt mai ang aw.

Pu LALRINTLUANGA SAILO : Pu Speaker, “MNF Ministry-in hun reilote chhunga Zoram dung leh vanga kawng chhe tak a siamtha mai hi lawmawm kan ti hle” tih member zahawm tak Pu Zothantluanga, Aizawl West-I bialtu in private resolution a rawn putluh vawiinah kan sawiho thei hi lawmawm ka ti a. Tin, he resolution hi helai House-a sawiawm tak a ni ka ti deuh a ni. Chuvang chuan, vawiinah hian a awmlo ti deuh kan awm a nih pawhin, kei awm ka ti hle a.

Chutih rual chuan, hmannah kan thianpa Engineer pakhat lal ve deuh hlek tawh nen kan inkawm a, Hunthar veng leitlahniam kan tihfo mai, Pu Zoramthanga kaihhruai sorkar a lo din atanga khutianga an tlang thla ta maite khu kan titi a, kan sawiho a. “Engatinge hei leh chen hi PWD officer in ni a, hetiang hian tunhma khan in siam mai loh” te ka ti a, “Sorkar hmasa kha chuan Engineer-in kan hna kan thawk hleithei lova, a chhan chu a lo diak a, leimin dan nan tiin PWD enkawltu Minister khan thirzaiin a lung tuam khawm ula, tiang chuan ti rawh u tiin instruction min pe a, kan thiamna a hman theih loh a ni”, a ti a, a dik ka ring deuh hlek a. A hun leh thla pawh awm hmian khutianga tha mai ni lo, fur a lo ni a, vawiinah June 21 a lo ni tawh chunga a chunglam atanga leimin rawn kawh thla tur awm miah lova a awmte khu a ropui ka ti a, a enkawltu kan CM zahawm tak, kan House Leader ni bawh hi chawimawi tlak a ni tih hi ka tarlang duh a ni.

Kumtluanin kan hria a, zin thin mite kan ni a, khulai ringawt pawh khu House-ah hian lawmthu sawina tham niin Pu Deputy Speaker, ka hre deuh hlek a ni. A chhan chu tui a tling a, motor in a dai a, a tichhe tawh kan awm a, a chang chuan kan innem luih luih thin kha a ni a, khang zawng zawng a lo bo ta kha lawmawm hlein ka hria a, chu chu ka han tarlang hmasa duh a.

Tin, kan thutna a danglam ang hian kan thusawi duh dan a danglam rual hian thil pakhat ngaihtuah ka neih chu, kan Pathian thuin lawmte lawmpui a, tahte tahpui turin min zirtir lai hi kan ngaihpawimawh a thain ka hre thar deuh a. Chuvang chuan, vawiinah hian resolution neituin a sawi ang hian thla nga lek chhung leh he ministry lo piang, budget cheng khatmah la hmang hauh lova heng kawng thar siamna formation cutting-ah 236.500 km. te, kawng lungchhuat phah Water Bound Maca-Dam (WBM) an tih 331 km. te, black topping thar 225 km. te, black topping hlui thumthatna resurfacing kan tih 403.350 km. te, pot holes patch repairing, a chhe zual lai siamthat 522.450 km. te. Tin, cement concrete leh cell filled concrete

19 km. ngawt mai an thawk hmante hi thil ropui tak a niin ka hria a, chuti la ni lo se, sorkar hlui hun kha la ni se vawiin hian thil danglam hmuh tur a awmin ka ring lova. Chuvang chuan, thenkhatin Zoram dung leh vang han tih em em chu an ti a nih pawhin an tehna zawn kha ka hre lova, amaherawhchu, sawitu hmasain an sawi ang khan vawiinah Siaha thleng tur chuan hun kan paih tlem tawh ziate atang khan a dung leh vang hi chu a ni a ni lawm ni ka ti deuh a ni.

Chutih rual chuan keini bialahte pawh kan han sawi a, hun reilote chhungin, inthlan vote thlak ni thleng khan Darlung Bawlte hi 4 km. lek a ni a, Pu Deputy Speaker, ke-a kal a ngai a, chungte chu vawiinah chuan boulder phah a, chil mam ngaite road roller-a chil mamin a tlan vut vut tawh mai a. Hmannia kan va kal phei chuan Congress VC kan neih chhun nu khan “Vuan lovin motor a chuan theih ta” a ti a ni. Chuvangin a taka chhawrtu ten an lawmzia hi mitin kan hmu a, lawmthu han sawi hi a phu hle ka ti a. Chutihrual chuan, sawlai kawng Rawpuichhip-South Sabual te hi Pu Zoramthanga kaihhruai sorkar hmasaah khan tha takin truckable in a lai tlang a, a grade pawh a tha em em a ni. Amaherawhchu, MNF ministry khan a laih tlang hnuah Rawpuichhip atanga Kanghmun thleng hi a black top hman a, Kanghmun in tawp atanga hemi Bawlte, Darlung lam kawng 18 km. lek hi khawih a awm ta lo mai a ni lova, kumtina Presbytery neih te, bial inkhawmpuite pawhin 14 km. lek, entirnan Bawlte leh Kanghmun inkar han kal mai theiha kha kal theih a ni lova, Aizawl through in hetah Reiek/Ailawng-ah, West Lungdar-ah lo kalin Kanghmun ah inkhawmpui an nei thin a ni. Amaherawhchu, Presbytery lehah hi chuan an kal tawh dawn lo tih a lan hian kohhran ho pawh an lawm hle a, Kanghmun Bawlte chu vawiinah tihthat mek a lo niin, tunah hian 2 km. vel boulder phah a chil mamna sum kan nei a, a bak 12 km. erawh hi chu he budget tharah hian kan hruaituten min tihsak kan han beisei a ni a, chutiang chuan hma chak takin he sorkar thar hian a la a. Tin, kum sawm chhung a khawiha khawih miah loh a ni heng kawngte hi, sorkar thar lo din vele budget pawh kan la pharh hmain chutiang chuan hma min laksak a, a lawmawm kan ti a ni tih ka sawi duh a.

Chutih rual chuan vawiinah hian West Phaileng-Marpara kum 2014 chauha black topping tender chhanga mi pathumin an thawhchhuah vek kha vawiinah chuan black topping hmuh tur a awm tawh hauh lova. Chuvangin heng hi kan hotuten ngaipawimawhin a awm ang ang han sawk khawmin tun hunah hian resurfacing kan tih ang deuh chi nge ni, a chhe lai pot holes patch repairing ang kha min han neih

sak a, amaherawhchu hun rei daih thei a ni lova. A thawktu contractor ten a maintenance period a ral tawh ti in blacktopping hmuh tur awm lo khawp in a chhia a ni. Hengte hi repair a lo ni chho ta zel a, a lawmawm kan ti a, amaherawhchu hma lam hunah thawh tur tam tak a awm a ni tih ka tarlang tel duh a.

Tin, development atana pawimawh ber mai kan ram leh state dang leh khawvelin a sawi thin chu kawngpui tha hi a ni a. Kawngpui a that chuan kut hnathawktuten an thil thar chhuah kha awlsam takin khawpui zawk ah te an hralh chhuak thei a, chutiang chuan development atan hian thil pawimawh ber a ni kan ti thin a. Vawiinah chuan awlsam takin thingtlang thlai thar te pawh awlsam takin an dispose zung zung thei tawh ta a, a lawmawm hlein ka hria a, chutih rual chuan a bik taka lawmthu sawi duhna ka nei a.

Vawiinah kan House Leader zahawm tak a awm a, tin, official gallery lamah pawh PWD hotupa a awm bawk a. Hei hi mi sawi dan a ni em ka hre lova, ka hmaa member zahawm tak Pu Zira'n a sawi ang khan ka han sawi duh lai chu Rawpuichhip to South Sabual 70 km ngawta thui hi PMGSY atangin siamthat hna thawk turin central lamah an thawn thla niin ka hria a. Hei hi helai khua a chhawrtu tur, khaw 15 ngawt hi an lawm hle a ni tih ka sawi duh a.

Tin, South Sabual atanga Khawlek, member zahawm tak Pu Zodintluanga bial telin 18 km hi an la tel zui a, PMGSY upgradation-ah. Tin, Aizawl atanga Reiek 30 km hi telh a ni bawk a. Hei hi a bik takin Reiek chu kan kal thangin ka ring a. Zokhua tih te leh eng eng emaw tiin foreigners te pawh an kal thin a. Nichina member zahawm tak Pu Lalduhoma sawi ang khan kawngkawi blind em em mai khu a tam a ni, cutting ngai tak tak khu, amaherawhchu tun atanga reiloteah PMGSY upgradation hmang hian min tih that sak dawn a ni tih hi a lo lang chho ta zel a, lawmawm kan ti a. Tin, West Phaileng atanga Dapchhuah BRTF kawng pawh PMGSY upgradation ah min lo telh a ni tih kan hria a, kan lawm tak zet zet a.

Tin, W.Phaileng atanga district khawpui kawng, Phaileng atanga 20 km vel Tut-a chhukthla a, chho zawnga bei leh tawh lova Dampui panna kawng Lenhmui kawn kalna tur kawng te min han buatsaih sak chhoin rawtna te min siam sak a, PMGSY upgradation ah. (Pu Deputy Speaker, minute khat lek) 18 km lek ah hian hma kan la dawn niin kan hria a, kan lawm hle.

Tin, West Phaileng atanga khaw hnai helai kan potential area atanga khaw pawimawh tak mai a ni a. Zikhlum te pawh a hralhna a awm lova kan ching ngam lo thin a ni. Kan chin hian a hlum pakhat hi 15 kg te a tling a, a phel a lei hi a ngai thin a ni. Chuvang chuan tuna kan sorkar thar hmalakna hmang hian kawng tha kan nei chho ang a, Zikhlum te kan ching ngam dawn a ni.

Pu Deputy Speaker, helaiah hian alu te pawh an ching a, a lian lutuk a, inphel a ngai thin tlat mai a, khang kha kan dinhmun a ni a. Chuvang chuan kawng a that hunah pheii chuan i vei lam ami te pawhin mak an la ti hle ang tah chuan tih hla kha min sak sak ka ring deuh hlek a. Chulaiah chuan lawmthu kan sawi duh a.

A tawp bera motion ang deuha ka sawi duh chu a hmingin contractor angin ei ka zawng thin a. Kan Chief Minister zahawm tak, kan House Leader sorkar hmasa kaihhruai a nih lai khan a tlangpui thu in contractor te kawng laih a ni emaw, black topping a ni emaw khatiangah khan maintenance period hi kum 5 te a ni thin a. Vawiinah chuan kum 1-ah a tla thla ta a, hei hi kan ennawn a tha hlein ka hria a, nichina member zahawm tak Pu Lalduhoma sawi ang deuh hlek khan, maintenance period hi a tawi chuan thiam takin contractor ten hna an thawk thin a ni. A fur leh hun a lo thlen hmaa maintenance period tawp hun en ran khan hna an thawk fo thin a.

Helai erawh hi chu kan ennawn a tha awm mang e tiin vawiinah he motion duhawm tak Aizawl West I bialtu zahawm tak Pu Zothantluanga'n a rawn putluh "MNF ministry-in hun reilote chhunga Zoram dung leh vanga kawng chhe tak a siamtha mai hi lawmawm kan ti hle a ni" tih hi ka support a, member ten min pass pui ngei turin ka rawn support a ni e. Ka lawm e.

DEPUTY SPEAKER : Pu K.T.Rokhaw, Palak bialtu zahawm tak i lo sawm ang u.

Pu K.T.ROKHAW : Pu Deputy Speaker, he private resolution sawi ve thei tura hun tha min pek avangin ka lawm e. Pu Deputy Speaker, he resolution, 'MNF ministry-in hun reilote chhunga Zoram dung leh vanga kawng chhe tak a siamthat hna hi a lawmawm kan ti hle' tih Pu Zothantluanga'n a lo put luh hi, nichina resolution neituin a thusawi

Pu LALRINTLUANGA SAILO : Ngawi lawk, Pu Deputy Speaker, kan tibuai lawk, nimina kan thil ei kha nge ni ka hre lova, ka pum a diklo deuh a,

member 5,6 vel hi pum nuam lovin kan in tlan chhawk sek mai a, nimina helaia kan thil ei kha a dik chiah lo deuh a awm a nih ka ring a. Hei doctor ten damdawi te min pe a, tihian kan in tlan chhawk deuh sek hlawm a ni tih kha kan sawi lang duh a, kan chhuak deuh zut a nih pawhin min hriatthiam ka han ngen e.

Pu K.T.ROKHAW, MLA : Pu Deputy Speaker, a sawi chhung khan minute 5 a liam tawh a nia, kha kha min lo hriat sak dawn nia. Pu Deputy Speaker, he kawng tha siam thei tura MNF-in hma a la thei hi a dik tak chuan a bul ngaihtuah a ngaiin ka hria a. Resolution rawn move-tu khan Congress kha kawngchhe ngaipawimawh lo, an hunlaia kawng chhe em em, engahmaha ngaihsak ang khan min lo chhuah mai in ka hria a, kha kha han sawifiah ka duh tlat mai a ni. Congress a sorkar hmasak kum 5 khan kawng a chhiat hriat a ni lo. Tin, a kum 5, a tawpnaah erawh kha chuan 2016-2017 leh 2017-2018 erawh kha chu tupawh in kan hria a, ruahtui a tam em em mai a. 2016-17 pheih kha chu March thla tawp atangin November thleng ruah a sur a ni. Chuvangin kan sorkar tan pawh khan hnathawh ngaihna a awm lo a ni. Chumi avang chuan kan Congress hotute khan 2018-19 vel pheih kha chu kawng a chhe viau a ni tih an hmuh avangin pawisa tam tak an dah reng a ni.

Chu pawisa an dah chu vawiina MNF sorkar-in kawng tha tak a siam theihna chhan pawh hi Congress sorkar khan pawisa tam tak a lo dah vang a ni tih kha Mizo mipuite hian an hre lovang tih ka hlau a. Tin, he House-ah sawilan a nih loh avangin sawi lan ka duh a ni.

Kan Congress sorkar khan pawisa tam tak kha dah lo ta se vawiina MNF sorkar hian kawng tha siamna tur pawisa an nei dawn hauh lo a ni. Chulai chu Pu Speaker, ka'n sawi ve duh a.

2018 khan Congress sorkar chuan kawng chhe siamna tur budget tam tak a dah a. Chu sum chu October 2018 thla tir khan hman theihin a awm a. Mahse Model Code of Conduct khan a phuar tlat avangin pawisa kha hman theih lohin a awm ta a ni. Kha sum kha MNF sorkar hian a rochung a, vawiinah hian kawng tha tak a siam thei a ni tih kha ka sawi duh a. Tin, Mizoram puma kawng tha tak a siam theihna ngaihtuahtu chu Congress sorkar kha a ni. A sum hmangraltu erawh chu MNF sorkar a ni.

Congress sorkar kalta kha kawng siamna tur sum ngaihtuahtu a ni a, a pawisa hmanga hna thawktu erawh chu MNF sorkar a ni. Chuvangin, Congress leh MNF sorkar hi thleibik nei lova lawmthu sawi ve ve tur kan ni dawn lo em ni tih hi ka ngaihdan a ni. A dik tak chuan sum ngaihtuahtu kha awm lo se hnathawktu hian hna a thawk thei dawn hauh lo a ni. Chuvang chuan Mizoram chhunga PWD-in kawng a enkawl mek hi 4555.77 km a ni a, BRTF-in a enkawl mek hi 618.28 km a ni a. Tin, Central PWD-in a enkawl hi 175.60 km a niin ka hria a.

Tin, Congress sorkar kalta khan 2018 budget-ah khan Mizoram pumah kawng a chhiat hle avang khan pawisa tam tak a dah a, ₹ 95,057.00 lakhs a dah a ni. Central atangin ₹ 16,869.00 lakhs a hmu bawk a ni. Heta Pu C. Ngunlianchnunga, MLA zahawm takin a zawhnaah pawh hian, “2018-19 chhunga PWD-in sum NEDP-a a dah kha engzat nge ni?” a tihah pawh hian ₹ 2000 lakhs vel PWD-ah dah a ni bawk a ni. He sum hmang hian PWD division hrang hrang khan road-roller, JCB leh truck tam tak a lo lei theih phah a, a lawmawm tak zet a ni.

Congress sorkar kalta khan pawisa tam tak, Mizoram pum kawng siamna tur a hnutchhiah a, chuvang chuan MNF sorkar hian kawng a siam thei a ni. A lawmawm ka ti a, kawng pawh hi a tha a, a lawmawm a. Mahse, a dik tak chuan kawng an siam pawh hi a hmanhmawhthlak a, kan hrethiam viau tho a, thenkhat phei hi chu duhthu a sam lo hle a ni. A dik tak chuan pot-hole an hnawhkhah dante, an black-top dan te, bitumen an hman dan te hi a sub-standard mah mah a ni. An black-top thenkhat phei hi chu kutlawnga chawi law law theih khawpa inchar nghet lote pawh a awm a ni. Social media-ah pawh kan hmu a nih kha.

Chuvangin, Congress sorkar kalta khan sum tam tak kawng siam nan a lo dah a. Kei chuan khami resolution-ah khan Congress sorkar khan sum tam tak a lo dah a, MNF sorkar hian kha sum hmang khan Mizoram dung leh vangah kawng chhia a siamtha vek a, kan lawm hle a ni ti a kha resolution kha thlak turah ka lo ngai a ni.

Pu Deputy Speaker, vawiinah hian he resolution hi MNF sorkar chunga lawmthu kan sawi rual hian Congress sorkar, a bul tumtu, pawisa ngaihtuahtu chungah pawh khan lawmthu kan sawi ve tur a ni dawn lawm ni tih ka ngaihdan tlem ka'n sawi ve a ni e. Ka lawm e.

DEPUTY SPEAKER : Hun a hmang zo deuh chiah si a, ka pek belh ang che chu ka ti a, nichin khan i'n dil deuh nain hun i hmang zo thei a, a lawmawm e. Pu Andrew H. Thangliana, Tuirial bialtu MLA zahawm tak sawm ang.

Pu ANDREW H. THANGLIANA : Pu Deputy Speaker, ka lawm e. Pu Zothantluanga Resolution, “MNF Ministry-in hun reilote chhunga Zoram dung leh vanga kawng chhe tak a siamtha mai hi lawmawm kan ti hle” tih chungchanga sawi duh ka neih ve chu – hei hi a dik ka ti a. Kum kalta mai khan Mizoram dung leh vang, chhim leh chhak inkalpawhna kawngpui chhiat zia kha kan la mitthla thiam vekin a rinawm a. Khatihlai khan tuna i dinglama thute khan an veiin an aupui nasa hle a. Tunah sorkarna chang chhovin hma an han la ta rup rup mai a. Kan kawngpuite a lo mam ta zur mai hi tuna sorkar mekte an fakawm hlein ka hria a.

Pu Deputy Speaker, keini bial lam Sairang-Kawnpuite khu nikum lam campaign laite chuan motor te-a tlan ngam loh chang kha kan ngah thin a. Tunah chuan helai bawr kawng Sairang-Buichali phei khu chu tlan chak avanga accident hlauhawm khawpa tha a niin ka hria a. Buichali piahlam erawh hel zeuh zeuh ngai a awm nachungin khu pawh khu siam mek a ni a.

Tin, ka sawi lai mekin nimin piah mai khan Tuikum lei piah lawk Kawnpui lamah khuan mual a tawlh a, lei piah lam kawng a hnawh a. He chhiat tawhna ah hian PWD-in chak taka hma la in kawng pawh a tlang leh tawh a ni. Hemi chungchangah hian bialtu mipui aiawhin lawmthu ka sawi e.

Tin, Aizawl to Lungdai road pawh kawng a te tih mai loh chu tlan theih a ni a. Sihphir hi resurfacing tih a la ni lova, motor han tlan hian a khaw chhung kawng hi a sawt nasa em em mai a, kan CM bial a ni a, ngaihven a hlawh ang tih chu kan ringhlel lo.

Pu Deputy Speaker, kawng tha chungchang kan sawi ta bawk a. Serkhan to Bagha road hi sawi a ngaiin ka hria a ni. House-ah te pawh kan au chhuahpui tawh a. Helai kawng hi a zauin kawng nuam tak a ni a, economic road pawimawh tak pawh a la nih ka ring. Tunah chuan motor lian te an rawn tlan lut a, Serkhan thleng hi chu an rawn thleng tha ve mai a. Serkhan to Aizawl hi a buaithlak thin khawp mai a, kawngte a te a, kawng

zauh dan hi rilrua kan neih reng a tulin ka hria a, kan sawi thar ve leh duh hrim hrim a ni e.

Tichuan khua leh khua inkalpawhna te kan sawi a, kan ngai pawimawh a. Helaiah hian han zeh tel ve hram ka duh chu Serlui leh Tuirial bial lam hmar tlangdung leh Kolasib inkalpawhna, Bukpui tih te, Thingthleh tan chuan Serkhana kal kual a ngai a. Hemi a nih avang hian district headquarters dawr dawn hian a hautak em em a. Khilai khi tun hma pawh a an lo inkalpawhna thin a awm a, survey theih ni ta sela Serlui atanga Kawnpui kawng erawh hi chu motor a tlang reng a, pavement te siamthat chuan kawng pawimawh tak a ni thei a ni. Hnaite headquarter inkal pawhna tur hi siam theih a ni a, kan Chief Minister pawh hian min hriat sak se ka duh khawp mai. Economic road ang zawng khan pawimawhna lian tak a nei ve a ni.

Tin, Serlui balu hi a tha an ti em em a, a khaw mipuite sawi dan pheichuan Bagha-ah a len thla a, Bagha atangin keinin to deuhvin kan zu lei leh a, khulai kawng khu a pawimawhna khati zawng khan a lian em em a ni tih an sawi thin a ni. Chhungkaw tam tak tan eizawna siamna a lo ni thei bawk a a benefits kha a tam em em mai a ni. Khulai khuaah khuan mau te, 'zau' zau tak tak te a awm a, thlai thar phurh chhoh nan khuan khulai mite khuan sum te thawhkhawm in, fur laia kawng a chhiat deuh pawhin JCB te hire in an ti tawk tawk thin a ni. Kawng pawimawh tak a ni tih ka sawi duh a ni.

A tawp berah chuan lawmna resolution putlulh a ni a, hei hi kan lawmpui rualin, thil pakhat ka belh duh chu keini lam hi za a za chuan kan lawm chiah lova, keini tih chuan ka bial lam aiawhin han sawi ta ila. NEDP fund hnuai sub-division tanpuina tur ah khan SDO quarter type-II sakna tur te, Civil SDO office thawm that nan ₹ 160 lakh dah a ni ve a. Kan hriat angin kawng siam nan pawhpen niin sawi a awm a, hei hi thu tak a nih chuan, development atan kawng siam nan 'diverted' nimahsela, sum dah sa pawimawh em em tho si kan pawhpen leh si chuan a tuartu tan chuan han lawm chiamna tur kha a awm lo a ni. Kawng tha avanga kan lawm rualin za a za chuan kan lawm chiah lo a ni tih ka sawi duh a ni.

Kawnpui Sub-division tih changtlunna tura sum dah hi kawng siam nan hman tak tak a ni em? Kan resolution hi za a za a kan pass pui theihna tur chuan min tihpuitlin sak leh ngei kha kan phut leh anih chu. Kan resolution putlul chungchangah a thuphungin 99% vel chuan kan lawm a, chulai chu ka han sawi ve duh a ni e. Ka lawm e.

DEPUTY SPEAKER : Kan rorel chu kan chawl rih ang a, chawhnu dar 2:00 PM ah kan lut leh dawn nia.

2:00 PM

DEPUTY SPEAKER : Aw le, sawihona kan chhonzawm leh ang a, chawhma lamah khan phar laklawh deuh te kha kan awm a. Pu Lawmawma Tochwawng, Lunglei E bialtu zahawm tak i lo sawm ang u.

Pu LAWMAWMA TOCHHAWNG : Pu Speaker, ka lawm e. Mahni rau rauah record break tumin bell hmeh rik hmam kan zo hman a nge maw ti a kan resolution – Kawngpui tha rei lo te chhunga kan neih tak avang a lawmthu sawina hi a lawmawm hlein ka hria a. Resolution puluttu hian a nachang a hriain ka hria a, lawmna tura lawm nachang hriat te hi a thawktu te leh a petu te tan thil man hla tak anih thin avangin kawngpui tha avanga lawmthu kan sawina chhan chu, a chhia a lo awm tawh a, a chhia a lo awm tawh avanga a tha kan neih kha min tilawm a nia. Kawngpui tha kan lo neih tak avang hian, duh thusam phei zawng a la ni kher lo ang a, a tak taka han lawm te hi chu, bengka ka lo hriat danah chuan motor neitute leh a khalhtute an ni awm mang e ka ti a.

Loneituten an thar chhuah an hralh hi chu thu dangah lo dah ta ila, keini hi motor workshop neia eizawng kan ni a, kawng a chhiat lai khan thil lang Chiang tak chu thingtlang hnai deuh leh hla deuh pawh ni se, an fehchhuah lo haw apianga kan lo siamsak chu an motor chhia siam sak leh a part lo thlak a nia. An beisei angin an motor kha an hlawkpui lo ang em aw ka ti thin. An motor siam man man a to thei ve si a. Tichuan tunah chuan a lo tlem ta a, keini eizawna lam ah tak phei chuan tlemin kan lo phai ta deuh a ni mai thei a, mahse a tha tho e. A tam zawkin hlawkna kan tel tho tho a ni. Inhlawhfakna tur atana motor hmang thintu tan chuan an hloh zawk ang a tih mai tur a nia. Motor kawngpui tha ah chuan a vang ta pharh mai. Driver hlei hlei hi an lawm in ka hria, an bengchhen a nasa a, kawngpui

chhiat zia an ti a, keinin kan sawi ai mah hian motor khalhtute ah hian a lo lang Chiang thin a. An pum lam sawiselna kha a tam em em mai a ni, tunah chuan insawisel thin te pawh an lo tlem ta a.

Passengers ho te hlei hlei hi an lawm a, a chhan chu a hun takah hunbi neiin hna an thawk thei ta a. Sap hovin time is money an tih ang deuh khan hun hi an lo hmang tangkai ve thei ta a, hei hi a lawmawm leh zualna niin ka hria a. Anmahni aiawh pawh hian he rorelna sang atanga lawmthu han sawi pawh hi a thain ka hria a, an lawm zia kha thu in an sawi thei lo va. M.P. inthlan leh bye election ah khan vote-in lawmthu an rawn sawi leh ta nghal a, lawmawm tak a ni. An lawm avanga lawmthu sawina hi i pass ang u, kan zavaia lawmna a ni si a, tih hi ka thu hmasa a ni a.

Kawngtha kan lo neih tak hi amaha lo irhchhuak tawp, lo awm tawp a ni lo va, a chhan leh vang a awm a, amah a van tla lo dawng ringawt pawh kan ni hek lo. Chung zingah chuan ruahmanna tha tak leh ngaihtuahna tam tak seng leh tute emaw vang a ni kan ti lo thei lo. Ngaihtuahna leh ruahmanna nasa tak senga tih a ni a. Chu chu kan hriatreng atan a tha khawpin ka hria.

Hemi chungchangah hi chuan kan House Leader zahawm tak Pu Zoramthanga a ni kan ti lo thei lo va, ani ngaihtuahna leh suangtuahnaah hian camp chhuak khat tan ang a ni a. Kan House Leader in a lo suangtuah thin, a lo sawi thin, a veitu na na chuan a lo sawi tam na rawh e. A hrethiam lo tu chuan a nuih zat zawng te, fiamthu ang zawng lek leka han sawi te pawh an awm a. A tak ram a lo thlen ah chuan thu chu tisa ah chan tir in kawng tha kan lo nei ta hi a rinchhan Pathian vang a ni.

A dawt leh ah chuan ruahmanna leh suangtuahna ringawt chu mumang aiin a ropui chuang lo va, a tak ram a thlen loh chuan. Chutiang ngaihtuahna leh ruahmanna leh suangtuahna te leh a thawha thawhna te nen han in hrawkkhawm chuan a thawktu kan PWD lam hi lawmthu sawinaah hian hmaih rual an ni lo in ka hria a. An chungah pawh hian lawmthu kan sawi tel a tulin ka hria. Lawmthu pawh kan sawi nghal a ni, anni tel lo hi chuan sera mu kan thur hauh lovang, an fakawm thlawt a ni. An thawh rei lai te phei chuan chhun, zan, zanreiin awmzia a nei lo a ni. Chuvang chuan BRTF ho tha zawk dawn leh an ngaihawm zawk dawn anga kan han sawi te kha chu, tunah hi chuan a reh sawt tawhin a rinawm a ni. Kawngpui tha kan

lo neih tak a zarah hian dapartment pawhin hmanraw tha zawk, tunlai zawk, chhawnahawm zawk an lo neih phah leh ta zel te hi, hun lo awm leh zel tur atan pawh kan kawng leh kan ramin thil tha kan neih phahin a chhenfakawm leh zual dawnin ka hria a, lawmna a ti tam leh zual a ni.

Tin, kawngpui tha kan neih tak mek hi a la famkim lo va, hmabak kan la nei tih chu phatrual a ni lo. Kan hmalam hun atan beiseina sang tak nen beiseina nungin kan thlir ang a. Tunhma deuhah khan kawngpui chhia avanga naupang Sunde Sikulte khawkar kawng kea an kal tauh tauh thu kha ngaihthlak a awm a. Tah chuan an harsatna sutkianna tur leh anmahni han thlamuan tak aruengin, keini pawh kan naupan lai chuan ke in inkhawmpui turin kan kal thin han tih mai te nen kha chuan kan tun hun hi chu a inthlau ta hlein ka hria. Chutiang vel chu kan kawngpui tha neih chungchanga tawitea lawmthu han sawi ka duh chu a ni a. Chuvang chuan he resolution hun reilote chhung MNF sorkar a lo awm chhung mai pawha kawngpui tha Zoram dung leh vangah kan han nei ta hi lawmthu i sawi ang u tih resolution hi House zahawm tak hian i pass ho ang u khai tih rawtna kha ka thlawp a ni e. Ka lawm e.

DEPUTY SPEAKER : Pu H.Biakzaua, Lawngtlai East bialtu zahawm tak i sawm ang.

Pu H.BIAKZAUA : Pu Deputy Speaker, ka lawm e. “MNF Ministry-in hun reilote chhunga Zoram dung leh vanga kawng chhia a siamtha mai hi lawmawm kan ti hle” tih member zahawm tak Pu Zothantluanga’n resolution a rawn pulut hi tihawm tak leh lawmthu sawina tlak ngawih ngawih resolution niin ka hria a lawmawm ka ti tak zet a ni. Kan hriat angin kawng chhia a awm avanga kawng tha lo awm leh chu lawmthu kan sawi thei a nia. Kawng kha lo tha reng se chuan tunah hian tiang resolution hi a lo lut hran dawn lova. A chhia a awm hmasak avangin a lo lut ni ngei tur a ni.

Pu Deputy Speaker, Palak bialtu MLA zahawm takin chawhma lama a sawi, Congress sorkar avanga kawngtha awm ni awma a sawi kha tlemte han sawifiah lawk ka duh a. Kawng siamtu lam kan hotute zing atanga mipakhatin min hrilh dan chuan, Congress sorkarah sum a awmlo an ti a, kawng kan siamtha thei lo va. Financial year a ral hmain, chu financial year chhungah tho chuan MNF party an lo sorkar a kalkawng kan siamtha leh hman si a tih min hrilh a. Chuvang chuan

Congress kha sorkar reng ta se, kalkawng hi a tha chuang ang em aw tih min ngaihtuah tir a. Sum awm leh awm loh lam kha chu thu hran ni se. A vei leh veilo tu sorkar a awm niin ka hria. Chuvang chuan MNF Ministry a lo pian veleh kan Chief Minister zahawm takin kal kawng a vei em em avanga he dinhmun hi thleng thei kan niin ka hre zawk a ni.

Aw le, World Bank Road kan ti a, Zoram dung leh vang tih a ni a, kan kal vena chin lam kha sawi a ngai hmasain ka hria a. Keini hi chhim lama awm kan nih avangin World Bank Road hi Lunglei thleng kan zawh a. World Bank Road chu a tha thawkhat viau tawh a. Kan han zawh chin hi chu a tlangpui thuin a chhe lai siam zawh deuh vek tawh a ni a. Tichuan Lunglei atangin NH 54 Hrangchalkawn ah a finthla a, chu chu Lawngtlai thleng kan kal tlangpui ta a. Keini Lawngtlai khua kan nih avangin, sawlai saw nichina kan Minister zahawm tak ten an sawi ang khan, helam siam dan nen hian a inanglo deuh hlek emaw chu aw ka ti a. Hrangchalkawn atanga Lawngtlai thleng sawn an siam tho a, a tlangpui thuin a chhe khuar leh eng eng emaw chu siam fel a ni ve a, mahse he lam siam dan nen hian, a thawktu in an loh vang nge, tlem chuan a in ang lo deuh hlek a, a khuar lai leh chhe lai deuh enge maw zat chu tlan hian a la awm a. Mahse tunhma ngaihtuah chuan Aizawl atang hian darkar 10 vel Lawngtlai thlen nan kawng siam that hma hian kan hmang thin a, darkar 9 atanga 10 inkar, tunah chuan darkar 7 atanga 8 muan deuh chuan 8:30, chutiang velah chuan Lawngtlai duhtawkin a thlen theih tawh a ni. Chuvang chuan kalkawng a inthlau em em a, hemi inkar bikah hian, a lawmawm takzetin ka hria a. Tichuan kawng tha, hemi kawng dung kan han tlan vena chin, Mizoram dung leh vang kan han tih khan hmun tam takah kei tunhnaiah ka kal lo va, ka kalna chinah chuan a lawmawm hlein ka hria a ni.

Chumi piah lamah chuan Pu Deputy Speaker, kawng laih mek Vawmbuk atanga Tialdawnglung inkar hi tunah PMGSY atangin an lai mek niin ka hria a. Tin, Vawmbuk atanga Archhuang inkar hi an lai bawkin ka hria a. Helai hi en ngun a ngai deuhin ka hria, a chhan chu a khawchhung mipuiin sawisel leh complaint a awm deuh reng mai a, ka hnenah pawh. Chuvang chuan helai hi hriat a tul hlein ka hria a. Tin, Sangau atanga Thaltlang, Phawngpuitlang kawng a ni a tunah hian thawh mek a ni. Tiang chuan PMGSY kawng tuna buaipui mek te hi uluk lehzual a kan vil a ngai in

ka hria. Kalkawng neihsa te kan duhthu a sam lohna kan sawi kan sawi hi laih lai atanga kan vil ngam thin loh vang a ni. Experience han ti ila, ka hmuh ve china tha thei lo nia ka hriat chu kawng dunga tuitlin theihna awm hi fur lai hian, Lunglei leh Lawngtlai inkarah hian hmun 3/4 velah a tling thin a, ruahtui tlak tam lai chuan chunglai chu a tha thei lo reng reng, kalkawng hi a leveling hi a dik loh chuan technical miin an hre em em mai a, mahse chutiang chung chuan tuitlin theihna hi a awm nual mai a. Chung chu reiloteah alkatra kha a khawk thuai mai a, tunah pawh hian kan hnung lawka an siam kha ruahtui a tlak tam hnu hian a khawk leh nual tawh mai a. Chuvang chuan a tha kan tih rual khan a tha lo hmuh turte pawh kan nei tan chho leh dawn em ni awm tih turin a lang nghe nghe a.

Tin, mahni bial lam chanchin hi sawi loh theih a ni lo va. Budget Session tanni a zawhna ka siamah khan kan C.M zahawm takin chhanna a pekah chuan, oral-a chhan hman a ni lo va, ziaka chhan a ni tho va. Lungtian atanga Mamte inkar hi PMGSY-ah upgrade ni se a theih ang em tia ka zawhna chu, upgrade tum a ni tih a ni a. Helai kawng hi kan hriat angin PMGSY atangin Mamte leh Thingfal inkar an lai tawh a. Tin, BRTF road atanga Lungtian thleng laih a ni tawh bawk a. Lungtian leh Mamte inkar hi Lungtian atanga Tuipui thleng km 16, Tuipui atanga Mamte thleng km 24 a ni a. Ka hriat sual loh chuan NEC sum atanga laih niin ka hria a. A zim bik em em mai a, kawng te tak te a ni a, a tlan theih tawh mang lo va, furah hi chuan an tlan ngai lova thalah an tlan thin a.

Chu chu PMGSY atanga upgrade tumna a awm thu kan C.M. zahawm takin a chhannaah a rawn dah lang a, a lawmawm hlein ka hria. Marboat siam tur te pawh kan hnunga Budget Session kan neih hmasak zawkah khan min hriattir tawh bawk a. Helai kawng hi (Dy. Speaker : Minute 1 ila nei) kawng pawimawh tak, short-cut deuh mai a ni a. Lungtian atanga Lawngtlai kan kal dawn chuan darkar 3 tling lovah a thlen theih a. Saiha lam atanga kal dawn chuan darkar 6 aia rei tlan a ngai thung a, a short-cut em em mai a Sangau lam atang te pawh hian. Chutiang chuan he kawng hi kawng pawimawh tak, tuipekam balu thatna a tlawh bawk a, leilet siam theihna pawh ram tam tak a awm bawk a, kawng pawimawh tak a nih avangin helai kawng hi kawng that avanga lawmthu sawina resolution kan sawi rualin

kawng pawimawhna a lo lang chiang hlein ka hria a, helai kawngte pawh hi min hriatsak a tul takzetin ka hria a Pu Deputy Speaker.

Tin, chubakah chuan Vartekkai kawng hi PMGSY kawngin a chhun ve lo hrim hrim a. Thingtlang khaw te tak te te pawh PMGSY kawngin tunah hian proposal awmin laih mek an ni a. Vartekkai kawng hi PMGSY kawngin a la chhun loh hrim hrim leh Sorkarin policy mumal tak siana kawng a la laih loh a ni a, kawng laih tur pawimawh tak a ni tih ka han sawi lang duh bawk a. Aw le, Pu Deputy Speaker, he resolution ‘Mizoram dung leh vanga kawng chhia siamthat a han ni ta mai hi a lawmawm tak zet a ni’ tih resolution hi ka thlawp a, kan pass ngei pawh a thain ka hria. Ka lawm e.

DEPUTY SPEAKER : Pu Lalchhuanthanga, Aizawl South-II bialtu MLA zahawm tak i lo sawm ang.

Pu LALCHHUANTHANGA : Pu Deputy Speaker, ka lawm e. Kan resolution ‘Mizoram dung leh vang’ han tih hian kei ka kal thui lo va, a that leh that loh han sawi vak ngaihna ka hre lova. Amaherawhchu, hmannah ka huan Khamrang-ah ka zuk feh a, kum danga kawng chhe em em mai thin, regular taka a chhiat reng thinna te kha cement concrete-in an lo chhung a, a lawmawm ka ti a, a tha khawp mai a. Concrete-a chhun hi thil tha tak niin ka hria. Kan naupan laiin Mission Veng bazar hi Pu J. Lianchungnungan concrete - in a chhung a, a rei tawh khawp mai a kum 40 chuang a ni tawh a. Tunah hian kha kawng kha an repair leh hi ka hre ngai lo va, chuang chuan kan kawng a hniam lai deuh te leh a hnawng lai deuh te hi chu concrete hian chhung ta ila a fuh ber awm mang e ka'n ti a. Kha lam kha kan PWD Minister pawh khan lo hria sela. Hetiang hi a tirah a sen hi tam deuh mahse a nihna tur taka tha tawh taka tih chuan chhe thei lo ang deuh a ni. Kha lam-te pawh kha uar deuh ta ila a thain ka hria a ni.

Ka bial chhung te pawh han sawi lut ta ila, Aizawl South-II, Mission Veng, Sikulpuikawn junction saw a pawimawh khawp mai a. Kan PWD Minister, kan CM ni bawk hnenah khan lehkha ka thawn a, amaherawhchu chhanna ka hmuh loh bakah, acknowledgement pawh ka hmu lo a, rilru a na deuh lek lek a. Sawlai hmun saw kawng peng thuam 8 lai mai intawh khawmna a ni a, englai pawhin traffic a jam a ni. Sawlai saw kan ngaihtuah a ngai khawp mai a, kawng peng thuam sawtianga

tam intawhkhawmna hmun hi hmun dangah hian a awm kher pawhin ka ring lo a. Tin, sawlai saw Mizoram Pollution Control Board pawh khan boruak thianghlim leh thianghlim lo an tehnaah boruak thianghlim lohna ber a lo ni ta a, a chhan chu traffic jam tam lutuk vang saw a nih kan ring a. An teh danah AQI an ti a, 156 Sikulpuikawn saw a nih laiin, Dawrpui chu 69 a ni. Chuvang chuan saw lai saw a boruak te pawh a thianghlim tawh lo hle ni awm tak a ni. Helaiiah hian flyover changkang tak khawpui cheina tur awm ang chi hi min siam sak thei se kan duh a, saw lai saw kum dangah pawh Mission Veng YMA te hian kum tinin Christmas leh Kumthar vuak vet lai hian an chei thin a. Aizawl veng hrang hrang atangin thla la tur hi an rawn fuankhawm thin a, nula tlangval, nu leh paten an fate an rawn lenpui a.

Chhungkua ten thla an la thin a, saw lai saw Christmas vuak vet laia thlalak tamna ber pawl a nih pawh ka ring a. Chuvang chuan flyover changkang tak siam ta ila, kan khawpui chei nan hian a tha dawn hlein ka hria a. Tin, bakah Aizawl chhim lam kawtchhuah te pawh a lo ni ta zel a, tunah chuan a pawimawh khawp mai a. Traffic jam saw kan problem tawh viau a ni.

Tin, chu bakah chuan Pu Deputy Speaker, Mission Veng leh Thakthing inrina lai, khampei kan tih, kawngchung a hlauhawm khawp mai a. A khat tawkin lung lian pui puite a rawn tla a, vanneih a siamin nunna chan em chu kan la awm lo a. Amaherawhchu kan fimkhura a dannate engtin emaw kan siam loh chuan vanduinina lian zawkte kan thleng ang tih a hlauhawm khawp mai a. A tih dan tur chu kan engineerte pawhin an thiam tho turah ngai ila. A danna eng emaw, a preventive measure eng emaw hi chu kan ngaihtuah chhuah hi chu a ngai tawhin ka hria. Tunah sawn silpauline saw a in zar duai duai reng mai a, a tawp lutuk baw a, khawpui chei nan te pawh sawngte pawh saw a siam theihin ka ring a. PWD Minister hian min lo hriatpui sela, a pawimawh khawp mai a. Chungte chu kan bial chhung atana ka sawi duh te chu a ni a. Engpawh ni se eng pawisa pawh hmang ni ila kan kawng a lo tha ta hi lawmawm ka ti. A pawimawh em a kawng tha hi, tunah kawng chhiat thu report a awm tawh lo a, kawng that thu report kan han dawng te hi lawmawm ka ti a. Chuvang chuan resolution hi ka thlawp e.

DEPUTY SPEAKER : Pu Lalrindika Ralte, Hachhek bialtu MLA zahawm tak i lo sawm ang.

Pu LALRINDIKA RALTE : Pu Deputy Speaker ka lawm e. Vawiinah hian kan private member resolution hi kan hriat tlan ang hi a ni a. A thenah hian kan khawng thlu chauh a tih a nih lai hian a then ah Zoram dung leh vangah tih te an ni bawk a. Eng pawh ni se hna thawk tur hian a pawimawh ber chu sum leh pai a ni a, vawiinah hian lawmthu kan sawi dawn a nih chuan, kan sorkar chu kan hriat angin tunah pawh sum leh pai hman tur hi tihian kan chhep hrang vel mek chauh a la ni a. Chuvang chuan lawmthu kan sawi dawn a nih chuan sorkar kalta in hetiang hmalak theihna tura sum a lo dah kha a lawmawmin ka hria a. Chumi a nih avang chuan he kan resolution pawh hi tih danglam hial a tha ang em aw tih te ka ngaihtuah a. Chuvang chuan hemi chung changah chuan sawi thui vak tur ka neilo a, lawmthu kan sawi dawn a nih chuan sorkar kalta kha a ni turah ka ngai a ni.

Tichuan, ka han sawi tel duh chu hmalakna hi a kal tan dawn a. Kan bial, Hachhek bialah khuan Kawrthah leh K. Sarali kawng atan ₹ 426,84,000 pawisa hi a awm a. Tichuan, hna hi an rawn thawk dawn tan a. An hnathawh tum dan khu duhthu a sam loh hmel hlein ka hria a. Amaherawhchu, kan enchiang reng a, kan vil/veng reng a. Pu Deputy Speaker, kan bial hrim hrim hi ka sawi duh chu mberte hriatah pawh, kan biala hmasawna lo kal khu ka hrechiang ve khawp mai a. Tunah pawh hian hnathawktu leh sum eng zat nge lo kal tih hi kan hre vek a. Tin, a theih chin chin chu a video in kan ti vek ang a, a theih chin chin chu thlalak pangngai pawhin kan ti ang a. Chutiang chuan nakinah a tul chuan kan bial pum puiah khuan chhungkua zawng zawng sem tur pawhin emaw, heng hmalakna lo kal, sorkara hmalakna lo kal te hi. Chutiang chuan ruahmannate kan nei a. Chuvang chuan, khulai kan biala hnathawk tur leh thil in rawn ti a nih pawhin. CCTV hnuaiah hna in thawk a ni tih kha hria ila a thain ka hria a. Chutiang chuan kan ti thlap dawn a ni. Chu chu min hriatsak ula a thain ka hria a. Chuvang chuan, ningnel lutuka thil a kal a nih pawhin, tun chinah pawh khuan kan sawi ve chuk lo a ni mai a. Amaherawhchu, thil kal dan khu chu ka hre vek a ni. A hnathawktute, tunge an rawn tirh tih vel pawh kan hre ve vek a ni. Chuvang chuan nakinah thla kan lo la thlap ang a, a theih ang chu a video te pawhin kan nei thlap ang a. Chutiang chuan, khulaiah khuan sorkar kan lo venpui dawn a ni, tih kha min lo hriat sak ula ka duh bawk a ni. Chung chu ka sawi theih tawk ni mai teh se. Ka lawm e.

DEPUTY SPEAKER : Hun in hmang thiam hle mai, member zahawm tak tak te. Hun kha hman zawh kher loh kha a sual miah lo va. A chhan chu minute 10 kan

inpe a, dar 4-ah kan zawh hman a ngai si a, kan sawi tawh ang deuh khan. Chuvang chuan, kan sawi rei loh leh member-te sawihonaah kan tel tam thei dawn a ni. Eng pawh ni se, opposition group leader Pu Zodintluanga, Thorang bialtu MLA zahawm tak kan sawm ang a. Ani hian minute 15 a nei a ni. Ani sawi zawh hian Pu Ramthanmawia, E.Tuipui bial MLA zahawm takin a rawn chhunzawm nghal dawn a ni. Tiang zel khan kan ti ang.

Pu ZODINTLUANGA RALTE : Pu Deputy Speaker, ka lawm e. Tun session chhungin resolution pahnih kan chai a. An hmanhmawh riau mai ka ti a. A hmasa zawk kar hmasa lam khan district thar lawmna thu resolution kha an rawn pulut tawh a. Khatih hunlai pawh khan district boundary pawh la awm lo, a intih tan vel mek lain lawmthu an rawn sawi tawh a. Vawiinah pawh Pu Deputy Speaker, a thu hi “MNF Ministry-in hun reilote chhunga Zoram dung leh vanga kawng chhe tak hun reilote chhunga a siamtha mai hi lawmawm kan ti hle” an han ti tawl mai a. Han ngaihtuah chian chuan thla ruk chhunga Zoram dung leh vanga kawng chhia zawng zawng an han siamtha thei hi chu pui ve tak a ni. Amaherawhchu, member i dinglama thu, treasury bench atanga MLA-te, kan member te leh helamah pawh a sawi apiangin an bial chhunga kawng siam that ngai, kawng a that loh zia an rawn sawi tel vek khan Pu Deputy Speaker, he resolution an putluh hian an lungawilo tih kha a chiang a ni. Mizoram dung leh vangah kawng chhia zawng zawng an lo siamtha a, a lawmawm ti se la. An biala kawng chhia leh kawng siam tur an rawn tih zawng zawng kha sawi ngai lo tur a ni a. Amaherawhchu, member tin te khan an bial chhunga an harsatna te an rawn sawi kha an resolution-ah hian an duhhawplo hle, a dik tawh lo a ni tih a tichiang a.

Tin, budget speech kan sawi ni khan kan House Leader khan tunah hian budget hi kan khawih chauh a. A tak taka kan hman hun tur chu kum tawp lam a ni daih dawn a ni tih kha chiang takin a sawi a, hei hi thudik a ni. Budget hi tun karah, kar lehah budget session te kan zo ang a. Sorkar process an kal ang a. Chumi chhung chuan hna an thawh tak tak na tur chu kum tawp lamah a ni dawn a. Chutiang chu sorkar kalphung a ni a. Chung avang chuan, vawiina kan hnathawhnate leh kawng siamna tur atana hma kan lakte hi sorkar hmasa ruahmanna avanga lo kal a ni tih hi vawiinah hian ka rawn sawi nawn duh a ni.

Tin, Pu Deputy Speaker, Mizoramah hian kawng tha leh kawng lian project reng reng hi Congress a sorkar apiang chauhin a awm thin a ni. MNF kum 10 a sorkar kan hmu tawh a, an sorkar chhung khan khawi kawng nge anmahni irawm chhuaka an tih chhuah, sawi tur a vang khawp mai. Amaherawhchu, keini chuan Aizawl-Lunglei World Bank Road-te kha Congress sorkar hmasain ruahmanna tam tak a lo siam, DPR nen, World Bank-te dawra an sawi chhuah kha an hun laiin Congress sorkara sanction rawn chhuak hman kha an rawn thawk a ni mai a ni. A buaipuitu zawng zawng chu Congress sorkar kha a ni tlat.

Tin, project lian dangte han sawi ila tunah Chhunkhum Chawngte te, kum tluan maia MNF sorkar laia kawng chhe em em, kal ngaihna awmlo te kha, tunah chuan rawn kal ve teh u, double lane-a siam a ni a. An kawng laihte chu kawng kawi a awm tawh lo, an la mar vek mai a. Kawng laiah rin tawp mai ila football a khelhel theih a ni. Chutiang project liante chu Congress hian a siam thin a ni. Kan bialte hi kawng a chhiatzia an sawi thin. Kum 1998 Congress a sorkar khan Bungmun ah te bus a service thin a ni. Amaherawhchu, kum 1998 atangin enkawl loh a ni a, bus service lo hi hun rei tak kan hmu a ni. Lunglei Lungsen-Tlabung te kawng a chhe em em a ni, enkawl a ni ngai lo. Amaherawhchu, tunah rawn kal ula, Lunglei atangin Lungsen chu reilote chhungin kan thleng a. Kawng hna khu an thawk zo tep tawh a ni. Lungsen atanga Tlabung pheih chu reilote chhungin kan thleng tawh a ni. Tlabung bialtu zahawm tak ka bulah a thu a. MNF sorkar laia an mangan thin zia, fur laiin ration a thleng thei lo va, motor lian an kal duh lo a, truck an nuar thin a ni. Vawinah chuan chungtiangte chu a reh daih tawh.

Tin, Zemabawk atanga Tuipang thleng mai National Highway, double lane a a kalna tur te tunah hian ruahmanna a awm vek. DPR an siam a, tunah land acquisition ti turin D.C ten hma an la chur chur tawh a ni.

Khawthlang lamah member zahawm tak Pu Zira bial lam zuk hawi thla ila, Lengpui-Mamit, Mamit atanga khawthlang kal zelna turte khu a chhia an ti chu a dik khawp mai. Mahse kawng te lutuk, kawng liana siam tura hmalakna a ni. Kawng an laih lai chuan kawng chu a chhelo thei lo, amaherawhchu tuna an siam chinte khu zuk tlan ila, kawng nuam tak a ni, a hrechiantu chu an bialtupa, Engineer a ni a, a Chiang ang. Chung ang project lian zawng zawng chu Congress sorkar khan a lo siam a ni.

Pu Deputy Speaker, vawiinah hian he sorkar hi tunah a rawn kal ve tan chauh, kan en mek a ni. Mahse, kawng hi an ngaihtuah tawk em le? Anmahni'n an sawi ang hian kawng thatna tur hi an tui tak tak em le? Congress-in an tih kha an lo hman bak hi engtikah nge, engtin nge an chhonzawm dawn? Kan budget speech-ah khan kawng siamna tur atan nuai singkhat sangnga an dah a ni, a repair-na tur Congress sorkar kha chuan. Vawiinah Unstarred Question 69-na, PWD Minister zahawm takin a chhannaah chuan 2018-2019 atan PWD kawng siamna tur atana an dah chu nuai 20632.74 an dah a ni. Chu'ng an dahna turah chuan a list Mizoram-a kawng siamna tur zawng zawng, a list nen an rawn tichhuak a. Hengte hi Pu Deputy Speaker, vawiinah hian an thawk zo vek tawh em maw ni le? Congress sorkar-in ruahmanna kan lo siam tawh, heng zawng zawngte hi tun thla ruk chhung hian thawh zawhna hun a la awm lo. Amaherawhchu kawngpui dung, a langsar lai chu an ti dum zur alawm. Kha'ng kha hian lawmna tur a ni em?

Tin, kan ramah fur a rei a, thal chhungah chuan kan tlan pur pur alawm, khawilai khuarte emaw an han hnawh ve a. Thla leh atang chuan fur kan kai ve tan tawh dawn. Tuna Mizoram dung leh vanga kawng a that tawh tak thu resolution-a pass-te hi thla leh leh pekah hian kan zak ang em le? Vawiina he House zahawm takah Zoram dung leh vanga kawng chhia siam that hi kan lawm a nih chuan fur kan kai dawn, siam zawh hman a ni lo. A reality-ah hian i chiang ang u, a tak tak, a hunah hian i chiang ang u. Resolution-te hi kan duhthawh lutukah leh kan hmanhmawh lutuk, hetiang resolution a lo lut hi paw ka ti tak zet a ni. Tunah hi chuan siamthatna tur Congress sorkar-in nasa taka sum a lo dah tawhte hi tam tak hi chu Pu Deputy Speaker, tender-te pawh an lo chhan tawh, 'Construction of Lunglei bypass road Phase-I'-te pawh House-ah zawhnate kan han ngaithla a. Tunah chuan DPR siam that leh tur tih a ni daih tawh mai a ni.

Kan PWD-te kha a hmaa an siam kha engenge a that tawk lohna le? Vawiina siam leh tur hi PWD-te tho an ni. Hengte hi kawng tha kan duh, Lunglei chhim in saw lai kawng ni lo, kawng thar bypass-na tur kan siam leh Lunglei khawpui zauhna tura ruahmanna an lo lak tawh, tender-te pawh an chhuah, contractor-te pawh work-order an pe tawh niin kan lo hria a. Chung angte chu tunah siam that leh tur kan la ti laih laih chauh a ni. Chuvang chuan Pu Deputy Speaker, Mizoram-ah kawng siamna tur lian tha leh project lian reng reng hi chu Congress sorkar hun chhunga tih an ni a. An sorkar chhung hian khawi kawng hi nge kan lo hmalak

tawhna, DPR kan lo siam tawhnate, hma kan lo lak tawhna bak hi eng nge an tih tih hi kan lo en a ngai. Kum 10 an sorkar chhunga kawng siamna tura an tih, an sawi uar em em PMGSY-te kha vawiinah chuan CBI-in an larawn chhui a nih chu! Kawng siam kha a diklo lutuk a, induhsakna a nasa lutuk a, court-case a awm a ni.

Vawiinah hian kan officer-te chu court-ah an la kal zak zak a ni, an sorkar chhunga kawng an siam ve chu. Chuvang chuan Pu Deputy Speaker, kan resolution puluttu hi a hmanhmawh deuh hretin ka hria a. Tin, nichina an rawn sawi pakhat Contractor-te hna lian thawk tur hi kan awm a ni a rawn tih lai khan kan House Leader zahawm tak kha a rawn contradict-in ka hria a. Kan House Leader khan hmannah project lian tak takte hi central atangtea an rawn tender-te, Mizo fate'n a thawh theih loh a awm a ni tih kha chiang takin min hrilh tawh a. Chutiang te chu ka rawn sawi nawn leh duh a ni.

Tin, Aizawl khawpui chhungah ngei pawh nasa takin kawng chepna tur junction improvement-te Bawngkawn-ah a detail in sawi dawn ila chuan a mawi tawh lo a. Bawngkawn kawng chep takte tunah nuam takin motor kan inpel zung zung a, Republic lamah Pangi pengte pawh motor te pawh inpel thei lo te tunah chuan motor lian, bus-in an tlan pur pur a, Vaivakawn lam khawthlang lamah ni se University-a kal tur te, tlak lama haw tur te, motor te pawh inpel thei lo te chu junction tha tak kan siam a, hma kan sawn nasa em em a ni.

Chutiang tihnaah chuan Aizawl khawpui chhungah ngei pawh, Armed Veng atanga Ramhlun hnuaiah, Zemabawk lama kalna tur te ruahmanna tam tak siam a ni. Tin, Mizoram-in kan mamawh em em, Vaivakawn-University kawngte kha Pu Deputy Speaker, convocation an neih dawn a, President-te an lo kal dawn a vaivuta an chilphul thin kha Congress lo sorkar tirh phat atangin bul tan nghal a ni a. Kawng zim em em khu Luangmual chhote nawr zauin kawng tha tak siam a ni.

Pu Deputy Speaker, vawiinah Congress sorkar hmalakna tam tak a awm hi ka lo sawi chhuak ve duh a. Fur kan kai dawn a, vawiina Zoram dung leh vanga kawng chhia zawng zawng siam zo ta anga resolution han pass hi chu a la fuh tawk lo in ka hria. Ka lawm e.

DEPUTY SPEAKER : Hun i hmang zo tep a, a lawmawm e. Tunah chuan Pu Ramthanmawia, MLA zahawm tak i lo sawm ang u.

Pu RAMTHANMAWIA : Pu Deputy Speaker, ka lawm e. Vawiina Private Resolution ka rawn puluh hi thil lawmawm a ni a. Keini hi kan lawm a ni lo a, mipui an lawm a ni. Keini kan lawm mai a ni lo a, mipui an lawm avanga he resolution hi rawn lut niin ka hria a.

Vawiinah hian kawng tha leh thalo chungchangah hian vote thlak leh ta ila, mipui hi kan hneh lo viau ang, ‘a thalo a ni’ tiin tang ta ila mipui hi kan hnial hneh lo vang tih hi ka sawi duh a ni. Ka sawi duh chu, MNF a sorkar apiangin kawng hi a lo chhe ziah a, hun kha thlir kir ta ila, 1998 MNF a sorkar hmasak khan kawng siam ngaiin a lo awm ziah bawk a ni. Khawpui chhung kawng a chhe em em a, han mitthla ta ula, khatih hun laia PWD Minister zahawm tak Pu Tlanghmingthanga sawi hi ka hre reng a. Khami hun lai khan PWD in kawng siamna tur pawisa an nei lo tih a sawi a ni. Tichuan, official te khan ‘Ka Pu, pawisa a awm si lo va, engtinngte kawng kan siam ang? min ti a, E! kawngte chu alkatra-in alawm kan siam dawn, balu te, lung te in alawm kawng kan siam dawn, tiin ka chhang a’ a ti a ni. Tichuan, a sawi ang ngeiin Aizawl khawpui kawng chhe em em mai kha a dum hlurh a ni, mipui in an hre vek a ni. Chulaiiah chuan an duhthawh em em khawp a, kan la hria ang a, kawng a zau leh a zau ang angin a dum vek mai a ni, side drain to side drain a ti tawp mai a, kha kha thil awm ngai pawh niin ka hre lo va. Sawrkar hmasa, tuna kan CM zahawm tak Pu Zoramthanga kaihhruai sorkar atang tawh reng reng khan sorkar atanga bul kan tan nghal chat chu kawng chhe siam hi a ni ringawt mai, tun mai hi a ni lo, hei hi kan ngaihtuah theinghilh hmanin ka hria. Vawiina member zahawm takin lawmthu sawi nana Motion a rawn putluh hi vawiin mai hi a ni lo, kum 10 liam ta thil kha kan ngaihtuah kir a ngai. Mipui ten MNF sorkar min hriat dan ber chu thil dang a ni lo ‘kawng an buaipui, kawng an atchilh’ tih hi mipuiin min hriat dan a ni. Chu sorkar chu tha famkim lo mahsela mipui te tana pawimawh ber kan intawm tlanna leh hmasawna pawimawh tak chu kawng hi a nih avangin, chu sawrkar chuan kum 10 kal ta ah khan kawng hi a lo buaipui daih tawh a ni. Tichuan, a hnuah kum 10 sorkar a lo piang leh a, khami kum 10 sorkar chhunga mipuiin kan au hla leh kan hriat lar em em chu thil dang a awm vak lo, a tirah chuan ‘Kawng chhia’ a hnuah chuan ‘Zu zawrh’ a ni leh mai. Mipui min pek chu kawng chhia leh zu zawrh a ni. Sorkar hmasain thil a lo tih kha a lawmawm em em a, sum a lo dah te pawh kha a lawmawm, amaherawhchu vawiina ka ngaihtuahna chu Pu Deputy Speaker, Chhura te chengkek lawh tum ang deuh khan ‘Naa chu ni sela’ a ti

a a kuaikur a, a thlah leh tih ang deuh khan, khatiang zat sum dah si engatinge an lo hman mai loh, an lo siam mai loh, khami hun chhung khan tih hi ka zawhna a ni.

Chuvangin, sum awm leh awm loh hi a ni vak lo, ram hruaitute thinlungah hian engenge awm, englam hawiin nge ke an pena, engnge lam hawiin nge mipui hi min hruai, mipui tan enge kan chhawp chhuah dawn tih hi a pawimawh ber niin ka hria. Chuvang chuan, wawiina kan sorkar thar hian ka sawi tak ang khan, a ngaihtuahna chu mipui chhawk zangkhai tur leh an harsatna atanga khai chhuak turin hma a la a, chumi hma a laknaah kawngah a bur chat a ni. Hei hi thil lawmawm tak a ni a, hun reilo te chhungin khaw kar kawng zawng zawng siam zo turin kan beisei lo, amaherawchu kan tlan tam em emna kawng dung hi a ni tuna kan lawm thusawina langsar chu.

Hmanniah Lunglei kan kal a, kan thleng hma em em mai a, tun hmaa kawngtha ang chiah khan hma deuh ah kan thleng a. Chutiang bawkin Champhaiah Education Minister zahawm tak hoin Farkawn thlengin kan kal a, Champhaiah khan dar 12-ah programme a nei a, dar 6 velah i chhuak ang u a ti bawk si a, 'ngawi teh, ka pu, Champhai thleng tur chuan darkar 12 te an hmang thin a, thal a ni a, a rei lo deuh a, nih pawhin darkar 6 chuan kan thleng zo lo vang' ka ti a, ka huphurh thu tum hnih ngawt phone-in ka hrilh a ni. Mahse kan ti tawh si a, 'thlen a ngai a ni' a ti tlat mai a. Ka huphurh ru khawp mai a, kan han tlan ta a, kawng chu ka rin ai khan an lo siam chak viau mai a, kan tlan ta par par mai a, dar 12 ah programme a nei bawk si a, Kawkulh-ah chaw eiin kan han muangchang leh bawk a, dar 11:45 am ah Champhai Petrol pump khi kan thleng der mai a ni. 'E khai, sorkar thar chu a lo danglam hle a ni, darkar 6 pawh tling lovah Champhai kan thleng ta der mai, nikum maia darkar 12-te hmang thin kha a chanve in kan thleng hma ta der mai,' ka ti a, a mak ka ti a, ka huphurh tehlul nen. Chungte chu a ni a, hetiang taka kan Chief Minister zahawm tak leh PWD Minister ni bawk leh official-te chungah hian wawiinah lawmthu sawi ngaiin ka hria a. He lam hi kan bial lam a nih avangin Aizawl atang chuan Farkawn chu km 290 vel a ni a, kan paltlang reng reng a, Champhai kawng a chhiat thin em avangin Lungdar lamah, Biate-ah kan kal a ni; kan hel thin a ni, kawng chhe deuh mahsela, a kawng a tawi avangin Champhai hi kan tlawh vak ngai lo a ni. Hmannia kan han kal chu thil thar lawmawm tak mai kan han hmu a, kawng a lo mam tha em em a, tlan te a lo nuam a, kan hmuh chu Motor atanga nam chhuak tih lam ni lovin kawng an lo siam laih laih mai a ni. Thil a

danglam nasa hle mai tih kan han hmu a, lawmawm pawh ka ti a, tuang takin kan kal a. Heng hi ka sawi duh chu, kan hruaitute rilru put hmang hi a pawimawh a, a dik a ngai a, an tum lam hi a chian a ngaiin ka hria.

Kan mipuite kan ti rethei rei em em a, kawng chhia kan buaipui nasa a, thingpui dawrah ni se kawng chhia, mipui ti ti hi kawng chhia tih hi a ni vek mai a, hrehawm kan ti tlang a ni. Mi lian leh mi te in kawng chhia hi kan tuar a, motor nei mai ni lo, passenger te hlei hlei hi a tuartu leh hrehawm titu an ni. Chuvang chuan, he kawng chhia tunah kawng tha a lo awm chho tan hi lawmthu sawi lohna rual a ni lovin ka hria a, Zoram mipui hi an lawm a ni. Tunah hian kan bial lamah pawh hma lak tan a han ni te hi lawmawm ka ti a. Tunhma kum sawm chhung khan sawirik a awm reng renglo vek a ni, hengte hi thil thar a ni. Engatinge kum sawm chhung khan East Tuipui lamah khian kawng siamna tur boruak a awm miah loh ? Tun sorkar tharah hian a lo awm ringawt mai te, hengte hi chu thil danglam tak a thleng a ni tih hi sawi loh rual a ni lova, ka han sawi chhuak duh a.

Tin, member zahawm tak Pu Chhuana rawn sawi kha kei pawhin tha ka tih chu, tuna kan kalphung bituminous alkatra a kawng kan siam hi zawi zawia cement concrete-a kan leh hi a ngai khawp mai a. Rangoon leh Mandalay inkar khu national highway a ni a, kawng thui tak a ni, mel za tam tak a ni, cement concrete vekin an siam. Khung lamah te phei chuan ruah tui a tlem zawk lehngal a, keini ramah hi chuan kan leilung leh ruahtui tam avang hian alkatra hi a tlo thei lo a ni. Chuvangin ruah tui ngam ber chu cement a nih avangin cement concrete-a kan kawng hi (tlan hrehawm deuh hlek mahse) kan leh chhoh zel hi a ngai. A repair a awl bawk si a, thingtlang pa in a repair thei a ni, in chhuan khuk vut vut leh midum an ngai lo, thing a ngai lova, labour an ngai vak lo. Khalaia a chhia kha lo siam rawh u tih chuan thingtlangpa khan an siam vek thei, chuvang chuan cement concrete-a kan kawngte pawh hi a tlon turin zawi zawia kan leh chhoh zel hi a tul mang e aw, tih kha Pu Deputy Speaker, ka rawn sawi nawn leh duh a. Kan hmalak zelna turah kawng tha leh kawng tlo, kum 15 repair ngailo tur, cement concrete lam hawi zawnga ke kan pen hi kan ram tan, ruahtui a tam si a, a tul awm mang e aw ka ti a, chungte chu ka rawn sawi lang ve a ni e. Ka lawm e.

DEPUTY SPEAKER : Dr. Z.R. Thiamsanga, Champhai North MLA zahawm tak i lo sawm ang.

Dr. Z.R. THIAMSANGA : Pu Speaker, ka lawm e. Member zahawm tak Pu Zothantluanga private resolution “MNF Ministry Pu Zoramthanga kaihhruai in thla reilote chhunga Mizoram kawngpui chhia a thuam tha hi lawmawm kan ti hle” tih a rawn pulut hi lawmawm ka ti hle a. Tin, hei hi pass ngei pawh thain ka hria a. Member tam takte khan an rawn sawi tawh a, Chief Minister hmathlir thiam tak, a taka thawktu, PWD changtu ni bawkin hma a han la hi a ropui hle a. Member zahawm tak tak Palak bialtute leh Hachhek bialtuten Congress sorkar-in a lo ruahman tawh a ni a, lawmthu sawiah hian Congress te pawh a tel loh chuan sorkar hmasa te kha a ni thei lovang a, an han ti te kha nichina ka hmaa member zahawm takin a rawn sawi tawh ang khan, engatinge pawisa awm tawh si, financial year tawp dawn atana pawisa hman tur chauh a kum sawm chhung khan engatinge kawng hi an lo siam that loh tih kha kei pawh ka zawhna a ni. Sorkar-na MNF Ministry-in a rawn chang a, reilote chhungin a ngaihpaawimawh berte hi chu pakhatnaah chuan kawngpui tha a ni. Pahnihnaah chuan Health Care a ngai pawimawh a, Education a ngai pawimawh a. Tin, SEDP mi retheite chhanchhuahna tur, hetiang a vision tha tak nei Chief Minister kan nei hi a lawmawm hle a ni.

Tin, kawng chungchangah chuan a bik takin kan Chief Minister hlui Pu Laldenga pawh khan sorkarna a rawn chan khan kan Aizawl khawpui Bawngkawn, Ramhlun sawnglai kawng chep tak tak te, tih zauh nana hmalatu chu Pu Laldenga kha a ni. Tin, sawnglai kawng khuar reng mai Sikulpuikawn, Thakthing kawng chhia zawng zawng concrete-a siamtu chu MNF sorkar kha a ni. Chuvang chuan kawng hi kan sorkar hian a ngai pawimawh hle a, a lawmawm a. Nichina member zahawm takin a rawn sawi tawh ang khan Champhai - Aizawl te pawh kha kei pawh ka lo kal tawh thin a, nikum Congress sorkar hun chhung khan darkar 12 kei ngei pawh hi ka kal tawh a ni, a hrehawm khawp mai. Damlo-te pawh tam tak chu an kir phah a, a then phe chu kawng lakah boralte an awm a, a hrehawm khawp mai, a lungchhiatthlak khawp mai. Amaherawhchu, tun hun reilote chhungin kan Chief Minister chak tak hmalaknain sorkar-na a han siam a, central-ah a

han kal thla a, pawisa, Congress sorkar lai ami chu a ni ngei mai, amaherawhchu, khang zawng zawng hun reilotea, heng kan kawng chhia a hman theih tura ruahmanna a han siam a, central-ah kan department hotute nen, kan Transport Minister-te nen, tiang khan ruahmanna fel fai tak hun reilote chhunga an rawn siam thei hi a lawmawm ka ti. Seling- Champhai kawng khi tunah pawh an siam a, kan hria a, darkar 12 kal thin darkar 6 lek maia kan han thleng te hi a ropui khawp mai.

Tin, Pu Speaker, tun kan session hmasa zawk hma deuh hleka Khawzawl leh a chhehvela i han kal pawh khan, khilai Champhai kawng truck engemaw zat kawngdungta tlu kha i hmu ve ngeiin ka ring a, kan Sports Minister zahawm tak pawhin a hmu ve ngei ang. Kei ngei pawhin ka hmu a, a thlate pawh ka rawn la a nih kha. Tunah chuan kawngsira truck tlu sawi tur pawh a awm tawh lo, a ropui hle. Thil mak deuh tak chu Seling tlangval titi a ni a, kan sawi mai ang e. “Congress sorkar ka ui na ber chu Tuivawl leh Dulte inkarah khian tunhma zawng khan nikhatah hian truct pali panga a tlu thin a, MNF an lo sorkara, kawng a lo tha ta vek mai si a, inhlawhna tur pawh kan hmu zo tawh lo,” an ti a ni. Kha kha a ni kan dinhmun chu, a inang lo teh a ni. He sorkar hi chuan hma a la nasa, kawng zawng zawng chu kan ti lo. Amaherawhchu, Mizoram dung leh vang hmun pawimawh zual hi chu tun hun reilo te chhung hian an siam tha a ni. A changtu department pawh an fakawm hlein ka hria a. An repair tha lo lai, patch repair kan ti a, khatiang tha lo zeuh zeuh lai te chu a awm ang, sanction pawisa a tlem avangin. Amaherawhchu, a tlangpuiin Department-te pawh hi an thawk tha. Department concerned-te chungah pawh hian mipui hian lawmthu kan sawi a ni.

Tin, tunhma chuan road roller te, JCB te an ding mai mai a. Tunah chuan road roller-te an indaih loh vang a ni kan kawngte kan sial that hmanloh ni, Pu Speaker. Kan Chief Minister zahawm takin kan indaih loh thu te, kan lei belh thu te pawh a rawn sawi a, a lawmawm khawp mai a. Tunhma, JCB ding mai mai thin, hna an han thawk ta suau suau mai te hi, he sorkar hi chuan hna a thawk a ni tih a chiang khawp mai.

Hun reilote a la nia, mahni bialah kawng tha lo te chu a la awm ang chu, kan sawi ang chu, kha kha chu duhthawhna a ni. Tunah pawh hian Champhai-ah khian PMSGY kawng engemaw zat a awm a. A bik takin Khawzawl-Tualpui tih te khi

hma an la chak lo khawp mai a. Tin, Tualcheng-Selam changtute, Tualcheng-Lungphunlian changtute, khingah khian hna a muang lutuk a ni. Chung chu sorkar hmasain contractor a lo thlan te kha an ni si a, a buaithlak khawp mai. PWD-a kan hotute pawh vawi tam tak ka hrilh tawh a, anni pawhin hma an la nasa a. “Khawzawl-Tualpui phei khi chu Show Cause Notice-te pawh pek an ngai tawh hial lawm ni?” min ti hial a ni. Chuvangin, a thawktu contractor-te hi engtingge kan sorkar pawh hian tun aia nasa zawk deuh hleka hnathawktu lo thlan tawhte pawh hi nawr deuh dan awm se. Bial thil te chu kan sawi tur chu a ni a. Champhai bialah khian kawng khuar tak tak a awm a, kawngpui harsa zual, la intlawhpawp lo, la sial loh te a awm a. Tualpui, Ngaizawl leh Neihdawn zu kal dawn hian Khawzawl-ah kan kal a, Khawzawl atangin Tualpui-ah kan let leh a, Tualpui atangin Khawzawl-ah, Khawzawl atangin Neihdawn-ah, Neihdawn atangin kan let leh a, khatiang khan Ngaizawl te pawh kan let zel a ni Khawzawl-ah hian department lampangte pawhin concept paper-te pawh min han siam sak a. Tualpui, Neihdawn, Ngaizawl-te pawh min han siam sak a. Aizawl atanga Champhai te 40km vel laia hnai zawka siam theihna turin Tualcheng – Hliappui- Champhai. Khami a kar kha chu Tualpui emaw, Rabung emaw kaltlang pawh khan ni ta se. Khi khi tunah khian concept paper-te pawh min han siam sak a. Kan sorkar pawh hian min tih hlawhtlinsak ngei pawh kan beisei a. Khilai kawng khi a pawimawh a, kawng hnai kan duh a, double lane-te pawh siam turin ruahmanna te pawh a awm in kan hria a, Seling-Champhai-te pawh. Chumi tih chhung chuan kawng dang kan neih a ngai dawnin ka hria a. Hma min lak chhoh sak ngeite pawh kan beisei a.

Pu Speaker, ka sawi tawh ang khan khing Tualcheng- Selam te pawh sorkarin PMGSY-ah hma min la a. Hmanni-ah i bula ka sawi tawh ang khan Selamte pawh khi agriculture-ah te pawh potential area an ni a, “Alu te pawh ka rawn thar tem ang che u” ka tih tawh kha. Kawng khi tlemin tunah khian an fur leh deuh a, tlemin kalkawng pawh a chhe leh deuh hlek a, tunah hian an rawn phur thei lo a ni. Kan sorkar chak takin kawng a ti chhia ni lo in, an lo sialsa kha an hmalakna a chak loh avangin tunah kawngah khian a rawn tang a. Alu hi member zahawm takte thar tem te pawh kan duh a. Chumi a thlen theih ngeina tur pawhin hma te pawh min laksak ula ka duh hle a ni.

Pu Speaker, tuna kan resolution hi a pawimawh a. A tawp ber atan chuan Kulikawn atanga Zoram Medical College kawng hi a lun dawn chauh a, damlo kalna tur a ni a,

double lane tha taka an kal theihna turin a theih anga ranga kan sorkar hian ruahmanna a siam tawh mai thei a, a siam lo a nih chuan Kulikawn atanga Zoram Medical College thleng tal hi chu a hma thei ang bera min sial sak hi a pawimawhin ka hria a, ka rawn sawi a ni.

Vawiina, private resolution rawn putlul hi a tha ka ti a, pawm ngei turin ka rawn rawt bawka ni e. Ka lawm e.

SPEAKER : Member zahawm tak Pu Vanlalhlana, chumi zawhah Pu Lianchung.

Pu VANLALHLANA : Pu Speaker, ka lawm e. Vawiina member zahawm tak Pu Zothantluanga resolution hi “MNF Ministry-in reilote chungka Zoram dung leh vanga kawng chhe tak a siamtha mai hi lawmawm kan ti hle,” tih a ni a. Kan sawi zau viau mai a, member ten. Tha tak takte ngaihthlak a ni a. A then kha chu ka sawi atan ka it ang reng khawp mai, ngaihnawm te ka ti.

Hemi resolution hi ngun taka han ngaihtuah hian a awm viau a. Amaherawhchu, a wording ‘siamtha mai hi,’ han tih hian, a siam tha zo tawh a, lawmthu kan sawi tur ang deuh hian a hriatthiam theih em aw ? ka ti a. Chu ai chuan Zoram dung leh vanga kawng a siamtha mek hi. (A chhan chu a siamtha mek a, a la siam tha zel dawn bawka si a) tih khan hriatthiam a nuam deuh awm mang e aw ka ti a. A ngialngan anga han ngaihtuah hi chuan a siam tha zo vek tawh a, chumiah chuan lawmthu kan sawi ang deuh hian a lang a. Engpawh ni se, siamthat lam hi chu ka phur zawng a ni a. Kawng siam chhiat tih ai chuan siam tha han tih lai hrim hrim te pawh hi a lawmawm ka ti a. Kan ram in a mamawh lai tak te pawh a ni. Kawng chungchang kan sawi tam hle mai a, kawng chungchang resolution a ni bawka. Kan kawngte hi national highway te, state highway te, district road te, village road te, town road te tih a ni a. A vaia kan kawng neih hi 5732.10 km a ni. Chutah chuan surface road chu 3823.81 niin Statistical Hand Book chuan min hrilh a. Kan state tet ngaihtuahin kawng hi kan nei chhe vakin a lang lo va. Kan road density pawh hi per sq.km 27.17 a ni a, phairam te nen kan intehkhin theilo ang a, a chhe lutuk lo ni te pawhin a lang a. Heng hi eng vanga lo awm nge, engtia lo awm nge tih kha a bul tan nan han sawi ka duh a.

1978-79 velah khan Mizoram khua zawng zawng 30% vel tur ang hi motor-in a pawh chauh a ni. Tin, Aizawl-Lunglei road te pheichu Bawrsap S. Barkataki

hun laiin Mizote'n hnatlanga kan laih tlang a ni. Kawng kan nei chhe em em a, 1978-ah khan 30% vel ang chauh motor-in khua a tlawh a. PC Ministry lo ding khan kawng chungchangah master plan a siam a, Mizoram hi a dung zawngin thlur 10, a vang zawngin thlur 15-in khua zawng zawng tlawh turin master plan siam a ni a. Chumi master plan ang chuan khua zawng zawng motor-in a tlawh bakah agriculture potential area-te pawh kawngin a pawh tura beisei a ni. Tichuan, sorkar chuan tihlawhtling turin theihpatawpin tan a la a. Tunah hian Mizoram khua zawng zawng 100% chu kan ti ngam lo ang a, 95% aia tam mah tur hi motor kawngin a tlawh tawh a, lawmawm ka ti khawp mai. Chungah chuan a kawng kal dan han en hian PC hun lai, 1978 chhova master plan lo buatsaiha kha thui tak bawhzui a ni, tihlawhtlin a ni tih te pawh a lo lang a. Tin, state sorkarin nasa taka hma a sawn bakah central atangin PMGSY policy-te lo awmin, chung hmang chuan khua motor la tlawh miahlohte khan motor an lo neih phah ta a, thil lawmawm tak a ni.

Tichuan, kan resolution bikah hian han sawi dawn ila. Kawng a chhia a, sorkar hmasa kha kawng chhiat avangin nasa takin a hmingchhia a.

Amaherawhchu, an hmingchhe thup nan chuan a ni lo ang a, sorkar hmasa kha a hming chhia a ni tih a hria a, chuvang chuan kawng siam thatna turin 206 crore kawng siamna tur hi a dah ve bawk a ni. Amaherawhchu, engnge a chhan kan hre lo va, an siamtha vak lo. Tichuan sorkar thar a lo ding ta a. Sorkar thar lo ding chuan kawng arawn siam tha ta a ni. Chuvangin, Pu K.T.Rokhawa sawi ang deuh khan a pawisa dahtu te pawh kha vawiinah hian theihngihl loh kha a tha ve tho mai. Vawiina sorkar thar hian budget a la pass lova, kawng siamna tur kha a la dah tak tak lo va. Amaherawhchu, kawng chungchang hi sorkar thar hian a ngai pawimawh a ni tih a lang a. Vaibelchhe 2000 kha kawng chhe siam nan a dah tlat a ni NEDP-ah. Chuvangin kawng chhiat zia hriain sum tam tak dah a ni a. Sorkar dinglai hian hma a la dawn a ni tih a lang a. A siam tur pawh vawiinah hian member ten kan sawi nasa a, kei pawh sawi ve ka duh a. Aizawl North I-ah khian infrastructure development hi tih tur tam tak a awm a. Session hmasaah pawh kan sawi tawh a, kan House Leader ngei pawhin min hriatpui niin ka hria a. A bikin ATC atanga Rescue Home panna kawng metal chhe lutuk te, Durtlang atanga Sihphir panna kawng te lutuk leh kawng kawi lutuk ang zawng zawngte khi han lak ngil deuh te a tul em em a ni. Tin, Centenary Road kan ti mai a, Durtlang Biak in atanga Zuangtui road zuk pawhna kawng te em em mai, kual chhuk chho bawk si te

pawh khi kan ngai pawimawh em em a. Chu chu wawiinah hian kan tarlang leh duh a.

A tawp bera ka sawi duh chu kawng a chhia a, siam that a nih a, lawmthu hial sawina resolution te a awm ta a. Engatinge kawng chhiat chhan tak hi? A chhan hrang hrang sawi tur a awm a, kan ngaithla nual tawh bawk a. Pakhatnaah chuan drain a that loh avangin kawng a tha lo. Pahnihnaah chuan kawngchhia kan tih hian metal road chhia hi kan mean tlangpui niin a lang a. A chhan chu metal road a la nih loh hi chuan a chhe leh zual a, chhe leh tur chuang a awm chuang lo te pawh a ni mai thei a. Kawng chhia kan han tih taka hi chu metal road chhia hi a ni a. Metallin an tih laia uluk loh pan lutuk te, lung no lutuk te pawh a ni thei a. Chuvangin chung ang te pawh chu tunah patch hole te pawh hi a hun lai a tir te a repair hi chuan thui tak hi a dam a, kawng a tha mai a ni. Amaherawhchu, kha kawngchhia kha a tira ngaihthah chuan a lo zau zel a, a lo zau zel a, tlan hrehawm khawpin a lo zau va, a lo hrehawm a, kawngchhia kan tih kha a lo awm ta mai a ni. Chuvangin, maintenance hi a pawimawh a, a chhiat tirh lai te a patch hole te pawh hnawh zung zung khan nasa takin kawngchhia kan tih te pawh hi a vang dawn a ni tih kha ka sawi duh a, tuna sorkar lai hi kan hriattir ve duh a ni. Vawiinah hian kawng chungchang kan sawi a, sawi dan tur thui tak a awm a, mahse tul lo sawi vak kha tulin ka hre lo va. Chu chu ka duh tawk ang e. Pu Speaker, ka lawm e.

Pu C. NGUNLIANCHUNGA : Pu Speaker, ka lawm e. Ka hmaa member zahawm tak Pu Vanlalhlana sawi ang deuh khan wawiina kan resolution sawi tur hi member zahawm tak Pu Zothantuanga, Aizawl West I resolution hi “MNF Ministry-in hun reilote chhunga Zoram dung leh vanga kawng chhe tak a siam tha mai hi lawmawm kan ti hle” tih hi Zoram dung leh vang chu a ni lo a ni, Pu Speaker. Amaherawhchu, Vairengte atanga Lunglei thlengte chu ti ila a dikte pawh kan ti thei ang a, Zoram dung leh vang chu siam that a la ni lo a ni. Amaherawhchu, hetah hian “MNF Ministry-in hun reilote chhunga Zoram dung leh vanga kawng chhe tak a siam mek hi chak taka kalpui ni se emaw, a siam mek hi lawmawm kan ti” tih tal ni se a dik awm mang e aw ka ti a.

Pu Speaker, resolution hrim hrimah hian, kan bial ve angah pawh Hmarkawn Chamdur road-te chu chhe tak mai a ni a, thal chhung a ni a, a la kal theih tawk tawk a, fur an ni leh ang a tih ngaihna a awm dawn lo hrim hrim a. Pu Ramthanmawia,

MLA zahawm tak, East Tuipui bialtu khan vote thlak tha leh ila a tih kha, hmanni-ah Farkawnah kan naute kan sial saw lama sawn turin ka va lak tir a. Kawng a chhe lutuk a, Champhai atanga Farkawn kha, Dungtlang atangin Khawbung kal turin kan ti a, East Lungdar lamah kawng a chhiat avangin an kal ngam lo a, helamah an hel a ni. Chutiang chuan kawng hi a la tha zo lo a ni.

Kan sawi tak ang khan sorkar hmasa khan kawng chhia hi a hre khawp mai a, theihtawpin tan pawh a la a. Kum 2017 leh kum 2018-ah khan kawng chhe siam nan hian PWD-ah NEDP atangin cheng nuai 11319 ngawt kawng chhe siam nan hian a lo dah a ni. Tin, hei vawiinah vanneihthlak takin Starred Question, ka zawhna, kan Chief Minister zahawm tak PWD changtuin ziakin min chhang hlauh mai a. Pu Speaker, khawngaihtakin i phalnain ka lo chhiar chhuak teh ang. Kum 2018-2019 chhunga PWD sum NEDP atanga dah zat min hrilh thei em? ka ti a, 'Thei e' a ti a. Eng hna atante nge dah a ni tih ka zawt leh a, chuta min chhannaah chuan sum dah zawng zawng chu cheng nuai singhnih sanghnih leh zali leh sawmkua leh pali leh nuai sawm nga leh pali, chuta tang chuan kawng siamna tur bik atan cheng nuai sing hnih, za ruk sawm thum pahnih leh sing sarih sangli hi kawng siam nan dah a ni.

Congress sorkar kha kan dem viau a, a dikna chinte pawh awm thei mai thei e. Keini kha kan vanduai a, kan hriat angin Zoramah ruah tui Congress sorkar lai khan a tla nasa em em a. March atanga November, december thla thlang deuh thaw khan kum tin mai khan ruah a sur a ni. Hnathawhna hun a tlem hle a, Department lam pawh a tang a, sorkar pawh kha theihtawpin a tang a ni. Thawk reng reng lo ang maia kan han indah mai kha chu dik bik hian ka hre lo a ni Pu Speaker. He kan ram rorelnaah hian thu dik sawi thain ka hria, Congress sorkar kal ta, Pu Lal Thanhawla kaihrui khan kawng chhia kha a hre khawp mai, chumi avang chuan ka sawi tak ang khan kum 2017-2018-ah pawh cheng nuai sing khat chuang lai a lo dah a, NEDP atangin. Kum 2018-2019-ah cheng nuai sing hnih ngawt a dah a. Kha kha pawisa awm reng eng vanga hman loh nge a nih te kan ti a, member zahawm tak takte kha thil hre tak tak in ni a. Sorkar kalphungah vawiinah budget tun tumah kan pass ang a, kan pass atang hian a hman nghal mai theih loh tih kan hre vek a ni.

He sorkar pawh hi a kal ang a, a last term, a kum tawpnaah chuan budget hi a hmang hman meuh lo ang. Sorkar lo kal leh turin, November-a inthlang tur kan ni a,

sorkar tharin a hmang tlangpui a ni. Congress sorkar khan pawisa kha kawng siam nan khan a hmang thiam lo a ni hauh lo, mahse, sorkar kalphungah Finance te, Planning-te paltlang a ngaih avangin kha sum kha PWD-ah, Finance atanga a la chhuah loh avanga hmang lo mai a ni a. Kawng siam kha a ngaihsak lo hrim hrim emaw, a ngaihthah hrim hrim emaw lam a ni lo. Kawng chhia a hriat chian em em avangin cheng nuai sing hnih chuang teh meuh a dah a ni.

Tichuan, kan inthlang a sorkar thar a lo piang ta a. Chu sawrkar thar chuan kha PWD head-a sum hman tur awm kha kan Chief Minister zahawm takin, ani pawhin a ngaipawimawh, Zoram dung leh vang kawng a chhia a ni tih a hre chiang. Pawisa lo awm sa a nih avangin awlsam takin a hmang mai a ni. Pawisa kha budget-ah awm lo se khawi atang mahin hman tur a nei dawn lo reng reng, chuvang chuan wawinah hian Pu Speaker, he House zahawm tak hi politics khelhna ni lo se la, ram rorelna a ni tih hi i hre tlang ang u tih ka sawi duh.

Sorkar kal tawh khan a theihtawpin PWD-ah a ni emaw, eng department-ah pawh an theih tawkin an thiamna, an finna an hmang, wawiina kan sawrkar thar pawh hian a hmang ang tih ka ring. Chutiang chu kan kalphung a ni tih hi hria ila. MLA zahawm tak tak ten kan han sawi tlang a, a lawmawm ka ti a. Chutih rualin wawinah hian hmabak tam tak kan la nei, tun hi chu thal a ni a, wawiina kan sawrkar thar lo piang MNF sorkar hi Pathianin a hruai pawhin ka hria. Congress sorkar laiin March atangin ruah a sur thin a, hnathawhna hun a tlem hle. Vawiin June 21 thleng ruah sur tak tak hnathawh harsatna a la awm lo.

Hengte pawh hi Pathian hruaina a ni tih hi i pawm zawk ang u tih ka sawi duh. A inpuh chhe zawng emaw, a inbel chhe zawng emaw a inchirh theh zawng emawin kal lo ila. Vawinah hian tunge Mizoram kawng chhia duh awm ang? Tumahin in duh lo ang kan duh lo ang, Amaherawhchu, thawhna hun a awm lo a ni tih lai hi Pu Speaker, ka sawi duh a ni.

Tichuan, kan kal chhohna turah hian Lawngtlai East bialtu zahawm tak pawhin a sawi a, thingtlang khaw penhle state road tih ang chi te a la chhe vek. Fur a han tla ngat mah ang a, kan inhnuk leh khawp ang. Motor tang a awm leh khawp ang, chu chu department inthlahdah vang pawh a ni lo, vawi leh khatah tih zawh vek sen a ni lo. Zoram a lo zau a, tun sorkarin kan ngaipawimawh em emin kan sawi a, SEDP-ah cheng nuai 15,000 kan dah a, kan Finance Minister zahawm tak speech-ah

khan heti hian dah belh a ni. PWD,Road Fund Board atan kan ram chhung kawng chhe lutuk thawm thatna turin SEDP hnuaiah cheng nuai 15,000 dah tawh bakah khan cheng nuai 5000 dah hran tum a ni bawk a ni a ti. Cheng nuai 15000 dah a ni a, nuai 5000 hi dah hran tum a ni a ti. He sorkar hian a rawn ngaipawimawh a a lawmawm. Kan ramah hian kawng tha rawh se, inkalpawh theuh ang u, ei leh barah pawh intodelh theuh ang u, chu chu ram rorelna kan kalpuina tur pawh a ni ang. Congress sorkar kalta dem vak vak mai leh inchirhtheh vak vak mai kha chu Pu Speaker, kum sawm chhung khan kan siam ve tehmeuh mai, kum sawm chhung khan kawng a chhe lo, Pu Speaker, kum sawm chhung khan kawng a chhe lo va, kan sawi tak ang khan kum 2016-2017 pawh khan cheng nuai singkhat leh sangkhat leh tihlai kawng siam nan dah a ni, kha lo pawh kha kumtin dah a ni.

Tunah sorkar a kal dawn a, kan han en chho ang a, waviinah hian Pu Speaker, member tharte kan ni hlawm a, han thut hian Sai tia a inhmuh hi awl tak a ni, amaherawhchu, a tak ram han thawh dawn chuan rinaiin thil hi a har viau zel a nia. Minister zahawm tak takte pawh kan la phur lai a nia, mothar lai chuan dam chhung atan nupui kan han nei a, mahse hmarcha thak leh al chungchangah pawh 'chhuak rawh' in tih mai hi awl tak a nia, hun a kal deuh chuan. Chuvangin, waviinah hian Pu Speaker, he kawngchhe chungchang thua hian indem lutuk lo ila. Amaherawhchu, waviina lawmthu kan sawina turah pawh hian Zoram dung leh vang han tih hi chu a la ni deuh em maw ni le? Entirnan, Pu Rokhawa bialte Saiha atanga Niawhtlang, Chakhangte a chhe em em a ni, fur a han tla leh mah ang a, hnatlang Congress sorkar laia kan uar em em kha a thleng ve leh tho ang. Chutiang chuan kan bialah Chamdur road, Hmawngbu thleng kalna kawngah hnatlang tho a kan thawh a ngai ang, a chhan chu hna thawh a la ni tlat lo, chu chu kan hmabakah a la awm a ni tih hi hria ila. Thil tisual theilo leh tichhe theilo awm ang hiala serafim anga thianghlim anga inngaih tur hi a la ni bik chiahlo a nia, kan la kal chho dawn a ni.

Tin, Pu Speaker, damte in kan awm ang a, Vairengte-Tuipang hi JAICA-in NH 54 hi double lane-a laih tur a ni a, nichinah khan member zahawm takin a sawi tawh a, compensation te buaipui mek a ni, chumi hunah chuan kawng tha zawk a awm theihna tur atan kawng an laih lai chuan a chhe leh ngei ngei dawn, chu chu ngaihsak loh vang ni lovin, a tha zawk awmna tur a ni. Chutiang chuan Aizawl atanga Mamit kawngte pawh an laih lai chuan a chhia a ni, amaherawhchu waviinah chuan an lo ti zo ta a, a tha tawh a ni, a tlan pur pur tawh a ni tiraw Pu Zir? Khatiang

ang kha a ni a. Chuvang chuan, inchirhtheh vak vak lam hi kalsan ila a tha awm mang e ka ti a.

Tin, hei resolution pahnih kan nei a, he kan rorelna hi ram tan a ang lo em aw ka ti a. Opposition a kan thut ve vawikhatna a ni a, kan resolution han neih vete hi kan ram rorelna, kan ram/kan hnam in hma a sawnna tur zawk Private Member Resolution te hi awm zawk ta se. Kan hnung karah khan district thar, ramri pawh la awmlo lawmthu kan sawi a, a tha tho e. Vawiinah Mizoram dung leh vang la siam zawh lohah lawmthu kan han sawi leh a, hei ai chuan he sorkar thar hian ei leh bara kan intodelh theih nan chak takin hma la rawh se tih te, kan hriselna kawngah hma kan lo sawn theih nan chak takin hma la rawh se tih te hi he House hian pass zawk ta ila, chu chu ram rorelna a ni zawk dawn lawm ni?

Pu Speaker, a tawp nan pakhat chauh ka sawi duh chu, vawiina resolution kan sawi dawna ka rilrua awm chu, thenkhatin kei Apollova pawl, kei Paula pawl, Paulan a phun a, Apollovan tui a pe a, Pathianin a than tir mai a ni. Vawiinah pawh hian he ram ro kan relnaah hian Pu Lal Thanhawla ten emaw, Pu Zoramthanga'n a ni emaw hma an lo lak kha hawh u, pawimawh hi chu i chhawm nung zel ang u, pawl pawl emaw, a chhe zawnga ti lovin, NEDP hmalakna pawh SEDP-a chhunzawm tur a awm a, vawiinah lawmthu ka sawi a, chutiang chuan hawh u, vawiinah hian he ram rorelnaah hian a chhe lai leh a pawr lai ringawt hi inhmuh sak lo ila, kan hotu hmasaten theihtawp an lo chhuahnate i in hriatsak ang u tih hi ka sawi duh a ni e, ka lawm e.

SPEAKER : Kan sawihona a hlimawm e. A thenin in siamtha vek lo an ti a, a thenin an siam tha vek hman bik lo a lawm an tih ang vel a nia. Khi dar li khi rilruah a awm reng mai a, amaherawhchu Minister zahawm tak a phar tlat mai a, a zahawm si a, Pu C. Lalrinsanga Minister zahawm tak i sawm ang.

Pu C. LALRINSANGA, MINISTER : Pu Speaker, ka lawm khawp mai, hun ka'n en a, hun awm tawh chiahlo tura ngaihna ka nei a, thu tawite han sawi ve ka duh a, thui ka sawi dawn lova. Ka hma ami rawn sawi kha a duah tha hle mai a, a dik pawh a dik tho a, amaherawhchu, ka chhut vena zawnah chuan ministry kal teah khan kawng maintenance hi a awm thlawt lo a ni, kawng reng reng hi maintain a nih chuan a chhe zung zung mai lo. Tun tumah pawh hian kan House Leader zahawm tak hian a ngaih pawimawh a nih tlat avang hian kawng kan nei tha a ni mai

a, lehlahmah chuan kha leh chen opposition a lo awm tawh kan ni a, hna han inpekna atan pawh hman a chakawm em em a ni, mahse khalam kha a ngaihtuahnaah a awm lo, kawng a that hian mipuite kan lawm a ni tih kha a rilruah a lian tlat a.

Tichuan, vawiinah Pu Zothantluanga resolution “MNF Ministry-in hun reilote chhunga Zoram dung leh vanga kawng chhe tak a siam tha mai hi lawmawm kan ti hle” tih hi ka'n thlawp em em mai phawt a. Tichuan, ka sawi tum tak chu kawng tha in a nghawng point li lekin han sawi ka duh a. Pakhatnaah chuan kawng tha hian hun min pek belh a ni, ram a thang zel a, hun hi a hlu a, time is money tihte pawh a lo ni zel a. Tin, a pahnihnaah chuan kawng tha chuan kan economy a siam danglam a ni. Tun tumah pawh ka lo chhut a, a formula ka chawhchhuah hi chu ka sawi dawn lo va, mahse kawng a that hnua a time taken, Lunglei leh Aizawl inkar a hma a darkar sarih dawn kan thangna te, darkar ruk dawn kan thang thinnaah khan darkar hnih dawn maiin tunah chuan kan hma ta a, kan thlenna tur hun kha. Chu chuan POL kan save kha ka chhut chhin a, motor pakhatnaah hian ₹ 419.58 vel kha motor pakhat zel hian kha hunbi a lo ei tawi takah khan kan pawisa hman kha a rawn cut down ta a ni. Chu economy chu kan hriat phak miah si loha kawng tha in a hrin a ni tlat, khangte te kha a pawimawh em em in ka hria a.

Tin, a dawt lehah chuan thil man tih to leh tlawmah hian kawng tha hian awmzia a nei tlat a ni, kawng a chhiat chuan a phurh man to leh motor te a lo insawh a, repair ngaite a lo ni sam a. Chuvang chuan kha khan harsatna a siam thin a, kawng tha hi chu kan neih zelna tur atan pawh tan kan lakna kipui ber a nih hi a ngaiin ka hria a, chu chu ka han sawi duh a.

A dawt lehah chuan Lunglei leh Aizawl inkar World Bank Road pawh hi toll gate te hi dah ve thei tawh ila a tha hle mai a ka ti a. Amaherawhchu kan Engineer-te nen tumkhat kan sawiho dun tum chuan hemi National Highway hian kumtin a maintenance fund central-in a rawn pek aia tam kan hmuh dawn loh chuan a tih ngam mai loh an ti a. Amaherawhchu han ti tak tak dawn ta ila, toll gate hi dah ta ila, toll fee te han khawn ta ila chu mipui ah pawh hian toll fee khawn te pawh hi kan inzirtir a ngai ta mai a ni lo maw tih te ka ngaihtuahnaah hian a awm a. Airport road-te phei hi chu ka rilruah hian a awm thin a.

Kan term hmasaah khan kan hotupain PWD min han chan tir hun chhung reilote thla 6 bawr vel khan kan Engineer-in- Chief te nen rawtnate kan siam a.

Amaherawhchu kan han tih dawn tak takah khan a maintenance national highway funds kan hmuh tur hmu phalo ting si a kan kal kha kan hlau a ni. Chutiang deuh chuan khang ang kawng te te pawh kha kan inzirtir chu a hun ta deuh lo maw ka ti a. A dawt lehah chuan Lunglei leh Aizawl inkar kawng hnai deuh mai, helai memberte pawhin kan la hriat loh hrilh che u ka duh a, chu chu Lunglei to Aizawl via Buarpui, South Sabual, Darlung inkar hi Lunglei leh Aizawl inkar a hnuk hnai berna 30 km vela in hnaih hleih a ni a. Buarpui bialtu pheh hi chuan saw lamah sawn kawng saw tha deuha kal tir hi a duh khawp mai a. Ka han sawi sak mai ang a, Haulawng tlangdung kawng kal awm mek ai hian Buarpui lam atang hian kawng tha zawk kal ta ang sela.

Tuna Lunglei to Buarpui alignment te pawh kan Engineer-in-Chief bulah pawh vawiinah kan sawi ri a, engnge ni kan kal zel theih dan tur chu ka hre lo va. Kan House Leader pawh hian min hriat sak sela ka duh a. Sawlai kawng alignment saw tun aia tha lehzuala kan tih theih chuan a hnuk hnai ber apiang kha economy thlirna zawn atang chuan kan transportation leh kan POL hman ral te pawh a lo tlakhniam zelna kha kan hma hun kal zel tur atan pawh thil tul tak niin ka hria a, chu chu ka rawn sawi ni sela.

Tichuan, Pu Speaker, vawiina kan resolution hi pass ngei tur leh adopt ngei turin ka thlawp a ni tih ka rawn sawi a ni e. Ka lawm e.

SPEAKER : Dr Vanlalhlana ilo sawm ang. Chumi dawtah Pu Robert Romawia Royte.

Dr.VANLALTHLANA : Pu Speaker, ka lawm e. Kawng tha siam tura nasa taka kan Chief Minister leh kan PWD Minister-in hma a la hi a thuphung chuan a lawmawm ka ti khawp mai a. Bungraw phur truck-in kawng chhia avanga hun an hloh hi a hlut zawng teh ila a man a sang viauin ka ring a. Tumkhat chu kei Commerce zirtirtute kan ni bawka, i chhut ang u, kan ti a, amaherawhchu a tawp kha kan la thleng ta chiah lo va, tunah hian buaipui tumin kan han ti vel a, a tlem vak lovin ka ring kan han chhut chhoh naah pawh.

Kum 2007 khan Pu Speaker, i ding lama thu te hi an sorkar lai khan Mizoram Road Fund Act an siam a. He Act hian a khuahkhirh an hlauh vang nge ni sorkar leh ah khan 2010-ah khan rules peih fel chauh a ni a. Kum 2017-18 ah khan

NEDP fund hmangin kawng siamna tur kha 296% laia tih pun a ni a, kha kha maintainance a ni a.

Tin, kawng thar siam nan budget 70%-in a hma ami aiin tih pun a ni baw a. Amaherawhchu a result kan hre theuh a. Mipui te kan manganna, hreawm kan tihna, nikuma kan auna zawng zawng te kan hria a. Nikum lam kha metrological department lam kha chuan kum tam tak chhunga ruahtui tam ber tum a ni e, an rawn ti ve leh thung baw a. Khatiang kha kan thil tawn chhoh dante a ni a. Tunah chuan kawng tam tak mai siamthat a ni ta hi a lawmawm ka ti khawp mai.

Tunhnaia ka thil tawn ve ka han sawi ang a, ka la tawn chiah loh pakhat thil report ka dawnah chuan Serlui bial lamah khuan kawng siam lai sawi duh ka nei mahse ka tlawh hmanlo a. Session lehah sawi tur a awm a nih chuan sawi tur ka nei a. Chu chu dahtha lawk hrih ila, Phullen to Zawngin hmannah kan en a, kan Minister zing ami farm siam hi a ni a. A sample te kan la a, Ministry of Road Transport and Highways-in GSP siam dan tur an tih a 5 inches vel lek leka lung tih sawm tur a nih laiin 1 ft hawlh te lung an bun tawp a. Road roller-a an chil lai mit ngeiin kan han hmu a, chutah chuan 'hei hi in ti tur a ni lo, chhu sawm rawh u,' kan ti a.

A sub-contractor ngei khan ka kal hnuah ka kalpui te hriat theih turin "Nangni hian min ti thamlo" tiin tawng min han cheh khum a. Khatiang kha tun kan sorkarah hian a awm chho dawn a nih chuan a huphurhawm khawpin ka hria a. Hei hi kan Minister pawhin min en sak se ka duh a, khilai kawng khi an siam mek lai a ni a. Zawngin khua phei chu an mangang a, khilaia an lung hman te an rawn test tir a, tikhan sawi tur an ngah khawp mai a. Tin, chumi tuma kan kal chuan khatia thu kan sawi zawh/kan han en zawh khan Zawngin lamah kan let leh a, chawte kan eikhamah Phullen lam kal turin kan han chhuk thla leh a. Kan hawna tur te a thui avangin kan haw hma deuh a. Kan sawisel ang tho khan kan let leh lamah pawh an lo bun leh a. Lung kha lian pui pui an lo roll tir leh a. Opposition MLA mai kan ni a, kan pui viau lo pawh a ni maithei. Amaherawhchu sorkarin ruahmanna a nei a, specification a nei a, khami an zah lo erawh kha chu a paw ka ti khawp mai. PMGSY chungchangah te kawng siam te tunah pawh a awm chho leh dawn a.

Audit titu lamah hian hmelhriatte kan lo nei a. Audit an indaih loh deuh avangin tum khat chu pui turin min rawn ngen a, audit tu firm-in. Chungah te pawh

chuan hriat nual te, zirchhuah nual te kan nei ve ta a. Tun sorkar pawh hi fimkhur takin kal se tih kha ka ngen duh a. Tuna kawng siam hi President a lo kal dawna kan siam ang mai mai ni lo deuh turah hian ka ngai a, chutiang tur chuan tan la turin ka ngen duh bawka ni.

Ka bialah hian kan resolution-a thu awm ‘siam tha mai’ tih hi kan la hmu tam lem lova. Ramhlun Vengthar leh Ramhlun Sports Complex-ah pheikhu chuan a buaithlak khawp mai a. Bial fannaah hian scooty-a kal mai thin hi ka ni a. Hmanniah zan programme ka hmanpuina turah ka accident thelh lehngal a. Khulai kawng khu kan Minister zahawm tak hian min ensak se ka duh khawp mai a. A hma thei anga min siam sak turin ka ngen nghal bawka ni.

Minister Pu Lalrinsanga sawi ang khan kawng hi maintain ngai a ni a, maintain nghal mai ni thin se chu a chhe lo tur a ni a. Te reuh te tea a khuar atanga tih that mai theih a nih lai hian siam tha ta mai se tih hi ka sawi chhuak duh bawka. Hun reilote chhunga kan sorkar-in Zoram dung leh vanga kawng chhe tak a siam mek hi tha ka ti a. Amaherawhchu, ‘a siam tha mai’ ti tur erawh chuan a hma chu ka la ti deuh a ni. Khati zawng kha ka sawi theih a ni e. Ka lawm e.

SPEAKER : Minister zahawm tak Pu Robert Romawia Royte. (interruption) Dar 4 chu pelh loh hi a tha a sin.

Pu ROBERT ROMAWIA ROYTE : Pu Speaker, ka lawm e. Tawitein ka sawi ang. Vawinah private member resolution pass nahawm tak mai Aizawl West-I bialtu Pu Zothantluanga’n a rawn propose hi a lawmawm hlein ka hria a. Kan zavaia lungrual tlanna tur leh he House zahawm takin record-a kan dah tur ni pawhin ka hria a. Pu C. Ngunlianchunga thusawite leh member dang dangte thusawi kha ka lo chhinchhiah ve nual a, react-na hun a awm lovang a, mahse chawhmeh siam tuiloh avang mai tepawhin chawhmeh kumtluanga innei turte pawh kan inchhuah tir lek lek a an han tih deuh lai khan ka thianpa thusawi ka hrechhuak a. Kan muk ren run lutuk a, muk thang lo ka ni a, nilenga han muk hi ka tan chuan phurrit a tling a. Ka thianpain, “Han inhmangaih tak tak hi chuan insi reng hian mu mah ila a insi lo lai hi a khua a har veng veng mai a ni” a ti a. Khati ang deuh kha a ni ve tho a ni tih ka sawi ve mai mai duh a. A chhan chu kan Chief Minister zahawm tak leh a team-te ti mai ang, PWD officer leh staff-te thawhho dan hi insi reng pawha a insi lo lai khawhar vang vang ang khawpa inhma tawn leh ruahmanna fel tak, langtlanga thil

ruahman an ni a, an thawkho tha tih wawiina a result kan hmuh atang hian a hriatin ka hria a. Chungte chu ka sawi duh a. Thla 5 chhunga thil tih atan chuan MNF sorkar-in kawngpui chungchanga a hnathawh leh a result lo lang hi chu a ropui thlawt a, lawmthu sawina tham a ni. Zeldin thu bawla khawi khawi emaw a sawi chhuah lam ni lovin, a taka hnathawhah hian a ni lawmthu sawi member zahawm tak hian a rawn rawt. Chu chu pawmtlang ila, phur takin pass ang u tih ka sawi duh a.

Tin, thla 5 chhunga a thawh pawimawh tak mai min ti lawm em em tu ka hriat thar a awm a, official-te atanga ka hriat a ni a. Hei hi he House zahawm tak hi ka share ve duh a. Lei chungchang hi kan sorkar hmasa lamahte harsatna kan tawk a, sorkar an vanduai pawhin ka hria a. Mimal pawhin kan tuar a, nunna pawh kan chan a, a pawi khawp mai a. Hma lak vat a ngai a ni tih kan Chief Minister zahawm takin hriaa heng kan lei temporary deuh leh dawh that ngaithe dawh thatna tur atana technical survey mumal tak thla 5 chhunga an zo va, report-te pawh an han nei hman hi a lawmawm khawp mai a. Public-a puanchhuah a ni chiah lo na a. Tin, an firm hmante pawh hi engtin nge ni an chah chhuah mai theih aw ka ti a. Garden Research Ship Builders and Engineers (GRSE), Kolkata base an ni a. India ramah chuan hetiang thiamna lamah leh a manufacture-ah pawh a lawr lak anga ngaih an ni a. Anni kan rama lei 30 chuang survey uluk tak a rawn nei a, tih that ngai lai te, fimkhur ngai lai te tih that dan tur ruahmanna an rawn siam thei mai hi a ropui a, sum kan hmuh lehna hnar tur step pawimawh tak a ni a. Khawvel hi nachangah a innghat a ni tihte pawh hi a dikin ka hria a. Kan pu, kan Chief Minister-in nachang a hriatna avangin Mizo hnamin hun kal tawhahte pawh vanneihna kan tawng chho fo va. Lei dawh leh siam that chungchangah pawh nachang hre taka kan Chief Minister leh a hoten technical survey an nei a, report-te an han nei a. Khami zulzuia proposal funding agencies-ah te thawn a nih chuan pawm pawh a pawm nahawm dawn a, a lawmawmin ka hria a. MNF sorkar hi kum 2/3 a kal leh chuan lei a pawh chungchangah pawh resolution ropui tak pawh hi kan pass leh turah beisei ila. Chutiang chuan ngaihtuahna ka hmang a ni.

Tin, lei tha lo hi kan chhungkua hi a mimal taka tuartu pawh kan ni vein ka hria a. Brick siamna hmun hi Zawlnuam bul Bungthuamah kan nei ve a, harsa takin kan han din ve a, brick-te pawh kan beisei aia thain kan thar chhuak a. Full load hi Aizawl lamah lei chak loh avangin kan phur chho hlei thei lova, chu chuan hralhna a

ti harsa a. Lei siam tha tura kan Chief Minister zahawm takin hma a la hi a lawm berte zingah a mimal ang pawhin ka tang a ni tih ka sawi duh a ni.

Tin, kan Chief Minister-in public-ah a puang tawh a, kan Engineering Service khawmpuiaah ni tain ka hria, hman deuhah khan Mizo leh tualchhung contractor-te Mizoram chhunga Mizoram budget atanga hnathawhnaah chuan kan duhsak ang tih a awm a. Mizoram budget ka'n ti kher a, a ni chuang lo turah ngai ila. Mizoram chhunga hnathawhnaah kan duhsak ang tih hian a nghawng a thui khawp mai tih hi vawiinah hian ka sawi duh a. Vai contractor-te hnenah sum kan pek chhuah hian Mizoramah pawisa a vir kual lo va, hlawkpuitu kan tlem em em a. Mizo contractor-te hnenah hian bill sang deuh zawkte pawh ni mahse a hlawkna hi chu a sang zawk daih a ni, hnam ang leh sorkar ang pawhin tih ka sawi duh a. Hetianga kan Chief Minister zahawm takin hnam hmangaihna leh hnam rilru pua Mizo contractor-te duhsakna rilru a nei hi hnama a chian zia a langin ka hria a, a lawmawm a. Keimahni, Pu Speaker, i ding lama thute mai ni lo, Mizo hnam zawng zawng anga kan lawmna tur a ni a. Hei hian direct leh indirect tak pawhin Mizo mipuiteah hnianghnarna leh hamthatna a thlen dawn a ni tih ka sawi duh.

Kei pawh a hmingin PWD-ah 1st class contractor ka ni ve a. Sorkar hmasa lam hunah khan vai contractor-ten Mizorama hna awm an chan percentage han chhut khan, a percentage dik tak chuan ka sawi thei loving a, mahse hna lian zawng zawng deuhthaw kha an chan avangin Mizo 1st class contractor-hote kha chu kan awl angreng a. 1st class contractor hna nei lo association-te pawh i din ang u hmiang te kan ti fiamthu mai mai a ni.

Khatianga 1st class contractor te pawh an awm laia kan Chief Minister zahawm tak PWD Minister ni bawkin ruahmanna a siam dan hi nghakhlel tu tam tak Mizo zingah an awm a ni tih ka sawi duh a. Tin, PWD hnuai a ni emaw, ni lo emaw, tunlaia Ease of Business an tih ang deuhva sumdawanna tih awlsam ang deuh hian "East of Bill payment" tih lai hi a ngaihtuah tham khawpin ka hria. Assam-ah te chuan hetiang zawng hian an kalna khawp mai a, sum pawh an hmang chak a, a lo chhuak leh tur te pawh a hip tam bawk a. Kan sorkar kal chho turah hian contractor mawl ve te te pawh an ni a, bill dan kual thui lutuk lova hnathawk tuten bill an lak theihna tur pawh hi a tul hlein ka hria.

Tin, kan ram hmasawwna tur tak tak atan hian kan budget chauh hi a tawk lo tih kan hre theuh ang a. Central scheme tam tak Mizoramah hai luh a tul a. Union budget te kan en ve a, kan print chhuak a, engkim detail in a awm vek tawh a. Kan ram hmasawwna tur atan hian sum a tam khawp mai a, central sector scheme-in an implement tur chi te pawh tam tak a awm a ni. Kan sorkar thar hian kan budget chhung ami kher lo pawh hian tan a la dawn a ni tih kan puin a sawi a. Helai hi a phurawmin ka hria. Road sector ang chi te phei chu central sorkar pawh a pawkna lai leh hma an lak len tumna lai a ni a. Aizawl atanga Tuipang kawng tender tifel in contractor an ti fel a vaibelchhe 6000 chuang an ti fel ta te hi a lawmawm hlein ka hria. Sorkar hmasa lamah pawh a ri ret ret a, mahse a fel thei lova. Kan hotuten chak taka hma an lakna zar te pawh a ni a. Vawiinah an GM te nen pawh kan inbia a, vaibelchhe 6000 chu kan budget zat ve a ni. Hetiang kan rama rawn luang lut tur hi kum 3 leh a chanve chhunga hman ral tur a ni a. Heta GST-a sum lut tur pawh hi vaibelchhe 180 atanga 200 chuang ni dawnin a lang a ni. Chuvang chuan tax heti zah hi kan raise thei dawn em ni tih te pawh kha budget sawi lai khan a awm in ka hria a. Sorkar hmasa lama tax hlawm lian a luh lohnaah hian kan CM zahawm tak Pu Zoramthanga sorkarah hian tax hlawm lian hi Mizoram sorkarah a lut dawn a ni tih ka sawi duh a ni. Kan receipt/receive budget aia tam pawh hi kan ramah sum hian a lut lovang tih pawh a sawi theih loh a ni.

Tin, Aizawl East-II bial aiawhin lawmthu ka sawi duh a, ka han tlin ve hlim kha kan CM zahawm tak nen kan bial chhunga kawng tihchangtlun dan tur ruahmanna kan siam a, PWD lama kan hotute nen in be rawnin DO letter ka ziaak a, rawtna te ka thlen ve a. Ka rawtna te kan CM zahawm takin rawn tihlawhtling in, Chite kawng te pawh main road lian ang maiin alo lian ta a, a dum hlurh tawh mai a ni. Tukinah ka zuk chian vek a, helaiah thusawi ve ka tum avangin. Tin, Armed Veng South atanga lei dawh te pawh a lo zo ti tuai ve ve tawh bawk a. Aizawl East-II aiawh pawhin vawiinah kan CM zahawm tak hnenah lawm thu ka sawi duh a. Chite atanga Falkland la siam loh lai hi chu siam vat a ngai a ni tih ka rawt duh bawk a. Armed Veng South atanga Ramthar road hi kan mamawh hle a ni tih ka sawi duh bawk a. A tawp nan Pu Speaker, he resolution duhawm tak hi

Mizoram mipui zawng zawng hian min pass pui duh niin ka hria a, ka thlawp a, lungrual takin i pass ang u tih ka sawi duh a ni e. Ka lawm e.

SPEAKER : Member te hian zalenna chu kan nei nameuh mai mahse hetiangah hian insumtheihna te pawh hi a awm thin a. Kan CM hian dar 4 a pelh hlek a ngai dawn a, kan hrethiam dawn nia. Kan CM zahawm tak Pu Zoramthanga i lo sawm ang.

Pu ZORAMTHANGA, CHIEF MINISTER : Pu Speaker, ka lawm e. ka sawi rei lo vang, dar 4 tlem te in ka pel hret chauh ang.

Pu Speaker, Private Members Resolution a nihna kha chu thukhat a ni a, kawng chungchang thu a nih avang hian a tawp nan tlem te han sawi ve kha a tha in ka hria a ni.

Kan hriat theuh angin December ni 15-ah sorkar kan siam a, Christmas dawnah engmah a tih hman lo va, January kan han kai chho va, kan han ti tan dawn chauh va, inthlan a lo ni a, Election Code of Conduct in min phuar a. Kawng siam hrim hrim kha chu kan neih ang khan siam theih mahse, a buaithlak a chu thawktu tur Road Roller tel lo chuan a siam theih loh an ti a. Kan han lei dawn a, Calcutta lama lo thleng tur kha Election Code of Conduct avangin a lo thleng thei lo va. Kan neih hlui tlem te khan kan han bei leh tlah tlah mai a. Hei hi an chak lo em em khawp a, khatiang chungah thawk khan heti tak hian an ti hman ang tih hi a hotu ber pawhin ka ring lo reng reng a ni. Pawisa chu awm mahse thawk tur chuan, hmanni ka sawi ang khan black-top a ni si a, a patching te kha Durmut-a chhut ngawt chi a ni si lova. Road Roller kha department-in kan nei si lova rin ai takin kan lo thawk tam a, chu chu kei pawh lawmawm ka ti a. Tunhnaiah Road Roller a lo thleng tan a, chutih rualin ruah pawh a lo thleng ve baw a, chingal leh saum an intawklawi tih ang deuhin eng kan ti hleithei dawn lova, paw ka ti khawp mai. A zualpui erawh chu kan han ti a, fur lai pawh hian chhiat belh tur a lo awm a, helai hi a chhe leh tawh tih tur kha chu a tam mai dawn a. Department hotute hian a khwar lai kha bitumen hmanga lung nena hnawh chi nge ni ang concrete- a tih mai chi nge, rang taka tih tur chu kei pawh ka rilru a inkhap chho reng a. Kan theih ang angin han ti ila, tun fur chu kan theihtawkin kan ti naw naw ang a, 'ber' thla a lo nihah khua a lo thal chho ang a, road roller kan ngah tawh a, theih ang tawkin kan

thawk chak thei tawh ang tih kha ka inhnemna a ni a. Tun ami chu min han fak sak a, a lawmawm khawp mai a, kei ngei pawhin rin aiin in lo va thawk tam hman ve ka ti a, Nakinah Pathian tanpuinain a aia nasain kan thawk thei turah ngai ila, harsa tak chungha han ti naw naw kan ni tih ka sawi duh a.

A dawt leha ka sawi duh leh chu sorkarna han indem pawh kha a ni viau a, a ni lo thei lo bawk a, party chi hnih han insorkar chhawk chuan han indem kha a awm lo thei lova. Kan indem emaw, kan infak emaw, chutih laia thil awm chu Congress sorkar kum sawm tal tap a sorkar a, kan sorkar hmasak ngaihtuah chuan pawisa chu a let eng emaw zat in a tam a ni. Kum sawm chhung khan kawng chungchang thuah chuan duhthu zawng an sam ngang lo aniang kan buai tlang em mai a. Tlangval hovin kan kalkawng hi ICU-ah a awm deuh reng mai a an tih fiamthu ang deuh kha a ni a. Ka rilrua ka neih chu bial pakhat a hmun chu sawi lo mai ila, tak tak a nia, mi pakhat a han kal a, ‘nangni nen hian chhungkhat unau kan nih hi, in hria ang u,’ a han ti a.

An ninin, ‘sorkar lai leh in lal lai khan unau kan nih kha in sawi si lova, in tlak hnuah in sawi chauh a, in sawi tlai em mai,’ a ti e tih ang deuh kha a nia. Kum sawm pawisa ngah viau lai kawng siam lova, kan hmang hman dawn lo, inthlana kan tlak vaih chuan tihchian tawh hnuah kum 2018 tawp lama hman tura pawisa dah kha chu hman hman loh tur tih a chiang a. An sorkar loh vaih chuan keini pawh kan ni tho, 2008 ami kan hmang hman tawh lo. Khang kha chiang sa vek a ni, kan vaiin kan hmu vek, an lo dah kha a lawmawm e. Mahse, an tla ta si a, an dah tlai deuh hlek a ni. Pu Speaker, siam em em e. An siam that leh that loh chu keini ni lovin mipuiin judgement siam se a tha ang. Kan au hla zawng zawng kha kan hriat vek kha, a thupui chu zu leh kawng chhia a nih kha maw.

Engpawh nise kan theihtawpin tan kan han la a, pawisa kha Congress kum sawm chhunga an pawisa hman bang nawi i ti ang, a tawpna ber a ni tlat a, khang an eibang nawi te te kha kan han her lum ve chu a nia, rin ai takin kan her lum kha tui kan lo ti tlang a niang, hei a tha khawp mai, kan ti a, lawmthu kan sawi ta zung zung chu a ni a. A pawimawh ber chu ngaihtuahna a ni. Kan rilru put dan kan thlak phawt chuan a hmaa theih loh kha, kum sawm chhunga khatiang ni kha thla hnih/thumli chhungin ti hi a ni leh mai a. Ruah a sur, sur lo tih chu kumtin dan a nia, tam deuh tum a awm a, tlem deuh tum a awm a, pawisa kum 2007 leh 2018 inkarah pawh a

tam khawp mai. Kum 18-19-ah pawh a tam tho, kawng pawh ti kha a nia, pawisa pawh ti kha a nia, term pawh ti kha a nia, election lo thleng tur pawh ti kha a ni. Kei chuan fiamthua ka sawi fo, tlangval pakhat a lo tlan lut a, ,ka pu, i jacket hi ka lo lei ang e,' a ti a, lawm em em in a tlan chhuah pui a. Tlai lam ah chuan a rawn paw lut zan zan a, 'ka pu, kir leh ka duh,' a rawn ti a, 'ka bialnuin mawi a ti tlat lo,' a ti a, 'I kir leh poh mai aniang chu,' a ti a. Kar khat hnu ah a lo tlan lut leh a, 'ka pu, ka jacket dah kha a la awm em'? 'Awm e' 'Ka la leh dawn,' a ti a, 'enga tinge, i bialnu in a rilru a thlak ta elaw'? Thlak lo, bialnu ka thlak daih,' a ti a. Hetiang deuh kha a nia, Zoram weather a inthlak em ni? Budget a in thlak em ni? Kawng a inthlak em ni? Thlak lo, bialnu kan thlak a, a dang mai a ni.

Chuvangin vawiinah hian kan ngaihpawimawh zawng hi kan thlak a, a thing kan her lum kha kan party kum sawm riltam tawh ten an rawn ei chak khawp, an inchuh viau a ni. A ei chin pawh an awm ang, amaherawhchu kan kawng heti hi a nia, i ngaihtuah ang u kan ti a, kan hotu ten an rilru put hmang an thlak a, hetiang rilru nen budget tharah khawl thar nen han kal ila zia pawh a zia awm thui khawpin ka ring a. Zoram hi kawng thaa siam kan duh a, chu mai ni lovin kan kawngpui hi chu thukhat a ni.

Kan ngaihtuahnaa awm ber chu kan eizawna kawng tur Agriculture link road pawh a ni ang a, Rubber link road pawh a ni ang a, Bamboo link road pawh a ni ang. Amaherawhchu, keinin min an sak ve rem lo hla kan zuk phuah Bamboo link-road kan ti tlat a, chuti lo chu economic link-road kan tih tlat chuan state dangin keini pawh, keini pawh an ti vek a, a inchuh tur kan tam a, min pek tur an hre lo. Bamboo link-road kan tih chuan midangin an sa ve thei tlat lo keini lo chuan. Khami hmang khan tunah pawh hmanna ka sawi ang khan Delhi lamah hemi kan link-road pui hi kan rama kan eizawna tur, chitin reng lakchhuahna turin tih kan tum a. Amaherawhchu, India ramah dik tak chuan specific tak chuan an la dah si lo a, phuahchhawpa hetia sanction chawp tir a tih a ngai dawn a. Hei hi khulama kan gospel hril ve ber tur, a pawimawh ber pakhat a ni e kan tih kha. Kawngpui chu National Highway an rawn ti a; tin, a rawn thang ang a, a rawn kal zel ang. Mahse kan eizawna min connect tur link-road tak tak hi chu Delhi lam ngaihtuahnaah a awm tak tak lo, keimahni sutchhuah ngai

a ni a. Hei hi theihtawpin kan han su ang a, engangin nge kan hlawhtlin ang kan hre lo.

Engpawh ni se Pathian tanpuinain kan hlawhtlin kan ring a, kan eizawna, kan lakluhna tur kawng a awm chuan kan ram chu kan hre vek mai, engkim that duhna a ni ringawt. Ram pawh a zau, sq. km. 21000 a ni a, chu chu a boruak atanga teh a ni. A mual atanga hetia pawh chhoh a, pawh chhuka hetia tih a ni lo. Amaherawhchu, kan ramin kan neih theih chu a chho lam kha a nei thei vek a, kham te chu a awm a, chu chu thuhra ni se. A chhuk lam a neih theih baw a, a chung a airmail-a teh kha hetia a neih theih chin tih chuan sq.km. 30000 hi chu kan neih theih ngei ka ring.

Chu chu a nih avangin heng zawng zawngah hian en ila kha kan ram, neih sen loha mipui a let 3/4 chawm zo ram awm si kha. Tunah hi chuan kan utilise a, kawngah kan connect chuan kawng chi tinrengah mipui economy hi a thang chho ang. Tunah chuan a pawimawh ber chu khata kan chin tur kha, identification of the crop, a chin tur tak identify-na tur khan kan bei rei a. Tunah chuan kan hre thawkhat ta e, bamboo te, rubber te, thil dang tha tak tak a awm. Amaherawhchu, link- road vawinah road kan sawi baw a, kha road nena kan connect chuan kan vaiin kan eizawna hi nasa takin min tichho ang tih kan ring a.

Tichuan, tunah pawh vawinah lawmthu sawina tur resolution a lo lut a, a lawmawm e. Amaherawhchu, opposition lamin in sawi ang khan a vai vaiin a tha hauh lo, a thalo lai pawh a la tam khawp mai. Mahse kan tih phak chinah hian lawmthu han sawi phawt ila, thawktu ho pawh a tiphur deuh ang chu maw le tiin vawiina lawmthu sawina resolution chu ka han support a ni e. Pu Speaker, ka lawm e.

SPEAKER : Aw le, a changtu Minister –in inthlahrung takin, tawi fel takin arawn sawi a, a lawmawm e.

Tunah chuan resolution neitu Pu Zothantluanga kan sawm ang a. Wind-up a ni thin a, amaherawhchu a tih viau tawh kha maw, adopt rawn dil se i lo sawm ang.

Pu ZOTHANTLUANGA : Pu Speaker, ka lawm e. Vawiinah ka Private Resolution “MNF Ministry-in hun reilote chhunga Zoram dung leh vanga kawng chhe tak a siam tha mai hi lawmawm kan ti hle” tih hi kan Minister te, kan C.M hoin member zahawm tak tak mi 18 laiin kan sawi a, a hlimawm ka ti a, a lawmawm ka ti a, kan ngai pawimawh tlang a. Mizoramah hian chhim leh hmarah Pu Zoramthanga sorkar a lo pian hnu hian kawng a lo tha ta a. Kan sawi ang khan Aizawl to Siaha thlenna tur atan a hma hun chanve deuh thaw lek a ngai tawh a. Chutiengin Aizawl-Silchar a lo ni bawk a. Tin, Aizawl-Khawthlang, Kanhmun thlengin kei pawh zin thin ka ni a, darkar 10 chuang kan senna thin ah vawiinah chuan darkar 6-ah awlsamte in kan thleng thei a. Chutieng bawkin Aizawl-Champhai chu darkar 12 te, darkar 11 te kan hman laiin vawiinah chuan darkar 6-ah te kan thleng thei ta a. Chuvang chuan Zoram dung leh vangah hian he hmasawna hi a thleng a ni tih hi a chiengin ka hria. Mizoram dung leh vanga kawng tha ta hi sorkar hmasa Pu Lal Thanhawla ministry tih kha a ni vawiinah hian ti ta ila tuman min awih sak ka ring lo. Chuvang chuan, Pu Zoramthanga Sorkarin, hun reilote chhunga a thawh a ni tih hi a chiengin ka hria.

Tin, PWD ho pawhin an hnathawh hi an record a ni. Tunhma zawng zawng pawhin hetiang aia tam hi kan la thawk ngai lo tih hi an sawi dan a nih avangin vawiinah hian MNF sorkar hun reilote chhunga hmalakna hi a ropui a. Chuvang chuan Pu Speaker, ka Private Member Resolution “MNF Ministry-in hun rei lote chhunga Zoram dung leh vanga kawng chhe tak a siam tha mai hi lawmawm kan ti hle” tih hi he House zahawm takin min adopt sak turin ka rawn ngen e.

SPEAKER : Aw le, a rawn puluttu member zahawm takin “MNF Ministry-in hun reilote chhunga Zoram dung leh vanga kawng chhe tak a siam tha mai hi lawmawm kan ti hle” tih kha remtiin ‘Remti’ ula ule. (Member : Remti.) ‘remti lo’ kan awm em? ‘Remti lo’ kan awm chuan remti lo ti rawh u. Kan awm lo a.

Tunah chuan member zahawm tak Pu Zothantluanga resolution “MNF Ministry-in hun reilote chhunga Zoram dung leh vanga kawng chhe tak a

siam tha mai hi lawmawm kan ti hle” tih chu House-in lungrual takin a adopt ta a ni.

Pu ZOTHANTLUANGA : Pu Speaker, ka lawm e.

SPEAKER : Aw le, vawiina kan business chu kan zo a. Thawhtan zing 10:30 AM-ah kan thukhawm leh dawn nia.

Sitting is adjourned (4:10 pm)